

## **Nihánj me se-nana Jesucristó nana sa' cachrón síí cu'naj Marcos rihaan yanj a**

*Nana nihánj taj xna'anj che'é síí cu'naj Juan síí cuta' ne man yuvií a*

<sup>1</sup> Nanj vaa guun che'e se-nana Jesucristó nana sa' a.

<sup>2</sup> Dan me se síí cu'naj Isaías síí nata' se-nana Diose gaa naá ro', cachrón so' nana nihánj rihaan yanj, ne: “Vaa síí ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvií ve'é ca'mii nij yuvií ga so', qui'yaj so' a”, me se-nana Diose nana cachrón síí cu'naj Isaías rihaan yanj a.

<sup>3</sup> Ne yo'ó nana cachrón uún so' me nana nihánj, ne: “Nucuj ndo'o ca'mii natáj 'o so' rej tacaan, ne cataj so' se vaa nuchran' nimán yuvií, ne ve'é ca'mii nij yuvií ga síí 'nij ra'a man ní' asa' ca'na' so' adonj”, taj síí cu'naj Isaías gaa naá, ne ase vaa cataj so' ro', ta'nga' danj guun adonj.

<sup>4</sup> Dan me se cavii síí cu'naj Juan síí cuta' ne man yuvií, ne vaj so' rej tacaan, ne ca'mii natáj so' rihaan nij yuvií, cataj so' se vaa nuchran' nimán nij yuvií, ne tanáj nij yuvií chrej chi'ii, ne ca'vee tinavij Diose cacun' tumé nij yuvií, taj Juan adonj.

<sup>5</sup> Ne dan me se curihanj ndo'o nij yuvií man estadó Judea do', man ma'an chuman' Jerusalén do', ca'na' nij yuvií rihaan síí cu'naj Juan, ne cata'

ne nij yuviḡ rá chráá cu'naj Jordán, qui'yaj Juan a. Dan me se nata' ya nij yuviḡ che'é cacun' tumé nij yuviḡ, gaa ne cata' ne nij yuviḡ adonj.

<sup>6</sup> Dan me se síí cu'naj Juan me se cachij taj xráá xcuu camelló guun yatzíj nuu so', ne 'nij catuun so' 'o nuj, ne chá so' rquíí chá so' catzi' xtaan man quií chá so' a.

<sup>7</sup> Ne ca'mii natáj so', ne cataj so':

—Vaa 'o síí sca' doj rihanj, ne so' me síí ca'na' rej rihāan ní', ne 'unj nihánj me se ne nó xcúnj nachej nuj correá 'nij tacanj so' ma'.

<sup>8</sup> Ne síí uta' ne na uun man soj mej, tzaj ne ca'na' so', ne ca'na' Nimán Diose rihaan soj, qui'yaj so' adonj —taj síí cu'naj Juan rihaan nij yuviḡ a.

*Nana nihánj taj xna'anj se vaa cuta' ne Juan man Jesucristó a*

<sup>9</sup> Ne güii yo' ta' asuun me se cavii Jesucristó chuman' Nazaret chuman' naj estadó Galilea, ne cata' ne so' rá chráá cu'naj Jordán, qui'yaj síí cu'naj Juan a.

<sup>10</sup> Nu' curihanj uún Jesucristó rque na, ne nu' quene'en so' se vaa naxra' rej xta', ne quene'en so' se vaa nanij Nimán Diose raā ma'an so', ne ase vaa cha'aan ro', vaa Nimán Diose, curuvi' yo' a.

<sup>11</sup> Gaa ne rej xta' ca'mii Diose rihaan Jesucristó, ne cuno nij síí nicun' ga Jesucristó nana ca'mii Diose, ne dan me se cataj Diose a:

—Ta'níí 'unj síí 'ee ndo'o raj man mé so', ne niha' ndo'o raj ni'yaj 'unj mán so' adonj —taj nana cavii rej xta' ca'mii Diose rihaan Jesucristó a.

*Nana nihánj taj xna'anj se vaa guun ndo'o rá síí chree tiha' yu'unj síí chree man Jesucristó a*

12 Ne dan me se ca'anj ndo'o Jesucristó rej tacaan, qui'yaj Nimán Diose a.

13 Ne vj chihaa güii vaj so' rej tacaan, ne guun rá sí chree tihá' yu'unj so' man Jesucristó, ne vaj Jesucristó rej man xcuu yuvaá, ne rqué nij se-mozó Diose me ma'an se cachiin rihaan Jesucristó a.

*Nana nihánj taj xna'anj se vaa ca'anj Jesucristó estadó cu'naj Galilea a*

14 Dan me se gaa quisij quita'aa nij tanuu man sí cu'naj Juan, ne ca'anj Jesucristó estadó cu'naj Galilea,

15 ne ca'mii natáj so' se-nana Diose nana sa', ne cataj so' se vaa nichrun' quisij güii ca'na' Diose guun chij Diose rihaan chumii nihánj, ne:

—Che'é dan nuchran' nimán soj, ne cuchuman rá soj cuno soj se-nanaj nana sa' á —taj so' rihaan nij yuvii a.

*Nana nihánj taj xna'anj se vaa cataj xna'anj Jesucristó rihaan ca'anj sí rii xcuj se vaa canoco' nij so' man Jesucristó a*

16 'O güii cachén Jesucristó tu'va na lacuaná cu'naj na Galilea, ne quene'en so' sí cu'naj Simón ga tinúu Simón sí cu'naj Andrés, ne dan me se nicun' roj so' tu'va na lacuaná, ne tiguíj roj so' nanj rque na, ne dan me se sí rii xcuj me roj so' a.

17 Gaa ne cataj Jesucristó rihaan roj so' a:

—Canoco' roj soj manj á. 'O se sí naqui'yaj chre' xcuj me roj soj, tzaj ne rej rihaan ní' me se guun roj soj sí naqui'yaj chre' yuvii, qui'yáj, ne canoco' nij yuvii manj a —taj Jesucristó rihaan roj tinuj roj so' a.

18 Ne nu' canicaj roj so' tanáj roj so' xnánj roj so', ne canoco' roj so' man Jesucristó, ca'anj roj so' nanj adonj.

19 Veé dan, ne cachéé nij so' doj, gaa ne quene'en Jesucristó man síi cu'naj Jacobo ta'núí síi cu'naj Zebedeo do', man tinúú Jacobo síi cu'naj Juan do' a. Dan me se nuu roj so' rque rihoo chéé rihaan na, ne naqui'yaj sa' roj so' nanj rii xcuj, ne canacúún Jesucristó man roj tinuj roj so' canoco' roj so' man Jesucristó a.

20 Veé dan, ne canicaj roj so', tanáj roj so' man rej roj so' síi cu'naj Zebedeo rá rihoo ga nij se-mozó so', gaa ne cavii roj so' canoco' roj so' man Jesucristó, ca'anj roj so' nanj adonj.

*Nana nihánj taj xna'anj se vaa quirii Jesucristó man yo'o nana chree nimán 'o snó'o a*

21 Dan me se catúj nij so' chuman' Capernaum, ne daj a güii naránj rá nij yuvii israelitá ca'anj Jesucristó ve' tucu'yón nij so' se-tucuanj Moisés, ne tucu'yón so' se-nana Diose man nij yuvii a.

22 Ne caráya'anj nij yuvii se-nana so', che'é se cuu doj vaa se-nana so' ga se-nana nij síi naqui'yaj cuu se-tucuanj Moisés a. 'O se ase vaa a'mii 'o síi uun chij ndo'o ro', danj ca'mii so' rihaan nij yuvii a.

23 Ne dan me se 'o güii naránj rá nij yuvii israelitá, ne yáán 'o síi nuu nana chree nimán rá ve' yo', ne caguáj so',

24 ne cataj so' se vaa:

—Me che'é ra'yunj so' man núj, ga Jesús Nazareno'. 'Na' so' tarí' so' man núj na'. Ne'enj mán so' se vaa síi guee cavii rihaan Diose mé

so' adonj —taj síi nuu nana chree nimán rihaan Jesucristó a.

<sup>25</sup> Gaa ne canicaj Jesucristó, caxríj yuvaa Jesucristó man nana chree nuu nimán snó'o yo', ne cataj so':

—Dínj tu'vá so', curihanj so' cuaj nimán síi nihánj á —taj Jesucristó rihaan nana chree yo' a.

<sup>26</sup> Ndaa quisnúú ma'an snó'o yo', qui'yaj nana chree, ne nucuaj ndo'o caguáj nana chree, ne curihanj nana chree nimán snó'o yo', ne nahuun sa' so' a.

<sup>27</sup> Gaa ne ca'anj uxrá rá nij yuvii, ne xná'anj nij yuvii man tuvi' nij yuvii, cataj nij yuvii:

—Asa' ca'vee qui'yaj so' danj ga. Tucuáán naca me nihánj chuguanj. 'Q se guun chij ndo'o síi nihánj, ne ndaa rihaan nij nana chree taj xna'anj síi nihánj daj qui'yaj nij so', ne uno nij nana chree yo' rihaan so' ga —taj nij yuvii rihaan tuvi' nij yuvii a.

<sup>28</sup> Gaa ne cuchi' nana che'é Jesucristó rihaan cunudanj nij yuvii man nichrun' estadó Galilea yo' a.

*Nana nihánj taj xna'anj se vaa nahuun sa' nii chej Simón Pedró, qui'yaj Jesucristó a*

<sup>29</sup> Dan me se curihanj nij tuvi' Jesucristó rá ve' tucu'yón nii se-tucuanj Moisés, gaa ne catúj taran' nij so' rá ve' tucúa Simón ga Andrés, ne 'na' Juan ga Jacobo ga nij so' a.

<sup>30</sup> Dan me se nii chej Simón ro', ran' no' chi'ij naca yuvaa, ne naj no', ne cataj xna'anj yo'o nij so' rihaan Jesucristó se vaa ran' uxrá no' a.

<sup>31</sup> Gaa ne cuchi' Jesucristó rej naj no', ne canó so' ra'a no', ne naxcaj so' man no', ne naxagaa no', ne nu' x'néj chi'ij xráá no', qui'yaj Jesucristó a. Ne veé maan orá dan qui'yaj chuvii no' chá nij so' nanj adonj.

*Nana nihánj taj xna'anj se vaa nahuun que'ee síí ran', qui'yaj Jesucristó a*

<sup>32</sup> Dan me se cata' güii, ne ti'nuu, ne nicaj nij yuvii cunudanj tuvi' nij yuvii síí ran' do', síí nuu nana chree nimán do', vaj nij yuvii rej ne Jesucristó a.

<sup>33</sup> Ne dan me se que'ee nij yuvii man chuman' Capernaum yo' nuu chre' rihaan ta'yaa ve' ne Jesucristó a.

<sup>34</sup> Gaa ne nahuun que'ee nij síí ran' daj a chi'ij, qui'yaj Jesucristó, ne quirii ndo'o so' nana chree nimán nij yuvii, ne ca'ne' so' suun rihaan nij nana chree se vaa se ca'mii nij nana chree a doj nana a. Dan me se ne ca'vej rá Jesucristó cataj nij nana chree se vaa cunuu yaan nij nana chree man Jesucristó a.

*Nana nihánj taj xna'anj se vaa ca'anj Jesucristó nu' nij ve' tucuyón nij yuvii israelitá se-tucuanj Moisés, ca'mii natáj so' a*

<sup>35</sup> Gaa ne rej taxrej naxagaa Jesucristó, ne cavii so' chuman' Capernaum, ne ca'anj so' rej tacaan cachinj ni'yaj so' rihaan Diose a.

<sup>36</sup> Gaa ne canoco' nij tuvi' Simón man so',

<sup>37</sup> gaa ne nari' nij so' man so', ne cataj nij so' rihaan so' se vaa:

—Cunudanj nij yuvii nano' mán so' á —taj nij tuvi' Simón rihaan Jesucristó a.

<sup>38</sup> Gaa ne cataj Jesucristó rihaan nij so':

—Cavij ní rej nihánj, ca'anj ní yo'ó nij chuman' naj nichrun', ne ca'mii natáj 'unj rihaan nij yuvij man yo'ó nij chuman' uún á. 'O se che'é dan ca'ná 'unj adonj —taj Jesucristó rihaan nij so' a.

<sup>39</sup> Gaa ne ca'anj so' nu' nij chuman' naj estadó Galilea, ne ca'mii natáj so' rá ve' tucu'yón nij síi man nij chuman' yo' se-tucañj Moisés, ne quirii so' man nij nana chree nuu nimán yuvij a.

*Nana nihánj taj xna'anj se vaa nahuun sa' 'o síi ran' luj ri'yuj, qui'yaj Jesucristó a*

<sup>40</sup> Gaa ne ca'na' 'o síi ran' luj ri'yuj, ne canicun' ruj so' rihaan Jesucristó, ne cachín ni'yaj so' rihaan Jesucristó, ne cataj so' se vaa:

—Sese me rá so', ne ca'vee ca'nee so' chi'ii xráj á —taj síi ran' luj ri'yuj yo' rihaan Jesucristó a.

<sup>41</sup> Gaa ne cunuu 'ee rá Jesucristó man so', ne cuta' Jesucristó ra'a Jesucristó raá so', ne cataj Jesucristó:

—Me raj qui'yáj danj ei. Nahuún so' qui'yáj adonj —taj Jesucristó rihaan so' a.

<sup>42</sup> Nu' danj cataj Jesucristó, ne nu' quinavij luj xráa síi ran', ne nahuun sa' so' cuaj a.

<sup>43</sup> Gaa ne ca'mii yuvaá Jesucristó ga so', ne quirii Jesucristó man so' rá ve',

<sup>44</sup> ne cataj Jesucristó rihaan so':

—Se guun cataj xna'anj so' a doj nana rihaan a 'o yuvij ma'. Maan se ca'anj so' rihaan xrej, ne tiháan so' mán so' rihaan xrej se vaa nahuún so', qui'yaj Diose, ne rque so' rihaan Diose ndaa vaa cataj síi cu'naj Moisés gaa naá ndaa vaa no xcúún so' rque so' rihaan Diose che'é yan nahuún so' adonj. Gaa

ne xcaj nij xrej cuentá se vaa nahuún so' qui'yáj adonj —taj Jesucristó rihaan síi nahuun yo' a.

<sup>45</sup> Tzaj ne curihanj síi nahuun yo', ne guun che'e so' ca'mii natáj ndo'o so', ndaa síj, gaa ne cha'nuu ndo'o nana se vaa nahuun so' qui'yaj Jesucristó a. Ne dan me se ne ca'vee a doj catuu ranga' Jesucristó rá nij chuman', qui'yaj nij nana yo', ne inanj rej tacaan vaj so', ne canó nij yuvii cuchí' rej vaj so' a.

## 2

*Nana nihánj taj xna'anj se vaa nahuun sa' 'o síi na'vee cachee, qui'yaj Jesucristó a*

<sup>1</sup> Dan me se cachén doj güii, gaa ne catúj uún Jesucristó chuman' Capernaum, gaa ne cuchí' nana rihaan nij yuvii se vaa yanj so' rá ve' a.

<sup>2</sup> Gaa ne cunuu chre' que'ee ndo'o nij yuvii rihaan ve' yo', ne ndaa raan ma'an mán nij yuvii, ne ndaa rihaan ta'yaa ve' yo' taj rej quisij doj cumán nij yuvii a. Ne nata' Jesucristó se-nana so' rihaan nij yuvii a.

<sup>3</sup> Ne dan me se ca'na' doj yuvii uún, ne nij so' me se nicaj nij so' yo'o tuvi' nij so' síi na'vee cachee, ne táá chihá ca'anj nij so' man síi na'vee cachee yo', ne dan me se guun rá nij so' cuchí' síi na'vee cachee yo' rihaan Jesucristó a.

<sup>4</sup> Tzaj ne ne ca'vee cuchí' síi na'vee cachee yo' rihaan Jesucristó, qui'yaj nij so' a ma'. 'O se man uxrá yuvii, ne ne ca'vee cachén nij so' a. Che'é dan cavii nij so' xráá ve', ne caya' nij so' yu'uj xráá ve' rej nicun' Jesucristó rá ve', ne tananij nij so' yuvéé táá síi na'vee cachee yo' rihaan Jesucristó a.



<sup>5</sup> Dan me se gaa quene'en Jesucristó se vaa cuchumán uxrá rá nij tuvi' síi na'vee cachee yo' se vaa ca'vee nahuun so' qui'yaj Jesucristó, gaa ne cataj so' rihaan síi na'vee cachee yo':

—Navij cacun' xráá so', nanj tinuj —taj Jesucristó rihaan so' a.

<sup>6</sup> Ne ne doj síi naqui'yaj cuu se-tucuanj Moisés rá ve' yo' ga Jesucristó, ne nuchruj raá nij so', ne guun rá nij so':

<sup>7</sup> “Me che'é a'mii síi nihánj danj ga. 'O se a'mii so' nana vaa nij rihaan Diose asan. Orún' Diose guun nucuaj tinavij cacun' xráá yuvii nanj á”, guun rá nij síi naqui'yaj cuu se-tucuanj Moisés yo' a.

<sup>8</sup> Dan me se quene'en ma'an Jesucristó se vaa guun rá nij so' danj, ne che'é dan cataj so':

—Me che'é nuchruj raá soj nana nanj ga.

<sup>9</sup> Tu'va rma'an 'unj se vaa navij cacun' xráá síi nihánj, rá soj a na'. Ca'vee cataj un ní' navij cacun' xráá síi nihánj na'. Ase ca'vee doj cataj ní' naxagaa so', ne nacue so' tuvée so', ne cachee so' cuaj, cataj ní' xa'.

<sup>10</sup> Dan me se me rá 'unj xcaj soj cuentá se vaa síi ca'née Diose nicaj yu'unj man yuvii mej ne no xcúún 'unj tinavii 'unj cacun' xráá nij yuvii man rihaan chumii nihánj adonj —taj Jesucristó rihaan nij so' a.

Dan me se cataj Jesucristó rihaan síi na'vee cachee a:

<sup>11</sup> —Rihaan so' sij na'vee cachee taj 'unj, ne nacue so' tuvée so', ne nan' so' tucua so' á —taj Jesucristó rihaan síi naj rihaan yuvée yo' a.

<sup>12</sup> Gaa ne naxagaa síi na'vee cachee yo', ne nacue so' tuvée so', gaa ne curihanj so' rá ve',

ni'yaj taran' nij yuvii man rá ve' a. Ndaa síj, gaa ne ca'anj rá nij yuvii, ne cataj nij yuvii se vaa sa' uxrá qui'yaj Diose, ne:

—Daj chihaa mij ne quene'en ní' suun danj a man adonj —taj nij yuvii yo' a.

*Nana nihánj taj xna'anj se vaa nacúún Jesucristó man Leví, ne canoco' Leví man so' a*

<sup>13</sup> Gaa ne curihanj uún Jesucristó, ca'anj so' tu'va na lacuaná, gaa ne ca'na' cunudanj nij yuvii rej vaj so', gaa ne tucu'yón so' man nij yuvii a.

<sup>14</sup> Veé danj vaj so', ne quene'en so' man síi cu'naj Leví ta'níi síi cu'naj Alfeo, ne dan me se ne so' 'o ve' a'néj nii puextó, ne a'néj so' puextó man yuvii a. Gaa ne cataj Jesucristó rihaan so', ne:

—Canocó' so' manj, ca'anj ní' á —taj Jesucristó rihaan so' a.

Gaa ne naxumaan so', ne canoco' so' man Jesucristó, ca'anj so' a.

*Nana nihánj taj xna'anj se vaa me rá Jesucristó racúj so' man nij síi tumé cacun' a*

<sup>15</sup> Dan me se 'o güii yáan Jesucristó rá ve' tucua síi cu'naj Leví yo', ne ca'na' ndo'o tuvi' so' síi a'néj puextó do', yo'ó nij síi tumé ndo'o cacun' do', ne catúj nij so' rá ve', ne ca'anj cayáan nij so' ga Jesucristó, ne dan me se man rcua'aan nij síi tucu'yón se-nana Jesucristó do', ne chá cunudanj nij so' chraa a. 'O se que'ee ndo'o nij síi tumé cacun' yo' me canoco' se-nana Jesucristó a.

<sup>16</sup> Gaa ne nij síi fariseo naquiyaj cuu se-tucuanj Moisés rihaan yuvii ro', quene'en nij so' se vaa chá Jesucristó chraa do', co'o Jesucristó do', ga nij síi a'néj puextó do', ga yo'ó nij síi tumé ndo'o cacun'

do', gaa ne cataj nij so' rihaan nij sí tucu'yón se-nana Jesucristó, ne:

—Me che'é chá sí nihánj chraa ne co'o so' na ga nij sí a'néj puextó do', ga yo'ó nij sí tumé cacun' do', ga —taj nij so', xná'anj nij so' man nij sí tucu'yón se-nana Jesucristó a.

<sup>17</sup> Ne cuno Jesucristó nana ca'mii nij so', gaa ne cataj so' rihaan nij so' a:

—Sí vaa nucuaj ro', ne nano' nij so' man doctor ma'. Maan sí ran' ro', me sí nano' man doctor adonj. Gaa ne ase vaa sí ran' ro', danj vaa nij sí nihánj adonj. Ne ca'na' 'unj canacunj 'unj man sí sa' ma'. Che'é nij sí tumé cacun' ca'naj se vaa canoco' nij so' se-nanaj adonj. Tzaj ne sese sí sa' me soj, rá soj, ne nuveé sij canacunj 'unj man me soj ma' —taj Jesucristó rihaan nij so' a.

*Nana nihánj taj xna'anj me che'é ne toco' nij sí tucu'yón se-nana Jesucristó x'naa man ma'an nij so' a*

<sup>18</sup> Ne dan me se toco' nij sí tucu'yón se-nana Juan do', nij sí fariseo do', x'naa man ma'an nij so', ne ca'na' nij so' rihaan Jesucristó, ne xná'anj nij so' man Jesucristó, cataj nij so':

—Me che'é, ne toco' núj sij tucu'yón se-nana Juan do', sij tucu'yón se-nana nij sí fariseo do', x'naa man ma'an núj che'é se aráj guee núj rihaan Dios, tzaj ne nij sí tucu'yón se-nana so' me se ne toco' nij so' x'naa man ma'an nij so' ga —taj nij so', xná'anj nij so' man Jesucristó a.

<sup>19</sup> Gaa ne cataj Jesucristó rihaan nij so' a:

—Ase vaa sí cuchruj sa'anj vaa 'unj, ne asa' ca'vee toco' nij sí man gaj x'naa man ma'an nij so',

rá soj gā. Ase vaa síí cataj xcaj man chana ne man tuvi' so' do', danj vaa nij síí man nihánj cuano, ne anuû ndo'o cha'anj man nij so', ne se ca'vee toco' nij so' x'naa man ma'an nij so' cuano ma'.

<sup>20</sup> Tzaj ne vaa güii, ne guun yaníj 'unj rihaan nij so', qui'yaj yuvií, gaa ne nano rá nij síí nihánj, gaa ne toco' nij so' x'naa man ma'an nij so' adonj.

*Nana nihánj taj xna'anj se vaa nij síí noco' tucuaán nga ro', se guun nucuaj nij so' cunō nij so' se-nana Jesucristó ma'*

<sup>21</sup> "Tzaj ne ase vaa yatzíj sin' vaa tucuaán nga noco' soj, ne se guun na'nej ní' mantá naca man yatzíj nga yo' ma'. 'O se sese qui'yaj ní' danj, ne güii quinanj yuvií yatzíj yo', gaa ne nagüej mantá naca yo', ne sese cuxuun yuvií man yatzíj yo', ne quisin' yo', gaa ne cunuū xij doj yu'uj taj man yatzíj nga yo' nanj adonj.

<sup>22</sup> Ne dan me se ase vaa nuj nga nuj araa nii na vinó vaa uún soj ei. Ne se ca'vee tucu'yón 'unj se-tucuanj 'unj rihaan soj ma'. 'O se ase vaa na vinó naca vaa nana tucu'yón 'unj, ne se guun caraa yuvií na vinó naca rque nuj nga ma'. Sese danj qui'yaj yuvií, ne cuyanj na vinó cunuū xee na vinó, ne se cacua nuj nga ma'. Che'é dan canuū yo', ne cayanj na vinó rihaan yo'óó a. Che'é dan araa nii na vinó naca rque nuj naca, ne 'o mán sa' na vinó rque nuj yo' a. Che'é dan inanj rihaan síí naca síí ne noco' tucuaán nga tucu'yón 'unj se-nanaj nanj adonj —taj Jesucristó rihaan nij síí tucu'yón se-nana síí cu'naj Juan do', rihaan nij síí tucu'yón se-nana nij síí fariseo do' a.

*Nana nihánj taj xna'anj che'é güii naránj rá ní' a*

<sup>23</sup> 'O güii naránj rá nij yuvīi israelitá cachén Jesucristó gā nij síi tucu'yón se-nānā so' rque 'o naa 'núú trigó, nē guun che'e nij síi tucu'yón se-nānā so' vaj nij so' nē cuta nij so' doj caa trigó a.

<sup>24</sup> Gaa nē cataj nij síi fariseo rihaan Jesucristó a:  
—Ni'yaj so' ei. Me che'é 'yaj nij síi tucu'yón se-nānā so' danj gā. Ne nó xcúún ní' qui'yaj ní' danj güii naránj rá ma' —taj nij síi fariseo rihaan Jesucristó a.

<sup>25</sup> Gaa nē cataj Jesucristó rihaan nij so' a:  
—Me che'é, nē ne nayaa soj rihaan danj Diose daj qui'yaj síi cu'naj David gaa naá a. Gaa quina'aan rque nij tuvi' nij so',

<sup>26</sup> gaa nē catúj so' rá nuvīi gaa cayáán síi cu'naj Abiatar xrej atā suun nocoo doj, nē chá so' rachrúún taj rihaan se-mesa Diose a. Nē ne nó xcúún so' chá so' rachrúún yo', maan orún' nij xrej nó xcúún chá rachrúún yo' a. Nē go' uún síi cu'naj David yo' chá nij tuvi' so' uún a. Tzaj nē ne cataj Diose se vaa tumé síi cu'naj David cacun' ma' —taj Jesucristó rihaan nij síi fariseo,

<sup>27</sup> gaa nē cataj uún so' rihaan nij síi fariseo a—  
Maan che'é rej ca'vee cavii sa' nij yuvīi me cuchruj Diose güii naránj rá nanj á. Nuveé che'e rej cataj nij yuvīi suun navij rá güii naránj rá me qui'yaj Diose man nij yuvīi a ma'.

<sup>28</sup> Che'é dan me, 'unj sij ca'née Diose nicaj yu'unj man yuvīi ro', nō xcúnj quirii ta'ngaj daj qui'yaj yuvīi güii naránj rá nanj adonj —taj Jesucristó rihaan nij síi fariseo a.

*Nana nihánj taj xna'anj se vaa nahuun sa' 'o síi nacoq ra'a, qui'yaj Jesucristó a*

<sup>1</sup> Gaa ne natúj Jesucristó rá ve' tucu'yón nij síi israelitá se-tucuanj Moisés, ne dan me se yáán 'o snó'o nacoq ra'a rá ve' yo' a.

<sup>2</sup> Ne nij síi fariseo me se yáán nij so' rá ve' yo', ne tumé uxrá nij so' man Jesucristó sese nahuun yuvij qui'yaj so' gaa güii naránj rá nij yuvij israelitá a. Danj qui'yaj nij so' che'é rej guun rá nij so' cuta' nij so' cacun' xráá Jesucristó a.

<sup>3</sup> Gaa ne cataj Jesucristó rihaan síi nacoq ra'a a:  
—Naxumaan so' canicun' cayá so' sca'núj núj á —taj Jesucristó rihaan so' a.

<sup>4</sup> Gaa ne xná'anj Jesucristó man nij síi fariseo yo', cataj so', ne:

—No xcúún ní' racuíj ní' man tuvi' ní' güii naránj rá ní' na', ase no xcúún ní' qui'yaj chi'ii ní' man tuvi' ní' xa'. Daj qui'yaj ní' rá soj gaa güii naránj rá ní' ga. Ne nó xcúún ní' tjananii ní' man tuvi' ní' rihaan sayuun gaa güii naránj rá gaa a na'. Ni'yaj uun ní' cavi' so' gaa güii naránj rá gaa a na'. —Danj taj Jesucristó rihaan nij so' a.

Tzaj ne dínj tu'va nij so' a.

<sup>5</sup> Gaa ne ca'maan rá Jesucristó, ne ni'yaj so' man nij síi fariseo yo' a. 'O se nanó ndo'o rá so' che'é nij so' se vaa síi nichraj ndo'o nimán me nij so' a.

Gaa ne cataj Jesucristó rihaan síi nacoq ra'a yo' a:

—Tucúa so' ra'á so' á —taj Jesucristó rihaan so' a.

Ne tucúa so' ra'a so', ne cunuu sa' ra'a so' nanj adonj.

6 Gaa ne curihanj nij sí fariseo yo', ne cunuu chre' nij so' ga nij sí noco' man sí cu'naj Herodes, ne ca'anj nij so' rej yaníj, ne guun rá taran' nij so' daj gaa qui'yaj nij so' ne caví' Jesucristó a.

*Nana nihánj taj xna'anj se vaa xcaj ndo'o nij yuvii cuentá se vaa sí 'yaj nahuun sa' yuvii me Jesucristó a*

7 Gaa ne cavii Jesucristó ga nij sí tucu'yón se-nana so' rej yo', ne ca'anj so' tu'va na lacuaná a. Ne canoco' uxrá yuvii man so' a. Dan me se sí man estadó Galilea do',

8 sí man estadó Judea do', sí man chuman' Jerusalén do', sí man estadó Idumea do', sí man rej rnej chráá cu'naj Jordán do', sí man chuman' Tiro do', sí man chuman' Sidón do', cuno nij so' nana daj qui'yaj Jesucristó che'é nij sí ran', ne che'é dan ca'na' ndo'o nij so' rihaan Jesucristó a.

9 Gaa ne cataj Jesucristó rihaan nij sí tucu'yón se-nana so' se vaa qui'yaj chuvii nij so' 'o rihoo chéé rihaan na catuu so', gaa ne se gaa nanj curu'maan nij yuvii man so', taj so' a.

10 'Q se nahuun sa' uxrá yuvii, qui'yaj Jesucristó, ndaa síj, gaa ne taran' nij sí ran' ro', canoco' uxrá nij so' man Jesucristó che'é rej ca'vee cano ra'a nij so' man so' gaa ne nahuun sa' nij so', rá nij so' a.

11 Ne nij sí nuu nana chree nimán ro', gaa quene'en nij so' man Jesucristó, ne ca'anj quinaj nij so' rihaan yo'óo tacóo Jesucristó, ne cataj nij nana chree se vaa:

—So' me ta'níi Diose ya adonj —taj nij nana chree rihaan Jesucristó a.

12 Gaa ne ca'ne' ndo'o Jesucristó suun rihaan nij nana chree se vaa se guun nata' nij so' rihaan nij yuvij che'é so' a.

*Nana nihánj taj xna'anj se vaa quinarii Jesucristó chujij sí ca'anj nata' se-nana so' a*

13 Gaa ne cavii Jesucristó xraá quij, ne canacúun so' man nij sí me rá so' ca'na' rihaan so', gaa ne cavii nij so', ne cuchi' nij so' rihaan Jesucristó a.

14 Gaa ne quinarii Jesucristó man chujij nij so' se vaa guun nij so' apóstol nata' rihaan yuvij che'é so' a. 'O se guun rá so' se vaa cachee chujij nij so' ga so', ne guun rá so' ca'nej so' man chujij nij so' ca'mii natáj nij so' rihaan nij yuvij a.

15 Ne guun rá so' nago' so' suun uun chij ra'a nij so' che'é rej ca'vee nahuun sa' nij sí ran' ne quirii nij so' man nij nana chree nimán nij yuvij a.

16 Dan me se cune' Jesucristó man sí cu'naj Simón, ne tucu'náj so' Pedró man Simón a.

17 Ne cune' so' man sí cu'naj Jacobo ta'níí sí cu'naj Zebedeo, ne cune' so' man tinúú Jacobo sí cu'naj Juan, ne tucu'náj so' Boanerges man roj so', ne nana “Boanerges” ro', taj se vaa ase vaa ta'níí ya'anj tu'vii vaa roj so' a.

18 Ne cune' so' man sí cu'naj Andrés do', man sí cu'naj Felipé do', man sí cu'naj Bartolomé do', man sí cu'naj Mateo do', man sí cu'naj Tomás do', man sí cu'naj Jacobo ta'níí sí cu'naj Alfeo do', man sí cu'naj Tadeo do' a. Ne cune' so' man yo'ó sí cu'naj Simón, ne tuvi' nij sí me rá cunu' ga gobiernó man Romá me so' a.



19 Ne cune' Jesucristó man síi cu'naj Judas Iscariote, ne so' me síi tacuachén man Jesucristó rihaan nij síi taj ri'yunj man Jesucristó a.

*Nana nihánj taj xna'anj se vaa cuta' nij síi fariseo cacun' rmi' xráá Jesucristó se vaa ca'mii Jesucristó ga síi chree a*

Gaa ne catúj Jesucristó rá ve' a.

20 Gaa ne cunuu chre' ndo'o uún nij yuvii rihaan so', ne dan me se guun chruj ndo'o rihaan Jesucristó ga nij síi tucu'yón se-nana so', qui'yaj nij yuvii, ne ndaa ne gaa ya'núj rihaan Jesucristó ga nij síi tucu'yón se-nana so' cha nij so' chraa, qui'yaj nij yuvii a.

21 Gaa ne cuchi' nana rihaan nij tuvi' Jesucristó daj ran' so' 'yaj nij yuvii, ne che'é dan ca'anj nij tuvi' Jesucristó quita'aa nij so' man Jesucristó a. 'O se guun rá nij tuvi' Jesucristó se vaa guun snuj Jesucristó a.

22 Gaa ne nij síi naqui'yaj cuu se-tucuanj Moisés síi cavii chuman' Jerusalén ro', cataj nij so' se vaa síi chree uun chij síi cu'naj Beelzebú nuû nimán Jesucristó, ne che'é dan guun nucuaj Jesucristó quirii Jesucristó nana chree nimán yuvii qui'yaj síi chree uun chij yo', taj nij síi naqui'yaj cuu se-tucuanj Moisés yo' a.

23 Gaa ne canacúun Jesucristó man nij síi naqui'yaj cuu se-tucuanj Moisés, ne nanó so' doj cuentó rihaan nij so', ne dan me se cataj so', ne:

—Asa' ca'vee quirii síi chree síi cu'naj Satanás man ma'an tuvi' so' nana chree nimán nij yuvii, rá nij soj ga. Daj chihaa míj se ca'vee qui'yaj so' danj a man adonj.

24 Ne'en soj se vaa sese vaa 'o nación, ne sese xra' ta'aj nij sí uun chij rihaan nación yo' ne cunu' ma'an nij so' ga tuvi' nij so', ne vaa güii, ne nu' nación yo' quirí' nu' nanj adonj.

25 Ne sese unu' ta'aj nij yuvií man 'o barrió ga tuvi' yuvií sí man ma'an barrió yo', ne vaa güii, ne quirí' nu' barrió yo', qui'yaj nij so' nanj adonj.

26 Che'é dan me sese unu' sí chree sí cu'naj Satanás ga tuvi' ma'an so', ne sese racuíj sí chree mán 'unj quiríi 'unj nana chree nimán nij yuvií, ne se ca'vee guun chij sí chree yo' sese navij tuvi' so' ma'. Maan se quirí' nu' so' nanj adonj.

27 "Ne sese me rá yo'o so' catuu so' rá ve' tucúa sí ru'vee qui'yaj ituu so' si'yaj sí ru'vee yo', ne asino numíj so' man sí ru'vee yo', gaa ne canicaj so' catzij so' tucúa sí ru'vee yo' ei. Ne ase vaa 'yaj sí atúj tucúa sí ru'vee ro', danj 'yáj man sí chree yo' chuguanj. Dan me se numíj 'unj man so', ne cuano nihánj a'néj 'unj man nu' nij sí 'nij ra'a so' adonj.

28 "Cataj xna'anj yá yá 'unj rihaan soj cuano se vaa nu' cacun' tumé yuvií do', me ma'an nana chilíi ca'mii yuvií do', ca'vee tinavij Diose cacun' yo' che'é nij yuvií a.

29 Tzaj ne sese nachri' yo'o so' ni'yaj so' man Nimán Diose, ne daj chihaa míj se quinavij cacun' yo' xráa so' a ma'. Tananj quitaj cacun' yo' xráa so' nu' cavii nu' ca'anj nanj adonj.

30 —Danj cataj Jesucristó rihaan nij sí naqui'yaj cuu se-tucuanj Moisés, che'é se aj cataj nij so' se vaa nana chree nuú nimán so' a.

*Nana nihánj taj xna'anj se vaa ase vaa nii Jesu-*

*crístó dɔ', ase vaa tinúú Jesucristó dɔ', ase vaa ra'vij  
Jesucristó dɔ', vaa nij síi uno rihaan Diose a*

<sup>31</sup> Gaa ne ca'na' nii Jesucristó dɔ', tinúú Jesucristó dɔ', ne nicun' nij so' xe' rihaan ve' nuu Jesucristó, ne ca'née nij so' nana rihaan Jesucristó se vaa curihanj so' ca'na' so' rej nicun' nij so' a.

<sup>32</sup> Ne yáán ndo'o yuvij nu' anicaj rej ne Jesucristó, ne cataj nii rihaan Jesucristó a:

—Nicun' níi so' nicun' tinúú so' nicun' xe', ne me rá nij so' quene'en nij so' mán so', Jesús —taj nii rihaan Jesucristó a.

<sup>33</sup> Gaa ne cataj Jesucristó rihaan nij síi nata' rihaan so' se vaa:

—Me chana me níi 'unj, rá soj ga. Me síi me tinúú 'unj, rá soj ga —taj Jesucristó rihaan nij so' a.

<sup>34</sup> Gaa ne ni'yaj Jesucristó man nij síi yanj nu' anicaj rej ne so', ne cataj so' a:

—Ni'yaj soj ei. Ase vaa níi 'unj dɔ', ase vaa tinúú 'unj dɔ', vaa nij síi nihánj adonj.

<sup>35</sup> Yuvij uno rihaan Diose ro', ase vaa tinúú 'unj dɔ', ase vaa ra'vij 'unj dɔ', ase vaa níi 'unj dɔ', vaa nij so' adonj —taj Jesucristó a.

## 4

*Nihánj me cuentó nanó Jesucristó che'é 'núú  
trigó tix'nuu yo'o so' a*

<sup>1</sup> Gaa ne ca'anj Jesucristó tu'va na lacuaná, ne guun che'e so' tucu'yón so' se-nana so' rihaan yuvij tu'va na lacuaná a. Ne dan me se ca'na' ndo'o yuvij rihaan so', ne che'é dan cavii so' rque 'o rihoo chée rihaan na, ne ca'anj cane so' rque

rihoo yo', ne canicun' nij yuvij rihaan yo'óo tu'va na lacuaná yo' a.

<sup>2</sup> Gaa ne tucu'yón so' man nij yuvij, nanó ndo'lo so' cuentó rihaan nij yuvij, ne dan me se cataj so' rihaan nij yuvij a:

<sup>3</sup> —Cunq soj ca'mij á. Dan me se curihañj 'o sí me rá cuchruj naa 'núú trigó, ne tix'nuu so' 'núú trigó yo' rihaan yo'óo,

<sup>4</sup> ne cayuu doj 'núú trigó yo' rá chrej chée yuvij, ne ca'na' xtâj chá xtâj man 'núú trigó naj rá chrej yo', ne dan me se navij nu' 'núú trigó yo', qui'yaj nij xtâj nanj adonj.

<sup>5</sup> Ne yo'ó ta'aj 'núú trigó yo' ro', cayuu rihaan yuvej rej taj catun' yo'óo a. Che'é dan cuaj xra' stanj le'ej a.

<sup>6</sup> Veé dan, ne quisíj güii, ne cuchrii naa le'ej, qui'yaj naán, che'é se ne ca'vee ca'anj nij yáa naa le'ej yo' a man adonj.

<sup>7</sup> Ne yo'ó ta'aj 'núú trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naa le'ej, ne quinavij nu' naa le'ej, qui'yaj coj tanj yo', ne ne cavij sa' naa yo' a man adonj.

<sup>8</sup> Ne yo'ó ta'aj 'núú trigó yo' ro', cayuu rihaan yo'óo sa', ne naa yo' ro', cachij sa' a. Dan me se rihaan ta'aj yo'óo sa' yo' ico chij ya 'núú cavii, qui'yaj 'o 'o 'núú le'ej nii quiniñ rihaan yo'óo sa' yo', ne rihaan yo'ó ta'aj yo'óo sa' yo' va'núj chihaa ya 'núú cavii, qui'yaj 'o 'o 'núú le'ej nii quiniñ rihaan yo'óo sa' yo', ne rihaan yo'ó ta'aj yo'óo sa' yo' cientó ya 'núú trigó cavii, qui'yaj 'o 'o 'núú le'ej nii cayuu rihaan yo'óo sa' yo' uún nanj adonj —taj Jesucristó,

<sup>9</sup> gaa ne cataj uún so'— Sese taj yu'uj xrée soj, ne cunó soj nana nihánj ei. —Veé danj quisíj cuentó yo' cuentó nanó Jesucristó a.

*Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvij a*

<sup>10</sup> Gaa ne gaa guun yaníj so' rihaan nij yuvij, ne nij sí chée ga so' do', chuvij nij apóstol cune' so' man nata' rihaan yuvij che'é so' do', xná'anj nij so' man so' che'é nij cuentó nanó so' rihaan nij yuvij a.

<sup>11</sup> Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose gaa guun chij Diose rihaan chumij nihánj adonj. Dan me se nana ne ne'en cunudanj yuvij me nana yo' nana tihaan Diose rihaan soj adonj. Ne rihaan yo'ó nij yuvij man rihaan chumij me se inanjanj cuentó che'é nij rasuun nanaj rihaan nij yuvij,

<sup>12</sup> gaa ne ni'yaj nij so' do', nano xrej nij so' do', tzaj ne se quene'en nij so' do', se xcaj nij so' cuentá do', a ma'. 'O se na'vej uxrá rá nij so' canicaj nimán nij so' ne güej cacun' xráá nij so' a man adonj —taj Jesucristó rihaan nij so' a.

*Nana nihánj taj xna'anj me taj cuentó che'é 'núú trigó yo' a*

<sup>13</sup> Gaa ne cataj uún Jesucristó rihaan nij so' a:

—Ne ne ne'en soj me taj cuentó nihánj cuentó che'é 'núú trigó tix'nuu yo'o so' na'. Ne asa' ca'vee xcaj soj cuentá che'é yo'ó nij cuentó, rá soj ga.

<sup>14</sup> ”Dan me se sí tix'nuu 'núú trigó ro', so' me sí nata' se-nana Diose rihaan yuvij adonj.

15 Ne ase vaa 'núú cayuu rá chrej qui'yaj síí tix'nuu 'núú ro', danj vaa ta'aj nij síí uno se-nana Diose, ne dan me se uno nij so' doj tzin', tzaj ne nu' cuno nij so', ne nu' 'na' síí chree síí cu'naj Satanás, ne a'néj síí chree se-nana Diose nana cayuu rque nimán nij so' a.

16 "Ne vaa ta'aj 'núú trigó cayuu rihaan yuvej uún, ne 'núú trigó yo' ro', ase vaa nij síí uno se-nana Diose vaa yo', ne cuaj uun niha' rá nij so' canoco' nij so' nana yo' a.

17 Tzaj ne ataa xcaj sa' nij so' cuentá, ne gaa uun che'e yuvii 'yaj yuvii sayuun man nij so' che'é nana noco' nij so', ne cuaj nu' uun na'aj nij so', ne tanáj nij so' nana yo' cuaj nanj adonj.

18 "Ne ase vaa nij 'núú trigó cayuu sca'núj coj tanj ro', danj vaa yo'ó ta'aj nij yuvii uún, ne dan me se uno nij so' se-nana Diose,

19 tzaj ne nanó ndo'o rá nij so' che'é se man rihaan chumii nihánj, ne me ndo'o rá nij so' qui'yaj canaán nij so' sa'anj, don tiha' yu'unj nij so' man ma'an nij so' che'é sa'anj, ne me ma'an yo'ó nij rasuun nano' ndo'o nij so', ne che'é dan tanáj xco nij so' se-nana Diose, ne ne 'yaj nij so' se sa' a ma'.

20 "Ne 'núú trigó cayuu rihaan yo'óo sa' ro', ase vaa síí uno se-nana Diose vaa yo', ne uun niha' rá so' uno so' nana yo', ne nuu sa' nimán so' rihaan Diose a. Ne sa' doj tzin' 'yaj ta'aj nij so', ne sa' doj 'yaj yo'ó ta'aj nij so', ne sa' uxrá doj 'yaj yo'ó ta'aj nij so' uún nanj adonj. —Veé danj quisíj nana ca'mii Jesucristó che'é cuentó yo' a.

*Nihánj me cuentó nanó Jesucristó che'é aga' ya'ana*

21 Gaa ne cataj Jesucristó rihaan nij so' a:

—Ne gaa rmi' me se achrón nii ya'an raā aga' ya'an, ne axrīj yuve nii aga' ya'an yo' rque 'o chrúún do', rque yuvéé do', rá soj na'. Taj ma'. Sese rmi', ne uta' nii aga' yo' rej xta', gaa ne cuchuguun sa' ndo'o adonj.

22 Dan me se a 'ó rasuun caxrīj yuve yuvi se qui'nij yuve ma'. Ya nurihanj yo' vaa güii, ne cunudanj yuvi quene'en, vaa güii adonj. Ne cunudanj rasuun 'yaj yuve yuvi quene'en daj a yuvi vaa güii ei.

23 Sese taj yu'uj xrée soj, ne cunō soj nana nihánj ei —taj Jesucristó rihaan nij so',

24 gaa ne cataj uún so' se vaa— Nuchruj raā soj nana ca'mij nihánj ei. Sese qui'yaj suun uxrá soj nari' soj nana nihánj, ne rque ndo'o Diose doj nana nari' uún soj nanj adonj.

25 'O se sí nari' nana ro', doj a nari' uún so', qui'yaj Diose nanj adonj. Ne sí na'vej rá nari' sa' nana ro', tananj ca'nee Diose doj nij nana nari' so' man so', ne quinaj uun so' nanj adonj —taj Jesucristó rihaan nij so' a.

### *Nihánj me cuentó nanó Jesucristó che'é naa a*

26 Gaa ne cataj Jesucristó:

—Dan me se ase vaa achij naā cuchruj 'o snó'o ro', danj gaa guun chij Diose rihaan chumii nihánj, ne snó'o yo' ro', cunô so' 'núú rihaan yo'óó,

27 ne sj cunô so', ne otoj so' rej nii, ne naxagaa so', ne danj 'yaj so' daj a güii, ne dan me se xra' naā le'ej, ne achij naā le'ej, ne ne ne'en uxrá snó'o me che'é me xra' naā ne achij naā a ma'.

28 Achij ma'an naa rihaan yo'óó, ne dan me se asino yaan xra' naa, gaa ne anó tihaj, gaa ne uun xíj yumíi naa a.

29 Gaa ne gaa quisíj tan' xráá naa, ne a'néé snó'o man nij síi quirii naa nanj á. 'O se quisíj tíó quirii nii naa nanj adonj —taj Jesucristó a.

*Nihánj me cuentó nanó Jesucristó che'é caân cuêj mostazá xlá a*

30 Gaa ne cataj uún Jesucristó:

—Daj gaa guun chij Diose rihaan chumii nihánj, rá soj ga.

31 Dan me se ase vaa achij caân cuêj mostazá xlá ro', danj gaa guun chij Diose rihaan chumii nihánj adonj. Dan me se axríj nii caân yo' rihaan yo'óó, ne caân yo' me se caân le'ej nii doj vaa caân yo' rihaan cunudanj nij caân man rihaan chumii nihánj,

32 tzaj ne dan me se gaa axríj nii caân yo' rihaan yo'óó, ne achij caân yo', ne xij doj uun yo' rihaan cunudanj nij coj man tacaan, ne xcaan ndo'o vaa ra'a cuêj yo', ne a'vee 'yaj nij xtáj vaj rej xta' saca' nij xo' raá cuêj yo', ne aráán cachun' xráá nij xo', 'yaj cuêj mostazá xlá yo' nanj adonj —taj Jesucristó a.

*Nana nihánj taj xna'anj se vaa inanj cuentó nanó Jesucristó rihaan nij yuvii a*

33 Dan me se que'ee cuentó vaa danj cuentó che'é nij rasuun nanó Jesucristó rihaan nij yuvii, nata' so' se-nana Diose rihaan nij yuvii, ndaa vaa guun nucuaj nij yuvii cunó nij yuvii a.

34 Taj vaj yo'ó nana nanó Jesucristó rihaan nij yuvii a ma'. Maan inanj cuentó che'é nij



rasuun nanó Jesucristó rihaan nij so', tzaj ne rihaan ma'an nij síi tucu'yón se-nana so' me se ataj xna'anj so' che'é nij cuentó yo' rihaan nij so' a.

*Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a*

<sup>35</sup> Gaa ne rej ti'nuu güii yo' me se cataj Jesucristó rihaan nij síi tucu'yón se-nana so', ne:

—Ca'anj ní' ndaa yo'ó níchrej tu'va na lacuaná á —taj so' rihaan nij so' a.

<sup>36</sup> Gaa ne nij síi tucu'yón se-nana Jesucristó me se ca'anj rihoo nuu nij so' ga Jesucristó, qui'yaj nij so', ne quináj nij yuvi tu'va na lacuaná, ne vaa doj nij rihoo canoco' xcó nij so' a.

<sup>37</sup> Gaa ne cavii uxrá nana yuva rihaan na lacuaná, ne quinaan ndo'o rihaan na, ne catúj uxrá na rque rihoo yo', ne daj doj caraa nu' rque rihoo, qui'yaj na a.

<sup>38</sup> Ne Jesucristó me se naj so' rej sihuu rihoo, ne 'nij raá so' camá, otoj so' a. Gaa ne narii nij síi tucu'yón se-nana Jesucristó nej rihaan Jesucristó, ne cataj nij so':

—Nihánj me se daj doj caví' ní', maestro, ne me che'é ne rihuun rá so' ga —taj nij so' rihaan Jesucristó a.

<sup>39</sup> Gaa ne canicun' caya Jesucristó, ne caxrír yuva so' man nana, ne cataj so' rihaan na lacuaná:

—Gaa dínj rihaan so', ne se quinaán so' ma' —taj so', gaa ne nu' canicun' nana, ne canicun' dínj rihaan na lacuaná yo', qui'yaj Jesucristó nanj adonj.

<sup>40</sup> Gaa ne cataj Jesucristó rihaan nij sí tucu'yón se-nanā so' a:

—Me che'é chu'vi' ndo'o nimán soj ga. Ataa cuchuman sa' rá soj ni'yaj soj manj na' —taj so' rihaan nij so' a.

<sup>41</sup> Gaa ne cuchu'vi' ndo'o nij so', ne xná'anj nij so' man tuvi' nij so', cataj nij so':

—Daj sij me sí nihánj ga. Ndaa nana do', ndaa na do', uno a'mii so' ason —taj nij so' rihaan tuvi' nij so' a.

## 5

*Nana nihánj taj xna'anj se vaa quirii Jesucristó man nij nana chree nimán 'o snó'o a*

<sup>1</sup> Gaa ne ca'anj nij so' ndaa níchrej tu'va na lacuaná yo', ndaa rej ne nij sí man chuman' Gadara a.

<sup>2</sup> Ne rej yo' me se taj yu'uj yuvej rej achin' nii xngá a. Dan me se nanij Jesucristó ga nij sí tucu'yón se-nanā so' rque rihoo, ne nu' curihanj 'o snó'o nuu nana chree nimán rque yu'uj yuvej yo', ne cuchí' so' rihaan Jesucristó a.

<sup>3</sup> Ne sí nuu nana chree nimán me se cu'yón so' cayáán so' rque yu'uj yuvej yo', ne ne ca'vee numíj nij yuvií man rej yo' aga' ne' man so' a.

<sup>4</sup> O se aj uun que'ee ndo'o numíj nij yuvií ne' do', aga' ne' do', man so', tzaj ne cuxra' so' aga' ne', ne ca'ne' so' ne' do', ne a 'o yuvií taj quisíj naqui'yaj camanj man so' a.

<sup>5</sup> Ne niganj me se nuvií nigan' cayáán so' rque nij yu'uj yuvej do', vaj so' xráá quij do', ne caguáj ndo'o so', ne nicaj so' yahij sihaa ca'ne' ndo'o so' nee man ma'an so' uún a.

<sup>6</sup> Dan me se gaa quene'en so' man Jesucristó se vaa gan' uxrá vaj Jesucristó, ne cunánj so' ndaa rej vaj Jesucristó, ne na'víj so' rihaan Jesucristó,

<sup>7</sup> ne nucuaj ndo'o caguáj so' rihaan Jesucristó, ne cataj so':

—Aj ne'én 'unj se vaa ta'nij Diose síj sa' ndo'o mé so', Jesús. Me che'é 'ná' so' rej né 'unj ga. Cataj xna'anj sa' 'unj rihaan so' ni'yaj Diose se vaa se qui'yáa so' sayuun manj ma' —taj síj nuu nana chree nimán rihaan Jesucristó a.

<sup>8</sup> Danj ca'mii so' rihaan Jesucristó che'é se aj cataj Jesucristó rihaan so' se vaa: “Rihaan so' nana chree nuu nimán síj nihánj cataj xna'anj 'unj se vaa curihanj so' nimán síj nihánj á”, taj Jesucristó, tzaj ne ne guun rá nana chree curihanj so' ma'.

<sup>9</sup> Gaa ne xná'anj Jesucristó man nana chree, ne cataj so':

—Daj cu'naj so' ga —taj Jesucristó rihaan so' a.

Ne:

—X'ne' nocoo ndo'o me núj, ne que'ee ndo'o núj á —taj nana chree rihaan Jesucristó,

<sup>10</sup> ne cachíin ni'yaj nij nana chree yo' rihaan Jesucristó se vaa se ca'née Jesucristó man nij nana chree ndaa yo'ó rej yaníj ma'.

<sup>11</sup> Dan me se rej tacaan rej nicun' nij so' me se chée 'o x'ne' nocoo xcáá, chá nij xo' coj,

<sup>12</sup> gaa ne cachíin ni'yaj nij nana chree rihaan Jesucristó, cataj nij so':

—Ca'nej so' man núj catuu núj nimán nij xcáá á —taj nij nana chree rihaan Jesucristó a.

<sup>13</sup> Gaa ne ca'vej rá Jesucristó qui'yaj nij so' danj, gaa ne curihanj nij so' nimán snó'o yo', gaa ne catúj nij so' nimán nij xcáá, ne dan me se ruvaa uxrá

tacaan nicun' tu'va na lacuaná rej vaj nij xcáá yo', ne gaa catúj nij nana chree yo' nimán nij xcáá yo', gaa ne cunánj ndo'o nij xo', ca'anj nij xo', ne veé danj vaj nij xo', ne quiniy nij xo' rque na, ne canó xráá nij xo' nanj adonj. Ne dan me se vij míj xcáá me nij xcáá canó xráá rque na a.

14 "Ne nij sí tumé nij xcáá ro', cunánj nij so' ca'anj cataj xna'anj nij so' rihaan nij yuvii man chuman' do', rihaan nij yuvii man tacaan do' a. Gaa ne dan me se ca'na' ni'yaj nij yuvii se vaa guun, gaa ne ca'na' nij so' rihaan Jesucristó,

15 gaa ne quene'en nij so' man sí curihanj nana chree nimán a. Aj nanuû so' sagan' so', ne díj ne so' rihaan Jesucristó a. Ne aj ti'inj se snúú so', ne nuu sa' so' a. Gaa ne cuhu'vi' ndo'o nij yuvii se vaa qui'yaj Jesucristó,

16 gaa ne cataj xna'anj nij sí quene'en yo' rihaan nij yuvii daj qui'yaj Jesucristó che'é sí nuu nana chree nimán do', ga nij xcáá do',

17 gaa ne guun che'e nij yuvii cachín ni'yaj nij yuvii rihaan Jesucristó se vaa curihanj so' rej yanj nij so' ca'anj so' rej yanj a.

18 "Che'é dan cavii Jesucristó rque rihoo chéé rihaan na, gaa ne dan me se cachín ni'yaj sí curihanj nana chree nimán rihaan Jesucristó se vaa ca'vej rá Jesucristó ca'anj so' ga Jesucristó a.

19 Tzaj ne ne ca'vej rá Jesucristó ca'anj so' ga Jesucristó a. Tananj cataj Jesucristó rihaan so' se vaa:

—Cavii so' nán' so' ve' tucúa so' rej yanj nij tuví' so', ne cataj xna'anj so' rihaan nij so' nu' se vaa qui'yaj sí 'nij ra'a man ní' che'é so', ne cataj so'

se vaa cunuu 'ee rá so' ni'yaj so' mán so' á —taj Jesucristó rihaan sí curihañj nana chree nimán a.

<sup>20</sup> Gaa ne ca'anj sí curihañj nana chree nimán, ne guun che'e so' ca'mii natáj so' rihaan nij yuviñ man rej cu'naj Chi' Chuman', ne cataj xna'anj so' nu' se vaa qui'yaj Jesucristó che'é so' a. Ne ca'anj ndo'o rá cunudañj nij yuviñ cuno se-nana so' a.

*Nana nihánj taj xna'anj che'é chala cunii do', che'é chanañ chij do', nahuun sa', qui'yaj Jesucristó a*

<sup>21</sup> Dan me se nuu Jesucristó rque rihoo chée rihaan na, ne ca'anj uún so' ndaa níchrej tu'va na lacuaná, gaa ne cunuu chre' ndo'o yuviñ rihaan so', ne vaj so' tu'va na lacuaná a.

<sup>22</sup> Gaa ne dan me se ca'na' yo'o nij sí 'nij ra'a ve' tucu'yón nij yuviñ israelitá se-tucuañj Moisés, ne Jairo cu'naj so' a. Dan me se quene'en sí cu'naj Jairo man Jesucristó, gaa ne canicun' ruj so' rihaan Jesucristó,

<sup>23</sup> gaa ne cachín ni'yaj uxrá so' rihaan Jesucristó, ne dan me se cataj so' se vaa:

—Ta'níj chala cunii ro', ran' ndo'o no', ne daj doj cavi' no', ne me rá 'unñ cuchí' so' ve' tucuañ, ne cuta' so' ra'á so' rañ no', ne nahuun sa' no', ne se cavi' no', qui'yáa so' ma' —taj sí cu'naj Jairo rihaan Jesucristó a.

<sup>24</sup> Gaa ne ca'anj Jesucristó ga so', ne canoco' uxrá yuviñ xcó roñ so', ne ndaa raan ma'an chrej vaj yuviñ gañ nij so' a.

<sup>25</sup> Dan me se sca'núñ nij so' vaj 'o chanañ ran' ndo'o, ne quisíj chuvij ya yo' xra' ton man no' a.

26 Ne aj quiran' ndo'o no' sayuun, qui'yaj que'ee nij doctor, ne aj cutun' no' cunudanj sa'anj vaa rihaan no', tzaj ne taj se qui'yá' a doj nahuun sa' no' qui'yaj nij doctor yo' a ma'. Tananj doj a ran' no' nanj adonj.

27 Gaa ne aj cuchí' nana rihaan no' che'é nu' se vaa qui'yaj Jesucristó che'é nij yuvii, ne che'é dan ca'na' no' sca'núj nij yuvii rej xco Jesucristó, gaa ne canó ra'a no' doj tu'va sagan' so' a.

28 'O se guun rá no' se vaa: “Sese cano ra'aj sagan' Jesucristó, ne nahuun sa' 'unj nanj adonj”, guun rá no' a.

29 Dan me se síj canó ra'a no' sagan' Jesucristó, gaa ne nu' canicun' ton man no' cuaj a. Ne quene'en no' se vaa nahuun sa' no', qui'yaj Jesucristó a.

30 Dan me se nu' canó ra'a no' sagan' Jesucristó, ne nu' xcaj Jesucristó cuentá se vaa nahuun yuvii qui'yaj so' a. Che'é dan canicaj so', ne xná'anj so', cataj so':

—Me sí canó ra'a sagan' 'unj ga —taj so' a.

31 Gaa ne cataj nij sí tucu'yón se-nana Jesucristó se vaa:

—Ne'én so' se vaa raan ndo'o vaj nij yuvii ga so', ne me che'é xná'anj so' me sí canó ra'a sagan' so' ga —taj nij so', xná'anj nij so' man Jesucristó a.

32 Gaa ne canicaj Jesucristó, ne quene'en so' man chana canó ra'a tu'va sagan' so' a.

33 Ne dan me se cuchu'vi' ndo'o no' ne ndaa ri'ij man no', ne aj ne'en no' se vaa nahuun sa' no' a. Gaa ne ca'anj no', ne canicun' ruj no' rihaan Jesucristó, ne cataj ya no' rihaan Jesucristó nu' se vaa qui'yaj no' a.

34 Gaa ne cataj Jesucristó rihaan no' a:

—Nahuún so' che'é se amán rá so' ni'yaj so' manj, nocoj. Ve'é ca'anj so', ne dínj gaa nimán so' ca'anj so' á. Gaa nucuáá so', ne aj x'néj nu' chi'ii yo' xráá so' nanj ei —taj Jesucristó rihaan chana yo' a.

35 Ataa navij ca'mii Jesucristó, ne ca'na' 'o síi cavii tucúa síi cu'naj Jairo, ne cataj so' rihaan Jairo a:

—Aj cavi' ta'níi so', ne taj che'é caraá chrúú so' rihaan maestró a ma' —taj síi 'na' cataj xna'anj rihaan Jairo a.

36 Dan me se cuno Jesucristó nana ca'mii síi ca'na', gaa ne cataj so' rihaan síi cu'naj Jairo a:

—Se cuchu'ví' so' ma'. Maan se cuchuman ya rá so' ni'yaj so' manj á —taj Jesucristó rihaan so' a.

37 Dan me se ne ca'vej rá Jesucristó canoco' a doj nij yuvij man so', ne maan Pedró do', Jacobo do', Juan tinúú Jacobo do', ca'vej so' canoco' man so' a.

38 Gaa ne cuchi' so' rihaan ve' tucúa Jairo, ne quene'en Jesucristó se vaa ta'vee uxrá nij yuvij man rá ve' a.

39 Gaa ne catúj Jesucristó rá ve', ne cataj so' rihaan nij yuvij a:

—Me che'é ta'vee ndo'o nij soj ga. Ne cavi' chala cunii nihánj ma'. Maan se otoj uun no' nanj á —taj Jesucristó rihaan nij so' a.

40 Gaa ne ca'nga' nacoj nij yuvij ni'yaj nij yuvij man Jesucristó a. Tzaj ne quirii Jesucristó man cunudanj nij yuvij xe', gaa ne nicaj so' man rej chala cunii do', man nii chala cunii do', man va'nuj nij síi ca'na' ga so' do', ne catúj so' rá cuarto naj chala cunii yo' a.

<sup>41</sup> Gaa ne quita'aa Jesucristó ra'a chala cunii, ne cataj so' rihaan chala cunii yo' a:

—Talita, cumi —taj so' rihaan no' xna'ánj a'mii ma'an so' a. Ne se-nana so' taj: “Naxagaa so', chala cunii”, taj nana ca'mii Jesucristó rihaan chala cunii yo' a.

<sup>42</sup> Nu' ca'mii Jesucristó nana dan, ne nu' naxagaa chala cunii yo', chée no' cuaj a. Nahuun i'na' no' a.

Ne chala cunii vaj chuvij yo' me no' a.

Ne nij síi quene'en, tzaj ne ca'anj ndo'o rá nij so' a.

<sup>43</sup> Gaa ne ca'ne' uxrá Jesucristó suun rihaan nij so' a:

—A'ó yuvij se cataj xna'anj nij soj rihaan daj qui'yáj che'é chala cunii ma' —taj Jesucristó rihaan nij so', ne cataj so' se vaa rque nii doj se chá cha no' a.

## 6

*Nana nihánj taj xna'anj se vaa ne ca'vej rá nij síi man chiháán Jesucristó chuman' cu'naj Nazaret cuno nij so' nana ca'mii Jesucristó a*

<sup>1</sup> Gaa ne curihanj Jesucristó ve' yo', gaa ne namán so' rej chiháán so', ne canoco' nij síi tucu'yón se-nana so' man so' a.

<sup>2</sup> Ne güii naránj rá nij yuvij israelitá me se ca'anj so' ve' tucu'yón nij síi man chiháán so' se-tucuanj Moisés, ne guun che'e so' tucu'yón so' man nij síi man rá ve' yo' a. Ne ca'anj ndo'o rá nij yuvij gaa cuno nij yuvij se-nana Jesucristó, gaa ne cataj nij yuvij:



—Me rej nari' sí nihánj nanā cuu avii rā sí nihánj gā. Me rej nari' so' suun sa' 'yaj so' gā.

<sup>3</sup> Nuveé sij acó̄j chruun sí̄ nē chiháán ní' me so' na'. Nē ta'níi chanā cu'naj Mariá me so' á. Nē tinúú sí̄ cu'naj Jacobo do', sí̄ cu'naj José do', sí̄ cu'naj Judas do', sí̄ cu'naj Simón do', me so' á. Nē nij ra'vij so' me chanā nē chiháán ní' á —taj nij sí̄ man̄ chiháán Jesucristó rihaan tuvi' nij so', nē guun nacōo rá nij so' ni'yaj nij so' man Jesucristó a.

<sup>4</sup> Gaa nē cataj Jesucristó rihaan nij so' a:

—Me rej ma'an̄ vaj 'ō sí̄ nata' se-nanā Diose, nē aráj cochroj nij yuviī rihaan so', tzaj nē nij yuviī man̄ chiháán so' do', nij tuvi' so' do', nij sí̄ yan̄j tucuā so' do', na'vej rá carāa cochroj rihaan so' ma' —taj Jesucristó rihaan nij sí̄ man̄ chiháán so' chuman' cu'naj Nazaret yo' a.

<sup>5</sup> Nē nē guun nucuaj Jesucristó qui'yaj so' ā doj suun sa' noc̄o chiháán so', maan̄ sē doj sí̄ ran' me se cuta' so' ra'a so' rāa nē nahuun sa' nij so', qui'yaj so' a.

<sup>6</sup> Nē caráya'an̄j ndo'o so' se vaa nē cuchuman̄ rá nij sí̄ man̄ chiháán so' ni'yaj nij so' man so' a. Nē cavii so' ca'an̄j so' nij chuman' naj nichrun', tucuyón so' se-nanā so' man nij yuviī a.

*Nanā nihánj taj xna'an̄j se vaa ca'néē Jesucristó man̄ chuvij̄ nij sí̄ tucuyón se-nanā so' ca'an̄j ca'miī natáj̄ nij so' a*

<sup>7</sup> Gaa nē canacúun̄ Jesucristó man̄ chuvij̄ nij sí̄ tucuyón se-nanā so', nē cuchi' nij so' rihaan so', gaa nē guun che'ē so' ca'néē so' man̄ vij̄ vij̄ nij so', nē go' so' se nucuaj man̄ nij so', gaa nē ca'veē qui'yaj̄ canaán̄ nij so' rihaan nij nanā chreē a.

8 Ne ca'ne' so' suun rihaan nij so' se vaa a doj rasuun se nicaj nij so' gaa vaj nij so' chrej; maan orún' chruun garroté me se ca'vee nicaj nij so', tzaj ne rachrúun do', nanj do', se nicaj nij so', ne se ca'vee cunuû sa'anj rque se-caxran' nij so',

9 tzaj ne qui'nij tacóo nij so' canj, ne orún' yatzíj quitaj xráa nij so', taj Jesucristó rihaan nij so',

10 ne:

—Me ma'an ve' caran' soj, ne yo'o cayáan soj ve' yo' ndaa se curihanj soj chuman' yo' á.

11 Ne me rej ma'an se ca'mii sa' nij yuvii ga soj do', se ca'vej rá nij yuvii cunõ nij yuvii nana a'mii soj do', ne asa' cavii soj rej yo', ne nacunan' soj tacóo soj tucuayuu soj yo'óo tachruu canó tacóo soj, ne ndaa dan, gaa ne xcaj nij síi man rej yo' cuentá se vaa tumé ndo'o nij so' cacun' se vaa ne ca'vej rá nij so' cunõ nij so' se-nana soj adonj. Cataj xna'anj yá yá 'unj rihaan soj cuano se vaa doj a quiran' nij so' cacun' rihaan nij yuvii man chuman' Sodoma ga chuman' Gomorra nanj adonj —taj Jesucristó rihaan chuvij nij so' a.

12 Gaa ne ca'anj nij so', gaa ne ca'mii natáj nij so' rihaan nij yuvii se vaa canicaj rá nij yuvii canoco' nij yuvii chrej sa',

13 ne quirii ndo'o nij so' man nij nana chree nimán nij yuvii, ne cutáj ndo'o nij so' casté raa nij síi ran', ne nahuun sa' nij síi ran', qui'yaj nij so' a.

*Nana nihánj taj xna'anj se vaa cavi' Juan síi cuta' ne man yuvii, qui'yaj síi nicaj suun cu'naj Herodes a*

14 Dan me se cuchi' nana rihaan síi nicaj suun rey cu'naj Herodes che'é nu' se vaa qui'yaj nij síi tucu'yón se-nana Jesucristó, ne nu' cachra'

cha'nuu ndo'o se-nana Jesucristó a. Gaa ne cataj síí cu'naj Herodes se vaa:

—Cunuu i'na' ya uún síí cu'naj Juan, raj á. Ése síí cu'naj Juan me síí guun nucuaj qui'yaj nij suun sa' nocoo yo' nanj adonj —taj síí cu'naj Herodes a.

<sup>15</sup> Ne yo'ó ta'aj nij yuvií me se cataj se vaa síí cu'naj Elías síí nata' se-nana Diose gaa naá me Jesucristó, ne yo'ó ta'aj nij yuvií uún cataj se vaa yo'ó nij síí nata' se-nana Diose gaa naá me Jesucristó a.

<sup>16</sup> Dan me se cuno síí cu'naj Herodes daj guun rá nij yuvií, gaa ne cataj so':

—Síí cu'naj Juan síí ca'ne' nij tanuu cúú yave qui'yáj ro', aj cunuu i'na' ya so' chuguanj —taj Herodes a.

<sup>17</sup> 'O se ma'an síí cu'naj Herodes me síí ca'née man nij tanuu quita'aa nij tanuu man síí cu'naj Juan asij rque doj, ne numíj nij tanuu man síí cu'naj Juan, ne caxríj síí cu'naj Herodes taga' man síí cu'naj Juan, che'é chana cu'naj Herodías nica tinúú Herodes síí cu'naj Felipe a. 'O se xcaj síí cu'naj Herodes man chana Herodías yo',

<sup>18</sup> gaa ne cataj síí cu'naj Juan rihaan síí cu'naj Herodes se vaa:

—Ne nó xcúún so' xcaj so' man choco' so' ma' —taj Juan rihaan Herodes a.

<sup>19</sup> Che'é dan nachri' chana cu'naj Herodías ni'yaj no' man Juan, ne guun ndo'o rá no' cavi' Juan, tzaj ne ne ca'vee ma'.

<sup>20</sup> 'O se kuchu'vi' síí cu'naj Herodes ni'yaj so' man Juan, che'é se quene'en Herodes se vaa síí nica rá síí sa' inanj nimán rihaan Diose me Juan, ne che'é dan caráán Herodes rihaan chi'ii che'é Juan a. Dan me se gaa cuno Herodes se-nana Juan,

ne quinano ndo'o ra so', tzaj ne guun niha' ra so' ca'mij Juan rihaan so' a.

<sup>21</sup> Dan me se quisij 'o guii ca'vee qui'yaj canaan chana cu'naj Herodias yo', ne dan me se se-cha'anj sii cu'naj Herodes me yo', ne ca'ne' so' suun se vaa canu'u se-cha'anj so', ne canacuun so' ca'na' nij sii 'yaj suun ga ma'an so' do', nij tanuu uun chij doj do', nij sii uun chij rihaan estadó Galilea do', ca'na' cha ni'yanj nij so' ga so' a.

<sup>22</sup> Gaa ne catuj ta'nii chana cu'naj Herodias rej anuu cha'anj, ne ra'anj no', ne guun niha' uxrá ra Herodes ga nij sii ca'na' cha'anj yo' ni'yaj taran' nij so' man ta'nii Herodias a. Gaa ne cataj Herodes rihaan chana yaan yo':

—Cuanó nihánj me se a me ma'an rasuun me ra so' cachinj so' rihanj, ne rque 'unj man so' ei —taj so',

<sup>23</sup> gaa ne cataj uun so'— Cuta' ya 'unj raá Diose se vaa a me ma'an rasuun cachinj so' rihanj, ne rque 'unj man so' á. Ndaa yanéj yo'óo uun chij 'unj rihaan ro', rque 'unj man so' nanj adonj —taj Herodes rihaan chana yaan yo' a.

<sup>24</sup> Gaa ne curihanj chana yaan, ne xná'anj no' man nii no' chana cu'naj Herodias, ne cataj no':

—Me se cachinj 'unj, ga nahiin —taj no' rihaan nii no' a.

Gaa ne chana cu'naj Herodias cataj:

—Cachinj so' cúu yave sii cu'naj Juan sii cuta' ne man yuvij á —taj no' rihaan ta'nii no' chana yaan yo' a.

<sup>25</sup> Gaa ne nu' catuj ra'yanj chana yaan yo' rej man sii nicaj suun rey cu'naj Herodes, ne cachin ni'yaj no' rihaan so', cataj no':

—Me rá 'unj se vaa maan orá cuano ro', ca'nej so' cúu yave sí cu'naj Juan sí cuta' ne man yuvi rque aga' rco'oo, ne rque so' rihanj cuaj á —taj no' rihaan Herodes a.

<sup>26</sup> Gaa ne nanó ndo'o rá sí nicaj suun rey cu'naj Herodes yo' che'é se aj cuta' so' raā Diose ne aj cuno taran' nij sí yanj rihaan mesá ga so', ne che'é dan ne ca'vej rá so' tari' so' se-nana so' se vaa se qui'yaj so' ndaa vaa taj chana yaan yo' rihaan so' a.

<sup>27</sup> Gaa ne nu' ca'née so' man sí ticavi' man sí cu'naj Juan, ne ca'ne' so' suun se vaa nicaj so' cúu yave Juan ca'na' so' a.

<sup>28</sup> Gaa ne ca'anj sí ticavi' man Juan taga', ne ca'ne' so' cúu yave Juan, ne ca'née so' cúu yave Juan rque aga' rco'oo, nicaj so', ca'na' so', ne rque so' man chana yaan, ne nago' chana yaan yo' man nii no' a.

<sup>29</sup> Gaa ne gaa cuchi' nana rihaan nij sí tucu'yón se-nana Juan se vaa cavi' Juan, ne ca'na' nij so', ne nicaj nij so' cúu man Juan, cachin' nij so' rque yu'uj yuvej a.

*Nana nihanj taj xna'anj se vaa ca'vee quirii Jesucristó se chá 'un' mǐj snó'o a*

<sup>30</sup> Dan me se nij sí ca'née Jesucristó ca'anj nata' rihaan yuvi che'é so' ro', cunuu chre' nij so' ga Jesucristó, ne nata' nij so' rihaan Jesucristó che'é cunudanj nij suun sa' nocoo qui'yaj nij so' do', che'é cunudanj nij nana tucu'yón nij so' man nij yuvi do' a.

<sup>31</sup> Gaa ne cataj Jesucristó rihaan nij so' a:

—Ca'anj ní' doj rej tacaan rej taj vaj yuvii ne, gaa ne ca'vee naraan rá nij soj doj á —taj Jesucristó rihaan nij so' a.

'O se ca'na' ndo'o yuvii do', ca'anj ndo'o yuvii do', ne ne vaa ya'núj rihaan nij so' cha nij so' a doj chraa a.

<sup>32</sup> Gaa ne cavii nij so' rque rihoo chéé rihaan na, ne ca'anj orún' nij so' rej tacaan a.

<sup>33</sup> Tzaj ne quene'en ndo'o nij yuvii se vaa ca'anj nij so', ne xcaj yuvii cuentá se vaa ca'anj nij so', qui'yaj nij síi quene'en, gaa ne chéé tacoj nij yuvii man cunudanj nij chuman' naj rej yo', ne cunanj nij yuvii, cunuu chre' nij yuvii rej ca'anj nij tuvi' Jesucristó, ne asino nij yuvii cuchi', ne na'vij nij yuvii ca'na' Jesucristó a.

<sup>34</sup> Ne nanij Jesucristó rá rihoo, ne quene'en so' se vaa aj man uxrá yuvii, ne cunuu 'ee rá so' man nij yuvii a. 'O se ase vaa matzinj nuvi' síi tumé man vaa nij yuvii, ni'yaj Jesucristó, gaa ne guun che'e so' tucu'yón ndo'o so' se-nana so' man nij yuvii a.

<sup>35</sup> Dan me se cachén ndo'o orá, gaa ne ca'na' nij síi tucu'yón se-nana Jesucristó rihaan Jesucristó, gaa ne cataj nij so' se vaa:

—Rco' quij uun me nihánj, ne taj se chá cha nij yuvii nihánj, ne cachén ndo'o orá nanj á.

<sup>36</sup> Qui'yáá so' se ndo'o, ne na'nej so' chrej man nij yuvii, ca'anj nij yuvii chuman' naj nichrun' do', nij rancho naj nichrun' do', quiraan nij yuvii se chá cha nij yuvii nanj á —taj nij síi tucu'yón se-nana Jesucristó rihaan Jesucristó a.

<sup>37</sup> Gaa ne cataj Jesucristó rihaan nij so' a:

—Go' ma'an soj se chá cha nij yuvii á —taj so' a.  
Gaa ne cataj nij so' rihaan Jesucristó a:

—Ca'anj núj go' núj sa'anj vaa tu'vee yuvii 'yaj suun tunj yavii ne quiraan núj rachrúún, ne rque núj chá nij yuvii, rá so' na' —taj nij so' rihaan Jesucristó a.

<sup>38</sup> Gaa ne cataj Jesucristó rihaan nij so' a:

—Me daj rachrúún vaa rihaan soj ga. Cavii soj, ne xcaj soj cuentá á —taj so' a.

Gaa ne ca'anj nij so' qui'yaj contá nij so' rachrúún vaa rihaan nij so', gaa ne canicaj nij so', ne cataj nij so':

—Vaa 'un' guee rachrúún ne vij guee xcuj rihaan núj nanj á —taj nij so' rihaan Jesucristó a.

<sup>39</sup> Gaa ne ca'ne' Jesucristó suun rihaan nij yuvii se vaa ca'anj cayáán cunudanj nij yuvii rihaan coj chrin', ne ca'anj cuman x'ne' nij yuvii rihaan coj chrin', taj Jesucristó rihaan nij yuvii a.

<sup>40</sup> Gaa ne naqui'yaj x'ne' nij yuvii man nij yuvii, ne cayáán nij yuvii rihaan coj chrin', ne dan me se cientó yuvii do', vij chihaa chi' yuvii do', me 'o 'o x'ne' nij yuvii a.

<sup>41</sup> Gaa ne quita'aa Jesucristó 'un' nij rachrúún ne vij roj xcuj, gaa ne ni'yaj so' rej xta', ne nago' so' graciá rihaan Diose, gaa ne cuxra' ta'aj so' man rachrúún yo', ne caxrj so' ston nij síi tucu'yón se-nana so', che'é rej caxrii nij so' ston nij yuvii a. Gaa ne cuxra' ta'aj so' nee xcuj chá cunudanj nij yuvii a.

<sup>42</sup> Gaa ne chá taran' nij yuvii, ne caraa rque cunudanj nij so',

<sup>43</sup> ne ndaa quináj ndo'o se chá, qui'yaj nij yuvii a. Gaa ne naqui'yaj chre' nii se vaa quináj tu'va yuvii,

ne caraa yo'ó chuvij ya scaa, ne ta'aj rachrúún do', ta'aj nee xcuaaj do', me se chá naqui'yaj chre' nii a.

44 Ne nij snó'o rqué Jesucristó chraa me se 'un' mij snó'o me nij so' a.

*Nana nihánj taj xna'anj se vaa cachée Jesucristó rihaan na a*

45 Gaa ne ra'yanj ca'ne' Jesucristó suun rihaan nij sí tucu'yón se-nana so' se vaa cavii nij so' rihoo chée rihaan na ca'anj nij so' rej xco na lacuaná yo' ndaa chuman' cu'naj Betsaida, quitaj yaan nij so' rihaan Jesucristó, ne dan me se ma'an Jesucristó na'nej chrej man nij yuvii, taj Jesucristó rihaan nij sí tucu'yón se-nana so' a.

46 Dan me se ca'anj nij so', ne cataj Jesucristó rihaan nij yuvii se vaa ca'vee ca'anj nij yuvii a. Gaa ne cavii so' raq quij, ne cachín ni'yaj so' rihaan Diose a.

47 Dan me se daj doj cata' güii raq quij, ne vaj rihoo tanuu rihaan na lacuaná, ne orún' Jesucristó me sí nicun' rihaan yo'óo a.

48 Ne quene'en so' man nij sí tucu'yón se-nana so' se vaa güéj ndo'o rihoo yo' rihaan na qui'yaj nana, che'é se go' nana rej rihaan rihoo yo' a. Dan me se yan' si'nu' ca'anj Jesucristó rej vaj nij so', chée tajoj uun so' rihaan na yo', vaj so' nanj adonj. Ne guun rá so' cachén so' rej x'nuj nij so' a.

49 Ne quene'en nij sí tucu'yón se-nana so' man so' se vaa chée uun so' rihaan na, ne guun rá nij so' se vaa ta'naj me so', ne che'é dan caguáj ndo'o nij so' a.



<sup>50</sup> 'Q se quene'en cunudañj nij so' man so', ne cuchu'vi' ndo'o nimán nij so' a. Veé dan, ne nu' cataj Jesucristó rihaan nij so' a:

—Naqui'yaj nucuaj soj nimán soj ei. 'Unj 'na' ei. Se cuchu'vi' soj ma' —taj so' rihaan nij so' a.

<sup>51</sup> Gaa ne catúj so' rque rihoo rej nuu nij sí tucu'yón se-nana so', gaa ne canicun' nana yo', ne ca'anj ndo'o rá nij so' a.

<sup>52</sup> 'Q se ne xcaj sa' nij so' cuentá che'é se nucuaj nicaj Jesucristó gaa cuxra' ta'aj Jesucristó rachrúún chá nij yuvi a. Maan se nichraj ndo'o nimán nij so' a.

*Nana nihánj taj xna'anj se vaa nari' nucuaj nij sí ran' man rej cu'naj Genesaret, qui'yaj Jesucristó a*

<sup>53</sup> Gaa ne cuchí' nij so' tu'va na lacuaná rej cu'naj Genesaret, ne numíj nij so' rihoo tu'va na lacuaná a.

<sup>54</sup> Gaa ne nanij nij so' rá rihoo, ne nu' cunuu yaan nij sí man rej yo' man Jesucristó,

<sup>55</sup> ne yoo ca'anj cunudañj nij sí yanj nu' anicaj, ne guun che'e nij so' cuchruj nij so' tuvi' nij so' sí ran' rihaan yuvéé, ne quitáá chihá nij so' nij sí ran' yo', vaj nij so' me rej ma'an vaj Jesucristó a.

<sup>56</sup> Ne me ma'an chuman' ra'a do', chuman' nocoo do', rancho do', catúj Jesucristó me se cuchruj nij yuvi man nij sí ran' rihaan yu'vee, ne cachín ni'yaj uxrá nij yuvi rihaan Jesucristó se vaa ca'vej rá Jesucristó cano ra'a nij so' doj tu'va sagan' so' a. Ne nu' nij sí cano ra'a doj man so' ro', nahuun sa' cunudañj nij so' cuaj nanj adonj.

## 7

*Nana nihánj taj xna'anj me che'é ne na'ya' nij sí tucu'yón se-nana Jesucristó gaa chá nij so' chraa a*

<sup>1</sup> Gaa ne quinichrun' síi fariseo do', quinichrun' síi naqui'yaj cūu se-tucuanj Moisés do', rihaan Jesucristó, ne síi cavii chuman' Jerusalén me nij so' a.

<sup>2</sup> Ne quene'en nij so' se vaa gaa chá nij síi tucu'yón se-nana Jesucristó chraa, ne ne na'ya' nij so', ne che'é dan ne naruvij ra'a nij síi tucu'yón se-nana Jesucristó ni'yaj Diose, rá nij síi fariseo do', nij síi naqui'yaj cūu se-tucuanj Moisés do' a.

<sup>3</sup> O se xa' nij síi fariseo ga cunudanj yo'ó nij síi israelitá, tzaj ne a doj ne chá nij so' chraa sese ataa na'ya' nij so' ma'. Danj 'yaj nij so', che'é se noco' nij so' tucuáán cuchruj nij síi chij cayáán gaa naá a.

<sup>4</sup> Ne gaa 'na' nij so' yu'vee, ne ane nij so', ne sese ataa canē nij so', ne ne chá nij so' chraa a ma'. Ne vaa uxrá doj tucuáán nicaj nij so', ne ndaa vaa tucuáán che'é tazá do', che'é xruj do', che'é aga' do', daj qui'yaj nij so' gaa na'nu' nij so' man nij rasuun vaa nacaj do' a.

<sup>5</sup> Gaa ne xná'anj nij síi fariseo ga nij síi naqui'yaj cūu se-tucuanj Moisés man Jesucristó, ne cataj nij so', ne:

—Nij síi tucu'yón se-nana so' me se me che'é ne noco' nij so' tucuáán cuchruj nij síi chij cayáán gaa naá, ne nihánj me se chá nij so' chraa, ne ne naruvij ra'a nij so' ni'yaj Diose a ma' —taj nij so' rihaan Jesucristó a.

<sup>6</sup> Gaa ne cataj Jesucristó rihaan nij so' a:

—Cunaj uxrá vaa nana nata' síi cu'naj Isaías gaa naá gaa ca'mii so' che'é nij soj sij nucui' rá, ne dan me se ca'mii so' se-nana Diose, ne cataj so' se vaa: “Yuvij nihánj me se gan' uxrá nicun' nimán nij so' ga 'unj nanj adonj.

<sup>7</sup> Na'víj rma'an nij so' rihanj, ne dan me se nanj se-nana nij síi man rihaan chumi tucu'yón nij so' rihaan tuvi' nij so', ne taj nij so' se vaa se-nanaj me se-nana nij yuvij yo' a”, taj se-nana Diose nata' síi cu'naj Isaías gaa naá a.

<sup>8</sup> O se aj tanáj xco soj nana cataj xna'anj Diose rihaan ní', ne nanj tucuaán cuchruj yuvij uun noco' soj nanj ei —taj Jesucristó,

<sup>9</sup> ne cataj uún so' se vaa— Cunaj uxrá vaa 'yaj soj, ne uta' yanij soj nana cataj xna'anj Diose rihaan ní', che'é rej ca'vee canoco' soj se-tucuanj ma'an soj asan.

<sup>10</sup> O se ca'ne' Moisés suun se vaa: “Caraa cochróo so' rihaan rée so' do', rihaan níi so' do' á”. Tzaj ne: “Síi a'mii chree rihaan rej do', rihaan níi do', me se vaj so' ne nu' che'e cavi' so' á”. Danj vaa cataj xna'anj Moisés rihaan ní' a.

<sup>11</sup> Tzaj ne taj soj se vaa sese cataj yo'o so' rihaan rej so' do', rihaan níi so' do', se vaa aj rqué so' nu' si'yaj so' rihaan Diose ne che'é dan se ca'vee racuíj so' man rej so' do', man níi so' do', taj soj a.

<sup>12</sup> Ne ne ca'vej soj racuíj so' man rej so' do', man níi so' do' a.

<sup>13</sup> Dan me se danj inanj a'mii soj gaa tucu'yón soj se-nana nij síi man gaa naá, ne axríj yuve soj man se-nana Diose nanj adonj —taj Jesucristó rihaan nij síi fariseo do', rihaan nij síi naqui'yaj cuu se-tucuanj Moisés rihaan yuvij do' a.

14 Gaa ne canacúun uún Jesucristó man nij yuvii ca'na' nij yuvii rihaan so', gaa ne cataj so' rihaan nij yuvii a:

—Cuno taran' soj nana nihánj, ne xcaj soj cuentá nedi'.

15 A doj rasuun atúj tu'va yuvii se ca'vee qui'yaj chi'ii man yuvii ma'. Se avii tu'va yuvii ro', 'yaj chi'ii man yuvii adonj.

16 Sese taj yu'uj xréé soj, ne cuno soj nana nihánj ei —taj Jesucristó rihaan nij yuvii a.

17 Dan me se corá ca'anj yaníj Jesucristó ga nij síi tucu'yón se-nana so' rihaan nij yuvii, ne catúj nij so' rá ve', gaa ne xná'anj nij síi tucu'yón se-nana Jesucristó man so' me taj nana ca'mii so' che'é se atúj tu'va yuvii gaa.

18 Gaa ne cataj Jesucristó rihaan nij so' a:

—Vaa soj vaa, ne ne xcaj ma'an soj do' cuentá a na'. Ne ne'en soj se vaa nu' se atúj tu'va yuvii ro', se ca'vee qui'yaj chi'ii yo' man yuvii a.

19 'Q se ne atúj yo' ndaa nimán yuvii ma'. Tananj achén yo' rque yuvii, ne urihanj yo' gaa re'é yuvii nanj á —taj Jesucristó, ne nana yo' taj se vaa ca'vee cha yuvii me ma'an rasuun ne nuveé cacun' me yo' rihaan Diose a.

20 Ne cataj uún so' a— Tzaj ne se urihanj tu'va yuvii ro', yo' me nana avii nimán yuvii, ne nana yo' me 'yaj chi'ii ndo'o man yuvii adonj.

21 'Q se nihánj me se chi'ii avii nimán yuvii a. Se chi'ii do', che'é yan qui'yaj ituu si'yaj tuvi' do', yan cotoj ga nica tuvi' do', yan ticavi' man tuvi' do',

22 yan guun rá nica si'yaj tuvi' do', yan tiha' yu'unj man tuvi' do', yan ni'yaj ndo'o man yo'ó

chanaḡ do', yan guun xcoj ruvaa rá ni'yaj tuvi' do', che'é yan nachri' ni'yaj man tuvi' do', yan ca'mii xta' do', yan qui'yaj rma'aḡ náá guun se nij do', me nu' se avii nimán yuvii,

<sup>23</sup> ne nu' yo' me se avii nimán yuvii ne 'yaj chi'ii man yuvii nanj adonj —taj Jesucristó rihaan nij síi tucu'yón se-nḡaḡ so' a.

*Nanaḡ nihánj taj xna'anj se vaa cuchumán rá 'o chanaḡ sirofenicia se vaa raçuíj Jesucristó man no' a*

<sup>24</sup> Gaa ne canicun' Jesucristó, ne curihaḡ so' rej yo', ne ca'anj so' rej naj chuman' cu'naj Tiro a. Ne catúj so' rá 'o ve', ne ne ca'vej rá so' quene'en nij yuvii me rej vaj so' a. Tzaj ne ne ca'vee qui'nij yuve so' ma'.

<sup>25</sup> Tananj ra'yanj cuhi' nanaḡ rihaan 'o chanaḡ se vaa yanj so', ne ta'níi chanaḡ ro', me níi nuu nanaḡ chree nimán, ne ca'na' chanaḡ, ne canicun' ruj chanaḡ yo' rihaan Jesucristó a.

<sup>26</sup> Dan me se chanaḡ sirofenicia a'mii xna'ánj griego me chanaḡ yo', ne cachín ni'yaj no' rihaan Jesucristó se vaa quirii Jesucristó nanaḡ chree nimán ta'níi no' a.

<sup>27</sup> Gaa ne cataj Jesucristó rihaan no' a:

—Dan me se canicún' so' doj, ne chaḡ asino nij xnii tucuaḡ, ne ne'én so' se vaa se ca'vee cata'aa ní' co'oo man rihaan nij xnii ne go' ní' chaḡ nij chuvee ma'. Dan me se ndaa síj chá nij xnii tucuaḡ, gaa ne sese náj se chá tu'va nij xnii yo', gaa ne ca'vee go' chaḡ chuvee nanj adonj. Che'é dan ase vaa ne nó xcúún yuvii ca'nee yuvii rachrúún tu'va ta'níi yuvii go' yuvii rachrúún yo' chaḡ chuvee ro', danj vaa ne nó xcúnj raçuíj man soj sij yaníj a man adonj. Maḡaḡ inanj ma'aḡ nij yuvii israelitá me no

xcúún 'uñj racuíj 'uñj nanj adonj —taj Jesucristó rihaan chana yo' a.

Gaa ne cataj no':

28 —Veé dan vaa guee, Señor. Tzaj ne nij chuvee nicun' rque chruun mesá ro', chá nij xo' tachruu ayuu tu'va nij xnii nanj á. Ne ase vaa chuvee chá tachruu vaa 'uñj rihaan so' nanj adonj. Che'é dan me ndo'o raj racuíj so' doj manj, raj nanj adonj —taj chana yo' rihaan Jesucristó a.

29 Gaa ne cataj Jesucristó:

—Che'é nana ca'mii so' nihánj ro', ca'vee cavii so' ca'anj so', ne aj curihanj nana chree nimán ta'níi so' nanj ei —taj so' rihaan no' a.

30 Gaa ne ca'anj chana, catúj chana rá ve' tucua chana, ne quene'en chana se vaa dínj naj ta'níi chana rihaan yuvéé, ne aj curihanj nana chree nimán ta'níi chana adonj.

*Nana nihánj taj xna'anj che'é síi naxra' tu'va do', nachuguun xrée do', qui'yaj Jesucristó a*

31 Gaa ne curihanj uún Jesucristó rej naj chuman' Tiro, ne cachén so' sca'núj chuman' cu'naj Sidón, ca'anj uún so' tu'va na lacuaná cu'naj Galilea, ne cachén so' sca'núj rej cu'naj Chi' Chuman' a.

32 Ne nicaj nij yuvii man 'o síi so'o ya'mii ca'na' nij yuvii rihaan Jesucristó, ne cachín ni'yaj uxrá nij yuvii rihaan Jesucristó se vaa cuta' ra'a Jesucristó xráá síi so'o ya'mii yo' a.

33 Gaa ne nicaj Jesucristó man síi so'o ya'mii ca'anj yaníj so' rihaan yo'ó nij yuvii, gaa ne tucua'anj Jesucristó ra'a Jesucristó yu'uj xrée síi so'o

ya'mii, gaa ne quirii talúj Jesucristó ra'a Jesucristó, ne canó ra'a Jesucristó daa sí so'ó ya'mii yo' a.

<sup>34</sup> Gaa ne ni'yaj Jesucristó rej xta', gaa ne caráchej Jesucristó, ne cataj Jesucristó:

—Efata —taj Jesucristó, ne nana “Efata” taj: “Nachuguun xréé so' á”, me nana ca'mii Jesucristó rihaan sí so'ó ya'mii yo' a.

<sup>35</sup> Gaa ne nachuguun xréé so', ne nahuun sa' daa so', gaa ne ca'mii sa' so' a.

<sup>36</sup> Gaa ne ca'ne' Jesucristó suun rihaan nij sí quene'en daj qui'yaj Jesucristó che'é sí so'ó ya'mii se vaa se guun cataj xna'anj nij so' rihaan a'ó yuvii a. Dan me se doj a na'vej rá Jesucristó cataj xna'anj nij so' rihaan tuvi' nij so', tzaj ne doj a nata' nij so' rihaan tuvi' nij so' a.

<sup>37</sup> Gaa ne ca'anj uxrá rá nij yuvii xcaj cuentá daj qui'yaj Jesucristó, ne cataj nij yuvii se vaa sa' uxrá vaa nu' se vaa qui'yaj Jesucristó, ne ndaa nachuguun xréé nij sí so'ó do', ndaa a'mii sa' nij sí ya'mii do', 'yaj Jesucristó, taj nij yuvii yo' a.

## 8

*Nana nihánj taj xna'anj se vaa go' Jesucristó se chá rihaan ca'anj mǐj snó'o a*

<sup>1</sup> Ne güii dan me se vaj uún que'ee yuvii ga Jesucristó, ne nuvi' uún se chá rihaan nij yuvii, gaa ne canacúun Jesucristó man nij sí tucu'yón se-nana so' se vaa ca'na' nij so' rihaan so', gaa ne cataj so' rihaan nij so' a:

<sup>2</sup> —'Ee rá 'unj man nij yuvii nihánj, ne nihánj me se síj va'núj ya güii 'ó vaj nij yuvii ga 'unj, ne taj vaj se chá rihaan nij yuvii cuano a ma'.

<sup>3</sup> Ne sese na'nej 'un̄j chrej man nij yuvij̄ cuanō quin̄an' nij so' gaa na'aan rque nij so', ne ninaj̄ nij so' rá chrej, ne dan me se ta'aj̄ nij so' me sí yanj̄ rej gan' ndo'o nan̄j adon̄j —taj Jesucristó rihaan nij sí tucu'yón se-n̄an̄a so' a.

<sup>4</sup> Gaa ne cataj̄ nij so' rihaan Jesucristó a:

—Tzaj̄ ne rej tacaan̄ uun̄ me nihánj, ne nuvi' rachrúún nihánj go' ní ch̄ā nij yuvij̄ a ma' —taj nij sí tucu'yón se-n̄an̄a Jesucristó a.

<sup>5</sup> Gaa ne xná'an̄j Jesucristó man nij so', cataj̄ so':

—Me daj̄ rachrúún vaa rihaan soj̄ gā —taj so', xná'an̄j so' man nij sí tucu'yón se-n̄an̄a so' a.

—Chij̄ rachrúún vaa rihaan núj nan̄j á —taj nij so' rihaan Jesucristó a.

<sup>6</sup> Gaa ne ca'ne' Jesucristó suun rihaan nij yuvij̄ se vaa ca'an̄j cayáán̄ nij yuvij̄ rihaan yo'óo a. Gaa ne nicaj̄ so' chij̄ nij rachrúún, ne nago' so' graciá rihaan Diose, gaa ne cuxra' ta'aj̄ so' rachrúún yo', ne caxr̄ij̄ so' ston̄ nij sí tucu'yón se-n̄an̄a so', ne t̄uc̄uachén̄ nij so' rihaan nij yuvij̄, ne dan me se rquē nij so' rachrúún yo' rihaan nij yuvij̄ a.

<sup>7</sup> Ne nicaj̄ Jesucristó doj̄ xcuāj̄ le'ej̄ uún, ne nago' so' graciá rihaan Diose che'é nij xcuāj̄ le'ej̄, ne cataj̄ so' rihaan nij sí tucu'yón se-n̄an̄a so' se vaa t̄uc̄uachén̄ nij so' neē xcuāj̄ le'ej̄ uún rihaan nij yuvij̄ uún a.

<sup>8</sup> Gaa ne chá cunudan̄j̄ nij yuvij̄, ne ndaa caraa rquē nij so' a. Gaa ne naqui'yaj̄ chre' n̄i se vaa quináj̄ tu'va nij yuvij̄, ne quis̄ij̄ 'ō cunu' chij̄ ya scaa caraa qui'yaj̄ se quináj̄ tu'va nij yuvij̄ yo' a.

<sup>9</sup> Dan me se cunudan̄j̄ nij so' chá, ne quis̄ij̄ ndaa ca'an̄j̄ m̄ij̄ yuvij̄ chá nan̄j̄ adon̄j̄.



Gaa ne na'néé Jesucristó chrej man nij yuvij,  
 10 gaa ne nu' cavii Jesucristó ga nij sí tucu'yón  
 se-nana so' rá rihoo chéé rihaan na, ne ca'anj nij  
 so' rej cu'naj Dalmanuta a.

*Nana nihánj taj xna'anj se vaa cachín nij sí  
 fariseo se vaa qui'yaj Jesucristó 'o suun sa' nocoo  
 quene'en nij so' a*

11 Dan me se curihanj doj nij sí fariseo, gaa ne  
 guun che'e nij so' canó tuvi' nij so' ga Jesucristó, ne  
 dan me se cachín ni'yaj nij so' rihaan Jesucristó  
 se vaa racuj Diose man Jesucristó, ne qui'yaj Je-  
 sucristó 'o suun sa' nocoo quene'en nij so', gaa ne  
 guun ya rá nij so' se vaa sí ca'néé ya Diose me  
 Jesucristó, rá nij so' a.

12 Gaa ne nucaj ndo'o caráchej Jesucristó, ne  
 cataj so' rihaan nij so' a:

—Ne me che'é me rá soj sij israelitá qui'yáj suun  
 sa' nocoo quene'en soj ga. Dan me se daj chihaa  
 mij se qui'yáj suun sa' nocoo che'é soj a ma' —taj  
 Jesucristó rihaan nij sí fariseo yo' a.

13 Gaa ne tanáj Jesucristó man nij so', gaa ne  
 cavii uún so' rque rihoo chéé rihaan na, ne ca'anj  
 so' rej xcō na lacuaná a.

*Nana nihánj taj xna'anj se vaa ne ca'vej rá Je-  
 sucristó cunō nij sí tucu'yón se-nana so' man nana  
 tucu'yón nij sí fariseo do', sí cu'naj Herodes do' a*

14 Dan me se quini'yón nij sí tucu'yón se-nana  
 Jesucristó nīcaj nij so' rachrúún cha nij so', ne vaa  
 orún' rachrúún rá rihoo vaj ga nij so' a.

15 Gaa ne ca'ne' Jesucristó suun rihaan nij so',  
 cataj Jesucristó:

—Cutumé soj man soj se gaa nanj quiran' soj sayuun, qui'yaj se-levadura nij síi fariseo do', síi cu'naj Herodes do' á —taj Jesucristó no nij so' a.

16 Ne nuchruj raa ndo'o nij síi tucu'yón se-nana Jesucristó che'é nana ca'mii so', ne:

—Che'é se taj rachrúun nicaj ní', ne che'é dan a'mii so' che'é levadura se 'yaj naraa nana rque rachrúun nanj adonj —taj nij so' a.

17 Ne aj ne'en Jesucristó daj uun nimán nij so', ne che'é dan cataj so':

—Me che'é nanó ndo'o rá soj se vaa taj rachrúun rihaan soj ga. Me che'é ataa xcaj soj cuentá ga. 'O se vaa nichraj ndo'o nimán soj nanj adonj.

18 'O se vaa rlij rihaan soj, tzaj ne ne ni'yaj soj a ma'. Vaa xréé soj, tzaj ne ne uno soj a ma'.

19 Ne ne nuû rá soj gaa vaa daj 'o 'un' guee rachrúun cuxra' ta'aj 'unj tzaj ne quisíj chá cunu' 'un' míj snó'o, qui'yáj a. Ne me daj scaa se chá quináj tu'va yuvii naqui'yaj chre' soj, rá soj ga —taj Jesucristó, xná'anj Jesucristó man nij so' a.

Gaa ne:

—Chuvij a —taj nij so' rihaan Jesucristó a.

20 Gaa ne cataj uún Jesucristó:

—Ne ne nuû rá soj gaa vaa daj 'ó chij guee rachrúun cuxra' ta'aj 'unj tzaj ne quisíj chá cunu' ca'anj míj yuvii, qui'yáj a. Ne me daj scaa se chá quináj tu'va yuvii naqui'yaj chre' soj, rá soj ga —xná'anj uún Jesucristó man nij so' a.

Gaa ne:

—Chij a —taj nij so' rihaan Jesucristó a.

21 Gaa ne cataj Jesucristó rihaan nij so' a:

—Ne me che'é me ataa xcaj soj cuentá se vaa ca'vee rque 'unj nu' se vaa achiin man soj ne nu-veé inanj che'é rej nanq rá soj che'é rachrúun me ca'mij rihaan soj che'é se-levadura nij sí fariseo do', sí cu'naj Herodes do' ma' —taj Jesucristó rihaan nij so' a.

*Nanq nihánj taj xna'anj se vaa naxra' rihaan 'o sí tuchrii, qui'yaj Jesucristó a*

<sup>22</sup> Gaa ne catúj Jesucristó ga nij sí tucu'yón se-nanq so' rá chuman' cu'naj Betsaida a. Gaa ne nicaj yuvi 'o sí tuchrii ca'na' nij yuvi rihaan Jesucristó, ne cachíin ni'yaj nij yuvi rihaan Jesucristó se vaa cuta' Jesucristó ra'a Jesucristó raq sí tuchrii che'é rej naxra' rihaan sí tuchrii yo' a.

<sup>23</sup> Gaa ne quita'aa Jesucristó ra'a sí tuchrii yo', ne curihanj so' rej tu'va chuman' ga sí tuchrii, ne quiri talúj Jesucristó rihaan sí tuchrii yo', ne cuta' ra'a Jesucristó xraá so', gaa ne xná'anj Jesucristó man so' a:

—Ruvi' rihaan so' na' —taj Jesucristó, xná'anj so' man sí tuchrii yo' a.

<sup>24</sup> Gaa ne ni'yaj sí tuchrii yo' doj, gaa ne cataj so':

—Ne'én 'unj nij snó'o, ne ase vaa chruun vaa nij so', tzaj ne chéé nij so' ni'yaj 'unj nanj asanj —taj so' rihaan Jesucristó a.

<sup>25</sup> Gaa ne cuta' ra'a uún Jesucristó rihaan sí tuchrii yo', gaa ne ni'yaj ni'yaj sí tuchrii, ne dan me se nahuun sa' nu' rlij rihaan so', ne curuvi' sa' cunudanjan rasuun ni'yaj so' nanj adonj.

<sup>26</sup> Gaa ne ca'née Jesucristó man so' quinan' so', tzaj ne cataj Jesucristó rihaan so' se vaa:

—A doj se catúj so' rá chuman', ne se cataj so' rihaan a 'ó nij yuvií, gaa ne se gaa nanj xcaj nij yuvií cuentá daj qui'yáj che'é so' á —taj Jesucristó rihaan so' a.

*Nana nihánj taj xna'anj se vaa cataj xna'anj Pedró me sí me Jesucristó a*

<sup>27</sup> Gaa ne curihañj Jesucristó ga nij sí tucu'yón se-nana so' chuman' Betsaida yo', ne ca'anj nij so' nij chuman' ra'a noco' man chuman' cu'naj Cesarea de Filipino do' a.

Dan me se vaj nij so', ne xná'anj Jesucristó man nij sí tucu'yón se-nana so', ne cataj so':

—Daj taj nij yuvií che'é 'unj ga. Ne me sí mé 'unj, taj nij yuvií ga —taj Jesucristó, xná'anj so' man nij so' a.

<sup>28</sup> —Vaa sí taj se vaa sí cu'naj Juan sí cuta' ne man yuvií mé so' ei. Ne vaa sí taj uún se vaa sí cu'naj Elías sí nata' se-nana Diose gaa naá me uún so' chuguanj. Ne vaa sí taj uún se vaa yo'ó sí nata' se-nana Diose gaa naá me uún so' chiha'. 'O se danj taj 'o 'o nij yuvií che'é so' nanj adonj —cataj nij so' rihaan Jesucristó a.

<sup>29</sup> —Ne ma'an soj, gaa ne me sí mé 'unj, rá ma'an soj ga —taj Jesucristó, xná'anj so' man nij sí tucu'yón se-nana so' a.

Gaa ne cataj sí cu'naj Pedró:

—Sí ca'née Diose tinanii man yuvií rihaan sayuun mé so' ei —taj so' rihaan Jesucristó a.

<sup>30</sup> Gaa ne cataj xna'anj Jesucristó rihaan nij sí tucu'yón se-nana so' se vaa se nata' nij so' rihaan a 'ó yuvií me sí me so', taj so' a.

*Nana nihánj taj xna'anj se vaa cataj xna'anj Jesucristó se vaa cavi' so' ne cunu i'na' uún so' a*

<sup>31</sup> Gaa ne guun che'e Jesucristó tucu'yón so' man nij sí tucu'yón se-nana so' se vaa che'é se sí ca'née Diose ñicaj yu'unj man yuvi me so' ro', che'é dan no xcúún so' quiran' ndo'o so' sayuun, qui'yaj nij sí uun chij do', nij xrej ata suun nocoo doj do', nij sí naqui'yaj cu se-tucuanj Moisés rihaan nij yuvi do', ne nachri' nij so' ni'yaj nij so' man so', ne ticavi' nii man so', ne cachon va'nuj güii, gaa ne cunu i'na' uún so', cataj so' a.

<sup>32</sup> Ne nucuaj ndo'o nata' so' nana yo' rihaan nij sí tucu'yón se-nana so' a. Gaa ne quirii yaníj sí cu'naj Pedró man Jesucristó, ne guun che'e so' cataj so' se vaa ne nó xcúún Jesucristó ca'mii Jesucristó nana vaa danj a.

<sup>33</sup> Gaa ne canicaj Jesucristó, ne ni'yaj so' man nij sí tucu'yón se-nana so', ne cataj so' rihaan Pedró se vaa ne nó xcúún uxrá ma'an Pedró ca'mii Pedró danj, ne cataj so':

—Naxuun so' mán so' rihanj á. Na'vej raj quene'enj mán so' a ma'. 'O se ase tu'va sí chree sí cu'naj Satanás ro', danj tu'vá so' ei. Danj tu'vá so', che'é se ne acaj so' cuentá daj me rá Diose adonj. Maan se inanj acaj so' cuentá daj me rá yuvi nanj adonj —taj Jesucristó rihaan sí cu'naj Pedró a.

<sup>34</sup> Gaa ne canacúún Jesucristó man nij yuvi ca'na' nij yuvi rej nicun' so' ga nij sí tucu'yón se-nana so', gaa ne cataj so' rihaan taran' nij so' a:

—Sese me rá yo'o so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quiran' uxrá so' sayuun do', ca'vee se ndaa cachron nii man so'

rihaan rcutze do', tzaj ne yo'o qui'yaj suun so' che'ej, ne yo'o canoco' raan so' manj adonj.

<sup>35</sup> Tzaj ne sese vaa 'o sí me rá tinanii man ma'an rihaan sayuun, ne vaa güii, ne yo'o cavi' nimán so' adonj. Tzaj ne sese cavi' yo'o so' che'é se vaa me so' sí noco' manj do', che'é se nata' so' se-nanaj nana sa' do', ne vaa güii, ne cunu u i'na' uún so' adonj.

<sup>36</sup> Ne a me se quirí' 'o so' sese qui'yaj canaán so' nu' rasuun man rihaan chumii nihánj ne ca'anj ni'ya nimán so', rá soj ga. Daj chihaa mǐj se ca'vee cavii sa' so', qui'yaj rasuun man rihaan chumii nihánj a ma'.

<sup>37</sup> Tzaj ne ca'vee se navij nu' si'yaj yo'o so' rihaan chumii nihánj, tzaj ne sese gaa i'na' nimán so' nu' cavii nu' ca'anj, ne quinano rá so', rá soj na'. Daj chihaa mǐj se quinano rá so' a ma'. 'O se cavii sa' uxrá so' nanj adonj.

<sup>38</sup> "Dan me se xa' sí uun na'aj ni'yaj manj ne uun na'aj ni'yaj se-nanaj ro', ase vaa nij sí chi'ii tumé ndo'o cacun' man rihaan chumii nihánj cuano vaa so' adonj. Ne vaa güii guun na'aj 'unj sij ca'née Diose nǐcaj yu'unj man yuvii ni'yaj 'unj man so' asa' ca'na' uún 'unj rihaan chumii nihánj, ne dan me se uxrá ve'é gaa 'unj, qui'yaj Réé 'unj, ne ca'na' nij se-mozó so' ga 'unj asa' ca'ná' 'unj nanj adonj —taj Jesucristó rihaan nij so'a.

## 9

<sup>1</sup> Gaa ne cataj uún so' se vaa:

—Ya ya cataj xna'anj 'unj rihaan soj cuano se vaa xa' ta'aj soj sij nicun' nihánj cuano, me se gaa ataa a cavi' ta'aj soj, ne ya quene'en ta'aj soj asa' guun che'e Diose nucaj ndo'o guun chij Diose

rihaan chumiij nihánj nanj adonj —taj Jesucristó rihaan taran' nij so' a.

*Nana nihánj taj xna'anj se vaa chuguun ndo'o man Jesucristó ni'yaj nij sí tucu'yón se-nana so' a*

<sup>2</sup> Cachén vatan' güii, gaa ne nicaj Jesucristó man sí cu'naj Pedró do', sí cu'naj Jacobo do', sí cu'naj Juan do', ca'anj so' raá 'o quij xcaan rej taj vaj a 'o yuviij ne a. Gaa ne yo'o cunuu ino cunudanj man Jesucristó ni'yaj nij sí tucu'yón se-nana so' yo' a.

<sup>3</sup> Ne dan me se cunuu catzii ndo'o sagan' so', ne ndaa raan lá ma'an sagan' so' ni'yaj nij so' a. Ne taj vaj a yo'ó sí man rihaan chumiij nihánj ca'vee qui'yaj catzii yatzíj ndaa rá se vaa sagan' Jesucristó a.

<sup>4</sup> Ne ni'yaj va'núj nij so', ne dan me se naqui'yaa sí cu'naj Elías sí cane gaa naá ga sí cu'naj Moisés rihaan nij so', ne nanó roj so' cuentó ga Jesucristó ni'yaj nij so' a.

<sup>5</sup> Gaa ne cataj Pedró rihaan Jesucristó a:

—Cunaj uxrá vaa mán núj nihánj ga so', maestro. Ne qui'yaj núj va'núj ve' yacataj canē soj nanj á. 'O ve' cané so', ne yo'ó ve' canē sí cu'naj Moisés, ne yo'ó ve' canē sí cu'naj Elías ei —taj Pedró rihaan Jesucristó a.

<sup>6</sup> 'O se ne quene'en uxrá Pedró daj me che'é ca'mii so' rihaan Jesucristó danj a ma'. 'O se cuchu'vi' ndo'o va'núj nij so' che'é se vaa quene'en nij so' nanj adonj.

<sup>7</sup> Gaa ne ca'na' 'o ngaa, ne caráán ngaa man taran' nij so' a. Gaa ne Diose ro', ca'mii nana cuno nij so' rque ngaa yo', ne cataj Diose a:

—Síí nihánj me ta'níj adonj. 'Ee raj man so' adonj. Cuno soj rihaan so' ei —taj Diose cuno nij so' a.

<sup>8</sup> Gaa ne nu' ni'yaj nij so', ne daj orún' Jesucristó nicun' ga nij so', quene'en nij so' nanj adonj.

*Nana nihánj taj xna'anj se vaa ase vaa síí cu'naj Elías ro', dajj vaa síí cu'naj Juan síí cuta' ne man yuvií a*

<sup>9</sup> Gaa ne gaa nanij nij so' tacóo quij yo' me se ca'ne' Jesucristó suun rihaan nij so' se vaa se nata' nij so' rihaan a doj yuvií che'é se vaa quene'en nij so' a. Yo'o dínj gaa tu'va nij so' che'é rasuun quene'en nij so' a. Ndaa quisíj cavi' so' ne cunuu i'na' uún so', gaa ne ca'vee nata' nij so' se vaa quene'en nij so' daj quiran' so' síí ca'née Diose nıcaj yu'unj man yuvií, taj Jesucristó rihaan nij so' a.

<sup>10</sup> Ne yo'o nuû rá nij so' nana yo', ne xná'anj ndo'o nij so' man tuvi' ma'an nij so' me che'é me cataj Jesucristó se vaa cavi' so' ne cunuu i'na' uún so' a.

<sup>11</sup> Gaa ne xná'anj nij so' man Jesucristó, cataj nij so':

—Me che'é taj nij síí naqui'yaj cuu se-tucuanj Moisés rihaan yuvií se vaa asino ca'na' síí cu'naj Elías síí nata' se-nana Diose gaa naá, gaa ne ca'vee ca'ne' Diose cacun' che'é yuvií ga —taj nij síí tucu'yón se-nana Jesucristó, xná'anj nij so' man Jesucristó a.

<sup>12</sup> Gaa ne cataj Jesucristó rihaan nij so' a:

—Ya a'mii nij síí naqui'yaj cuu se-tucuanj Moisés, taj nij so' se vaa asino ca'na' síí cu'naj Elías, gaa ne naqui'yaj sa' so' nu' rasuun adonj.



Ne me che'é taj danj Diose se vaa sí ca'néé Diose nīcaj yu'unj man yuvii me se quiran' ndo'o so' sayuun ne nachri' nij yuvii nī'yaj nij yuvii man so', rá soj ga.

<sup>13</sup> Tzaj ne cataj xna'anj 'unj rihaan soj se vaa aj ca'na' ya sí cu'naj Elías, tzaj ne qui'yaj ya yuvii ndaa vaa me rá ma'an nij yuvii man so' ndaa vaa taj danj Diose che'é so' nanj adonj. Che'é dan ca'vee xcaj soj cuentá daj quirán' 'unj qui'yaj uún nij yuvii adonj —taj Jesucristó rihaan nij sí tucu'yón se-nanā so' a.

*Nanā nihánj taj xna'anj se vaa nahuun sq' 'o xnii nuu nanā chree nimán, qui'yaj Jesucristó a*

<sup>14</sup> Dan me se cuhi' nij so' rej nicun' yo'ó nij sí tucu'yón se-nanā Jesucristó, ne quene'en nij so' se vaa mán que'ee yuvii anicaj rej nicun' nij so', ne nicun' doj nij sí naqui'yaj cuu se-tucuanj Moisés, ne ca'mii cunu' uxrá nij so' ga nij sí tucu'yón se-nanā Jesucristó yo' a.

<sup>15</sup> Ne nu' quene'en nij yuvii man Jesucristó, ne nu' ca'anj ndo'o rá nij yuvii, ne cunanj nij yuvii ndaa rej vaj Jesucristó ca'mii nij so' ga so' a.

<sup>16</sup> Gaa ne xná'anj Jesucristó man nij yuvii a:

—Me che'é me ca'mii cunu' nij soj ga nij sí tucu'yón se-nanā ga —taj so' rihaan nij yuvii a.

<sup>17</sup> Gaa ne yo'ó nij yuvii cataj rihaan Jesucristó a:

—'Unj me se nicaj 'unj ta'níj ca'ná' 'unj nano' 'unj mán so', maestro. Ne ta'níj me se ya'mii so' che'é se nuu nanā chree nimán so',

<sup>18</sup> ne me rej ma'an me rá nanā chree quita'aa nanā chree man so', ne cagan' nanā chree man so' rihaan yo'ó, ne avii yatan' tu'va so', ne chá ruj so'

cúu yan' so', ne nuu chrúnj nu' so' nanj adonj. Ne cataj 'unj rihaan nij síi tucu'yón se-nana so' se vaa quirii nij so' man nana chree nimán ta'níj, tzaj ne ne ca'vee qui'yaj canaán nij so' ma' —taj snó'o yo' rihaan Jesucristó a.

<sup>19</sup> Gaa ne cataj Jesucristó rihaan nij yuvii a:

—Dan me se síi ne amán rá me soj sij man rihaan chumii nihánj cuano, ne a me daj cachej ga soj, ne a me daj gaa naj nimanj ni'yaj 'unj man soj, gaa ne ca'vee qui'yaj canaán soj ga. Nicaj soj man xnii ca'na' soj rihanj cuaj á —taj Jesucristó a.

<sup>20</sup> Gaa ne nicaj nij yuvii man xnii ca'na' nij yuvii rihaan Jesucristó a. Ne dan me se gaa quene'en nana chree man Jesucristó, ne nu' snúu xnii, ne naxru' xnii, qui'yaj nana chree yo', ne natúj rmii xnii, ne cavii yatan' tu'va xnii a.

<sup>21</sup> Gaa ne xná'anj Jesucristó man rej xnii, cataj Jesucristó:

—Me daj güii ran' ta'níi so' danj ga —taj Jesucristó rihaan rej xnii a.

<sup>22</sup> Gaa ne cataj rej xnii:

—Danj ran' so' asij ne'ej me so', ne que'ee ndo'o cagan' nana chree man so' rihaan ya'an do', rihaan na do', qui'yaj nana chree, che'é rej me rá nana chree cavi' so', tzaj ne sese ca'vee, ne cunuu 'ee rá so' manj ne racuíj so' man núj ruguanj —taj rej xnii yo' rihaan Jesucristó a.

<sup>23</sup> Gaa ne cataj Jesucristó rihaan so' a:

—Taj che'é cataj so' nana “sese ca'vee” ma'. 'O se síi amán rá ni'yaj man Diöse ro', ca'vee qui'yaj so' cunudanj nanj adonj —taj Jesucristó rihaan so' a.

24 Nu' ca'mii Jesucristó danj, ne nu' caguáj rej xnii, cataj so':

—Amán rá 'un̄j ni'yaj 'un̄j Diose á. Raçuíj so' manj cuchuman raj doj, Señor —taj so' rihaan Jesucristó a.

25 Dan me se quene'en Jesucristó se vaa cunan̄j ndo'o yuvii ca'na' nij yuvii rej nicun' so', ne che'é dan ca'ne' Jesucristó suun rihaan nana chree yo', ne cataj Jesucristó:

—Rihaan so' nana chree qui'yaj ya'mii ne qui'yaj so'o man xnii nihánj a'mij, ne cataj xna'an̄j 'un̄j rihaan so' se vaa curihan̄j so' cuaj nimán so' cuano, ne daj chihaa m̄j se catúj uún so' nimán so' mei —taj Jesucristó rihaan nana chree yo' a.

26 Gaa ne caguáj nana chree, ne guun snuj ndo'o xnii naxru' xnii, qui'yaj nana chree, ne dan me se curihan̄j nana chree nimán xnii yo' a. Gaa ne ase vaa sí cavi' ro', danj vaa xnii, naj xnii rihaan yo'óó, ne cataj nij yuvii se vaa ya ya cavi' so' a.

27 Tzaj ne quita'aa Jesucristó ra'a xnii, ne naxcaj Jesucristó man xnii, ne naxagaa so' a.

28 Dan me se corá catúj Jesucristó rá ve', ne inanj nij ma'an̄j nij sí tucu'yón se-nana so' ro', man rá ve' ga so', ne xná'an̄j nij so' man so', ne cataj nij so':

—Me che'é ne guun nucuaj núj quirii núj man nana chree yo' ga —taj nij so' rihaan Jesucristó a.

29 Gaa ne cataj Jesucristó rihaan nij so' se vaa:

—Xa' nana chree vaa danj ro', se ca'vee qui'yaj ní' curihan̄j nij so' nimán yuvii sese ne achíin ni'yaj ndo'o ní' rihaan Diose ma'. Dan me se cachinj ni'yaj uxrá', ne caraa guee ndo'o', gaa ne

ca'vee adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa cataj xna'anj uún Jesucristó se vaa cavi' so' ne cunuu i'na' uún so' a*

<sup>30</sup> Gaa ne cavii Jesucristó ga nij síi tucu'yón se-nana so' rej yo', ne ca'anj nij so' estadó Galilea, ne ne ca'vej rá Jesucristó xcaj nij yuvii cuentá me rej vaj so' a.

<sup>31</sup> 'Q se tucu'yón so' man nij síi tucu'yón se-nana so', ne dan me se cataj so' rihaan nij so' se vaa:

—'Q se síi ca'née Diose nica j yu'unj man yuvii mej, ne vaa güii, ne nago' nii manj rihaan yuvii adonj. Dan me se ticavi' nij yuvii manj, gaa ne cachén va'nuj güii, gaa ne cunuu i'na' uún 'unj nanj adonj —taj Jesucristó rihaan nij síi tucu'yón se-nana so' a.

<sup>32</sup> Tzaj ne ne cunó nij so' nana ca'mii Jesucristó, ne chu'vi' nij so' xna'anj nij so' man Jesucristó me taj nana yo' a.

*Nana nihánj taj xna'anj me síi me síi guun chij doj asa' guun chij Diose rihaan chumii nihánj a*

<sup>33</sup> Gaa ne catú j Jesucristó ga nij síi tucu'yón se-nana so' chuman' cu'naj Capernaum a.

Dan me se gaa mán nij so' rá ve', ne xna'anj Jesucristó man nij síi tucu'yón se-nana so', ne cataj so':

—Me che'é me canó tuvi' nij soj gaa vaj ní' chrej asij cua'aa ga —taj Jesucristó, xna'anj so' man nij so' a.

<sup>34</sup> Gaa ne cunuu dínj tu'va nij so' a. 'Q se gaa vaj nij so' chrej, ne canó tuvi' nij so' ga ma'an tuvi' nij

so' se vaa cataj nij so' me nij so' me síi guun chij doj a.

<sup>35</sup> Gaa ne ca'anj quitaj Jesucristó chruun xlá, ne canacúun so' man chuvij nij so' se vaa ca'na' nij so' rihaan so', gaa ne cataj so' rihaan nij so' a:

—Me ma'an 'o síi me rá guun chij doj, ne so' me síi guun síi nocó', ne ndaa guun so' mozó rihaan daj a tuvi' so' adonj —taj Jesucristó rihaan chuvij nij so' a.

<sup>36</sup> Gaa ne nicaj Jesucristó man 'o ne'ej, ne cachrón so' man ne'ej yo' tanuu nij síi tucu'yón se-nana so', ne na'yaan so' man ne'ej, ne cataj so' rihaan nij síi tucu'yón se-nana so' a:

<sup>37</sup> —Me ma'an 'o síi aráj cochroj ne a'mii sa' so' ga 'o ne'ej nihánj che'ej, ne adi' ma'anj me aráj cochroj ne a'mii sa' so' ga vaa nanj adonj. Dan me se síi a'mii sa' ga 'unj me se nuveé orún' 'unj me a'mii sa' so' ga ma'. Maan Diose ya síi ca'née mán 'unj rihaan chumii nihánj me aráj cochroj ya so' ne a'mii sa' ya so' ga vaa nanj adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa cataj xna'anj Jesucristó se vaa me ma'an síi ne unu' ga so' me tuvi' so' a*

<sup>38</sup> Cataj síi cu'naj Juan rihaan Jesucristó a:

—Quene'en núj man 'o síi ata' tu'va se-chuvií so', ne urihanj nana chree nimán nij yuvij, 'yaj so', nanj maestro. Tzaj ne caráan núj chrej ca'mii so' ne se qui'yaj so' danj, che'é se nuveé sij chée ga ní' me so', taj núj, nanj maestro —taj Juan rihaan Jesucristó a.

<sup>39</sup> Gaa ne cataj Jesucristó rihaan chuvij nij síi tucu'yón se-nana so' a:

—Ca'ne' sa' guee rá soj qui'yaj ma'an so' danj ei. 'O se taj a 'ó sít ata' tu'va se-chuvií 'unj ne qui'yaj so' suun sa' nocoo che'é se-chuvií 'unj, ne sít, gaa ne canicaj so' ne ca'mij chree so' che'é 'unj ma'.

<sup>40</sup> 'O se xa' sít ne unu' ga ní', tzaj ne tuvi' ní' me so' adonj.

<sup>41</sup> 'O se a me ma'an yo'o sít rqué doj na co'o nij soj che'é se-chuvií 'unj, ne ya ya cataj xna'anj 'unj rihaan soj se vaa daj chihaa mój se quinavij se sa' naru'vee Diose rihaan sít rqué doj na yo' co'o soj ma'.

*Nana nihánj taj xna'anj daj quiran' sít qui'yaj chi'ii nimán 'o sít cuchumán rá ni'yaj man Jesucristó a*

<sup>42</sup> "Dan me se me ma'an 'o sít qui'yaj chi'ii nimán 'o sít le'ej amán rá ni'yaj manj, ne ca'vee a doj cavii sa' sít qui'yaj danj sese toco' nii 'o yuvej xij váj 'núú trigó gaán chihá so' ne tagüej nii man so' rque na ya'anj nanj adonj. Dan me se doj a sayuun quiran' so', sese qui'yaj chi'ii so' nimán 'o sít le'ej amán rá ni'yaj manj adonj.

<sup>43</sup> "Dan me se sese ra'á so' me rá qui'yaj cacun', ne táa a se ca'ne' so' man yo', gaa ne se gaa nanj ca'anj so' rihaan ya'an qui'yaj yo' ei. Taj se 'yaj se nuj se taj yan vaj ra'á so', tzaj ne ca'vee cayáan so' ga Diose gaa ei. Tzaj ne sese quitaj ra'á so' ne qui'yaj yo' cacun', ne ca'anj so' rihaan ya'an, qui'yaj yo', ne dan me se ya'an yo' me se daj chihaa mój se quina'áj ya'an yo' nuvií nigan' a mei.

<sup>44</sup> Ne nij sít man rihaan ya'an yo' me se se ca'vee caví' xluú chá man nij so', ne daj chihaa mój se quina'áj ya'an rej cunuû nij so' cacaa nij so' a man adonj.

45 "Ne sese tacóó so' me rá qui'yaj cacun', ne táá a se ca'ne' so' man yo', gaa ne se gaa nanj ca'anj so' rihaan ya'an qui'yaj yo' nanj ei. Taj se 'yaj se nuj se taj yan vaj tacóó so', tzaj ne ca'vee cayáán so' ga Diöse ei. Tzaj ne sese quitaj tacóó so' ne qui'yaj yo' cacun', ne ca'anj so' rihaan ya'an, qui'yaj yo' ei.

46 Ne nij síi man rihaan ya'an yo' me se se ca'vee cavi' xluú chá man nij so', ne daj chihaa mój se quina'áj ya'an rej cunuú nij so' cacaa nij so' a man adonj.

47 "Veé danj uún sese me rá rlij rihaan so' qui'yaj yo' cacun', ne táá a se quirii so' man yo', ne síi rihaan canuu gaa so', tzaj ne ca'vee catuu so' rej guun chij Diöse ei. Tzaj ne sese cunuú rlij rihaan so' ne qui'yaj yo' cacun', ne ca'anj so' rihaan ya'an, qui'yaj yo' ei.

48 Ne nij síi man rihaan ya'an yo' me se se ca'vee cavi' xluú chá man nij so', ne daj chihaa mój se quina'áj ya'an rej cumān nij so' cacaa nij so' a man adonj.

49 "O se vaa sayuun quirān' cunudanj nij rasuun man rihaan chumii nihánj, qui'yaj Diöse, ne dan me se ase vaa nuu sa' nee 'yaj yaan ro', danj gaa cunu sa' nij síi man rihaan chumii nihánj, qui'yaj ya'an ei.

50 "Ne ase vaa yaan ga chraa ro', danj vaa nij soj sij tucu'yón se-nānāj ga chumii nihánj, ne vaa se uun ndo'o yaan ei. Dan me se sese ne 'ne' chá yaan yo', gaa ne taj se qui'yá' cunu sa' yaan gaa a ma'. Che'é dan, ase vaa yaan 'ne' sa' ro', danj gaa soj, ne dínj cayáán soj ga tuvi' soj, ne ca'vee cunu sa' chumii nihánj qui'yaj soj nanj adonj

—taj Jesucristó rihaan nij sí tucu'yón se-nana so' a.

## 10

*Nana nihánj taj xna'anj se vaa ne nó xcúún yuvii quiri'ij yuvii man nica yuvii a*

<sup>1</sup> Gaa ne curihañj Jesucristó rej yo', ne ca'anj so' ndaa rej tu'va chraá cu'naj Jordán, ndaa estadó Judea a. Gaa ne cunuu chre' uún que'ee yuvii rihaan so', ne tucu'yón uún so' se-nana so' rihaan nij yuvii, ndaa vaa u'yón so' 'yaj so' a.

<sup>2</sup> Gaa ne ca'na' doj sí fariseo rihaan so', ne xná'anj nij so' man Jesucristó sese no xcúún snó'o quiri'ij snó'o man nica so' a. Danj cataj nij sí fariseo, che'é se guun rá nij so' cuta' nij so' cacun' xraá Jesucristó che'é nana ca'mii Jesucristó a.

<sup>3</sup> Gaa ne cataj Jesucristó rihaan nij so' a:

—Ne daj cataj sí cu'naj Moisés qui'yaj soj ga  
—taj Jesucristó, xná'anj so' man nij sí fariseo a.

<sup>4</sup> Gaa ne cataj nij so' se vaa:

—Ca'ne' sí cu'naj Moisés suun se vaa naxcaj yuvii yanj rihaan nij sí nicaj suun, ne ca'vee quiri'ij yuvii man nica yuvii á —taj nij sí fariseo a.

<sup>5</sup> Gaa ne cataj Jesucristó rihaan nij so' a:

—Maan che'é se sí nichraj ndo'o rá me nij soj ro', che'é dan cachrón Moisés nana yo' rihaan yanj cunó soj a.

<sup>6</sup> Tzaj ne asij qui'yaj Diose chumii, ne qui'yaj Diose snó'o, ne qui'yaj Diose chana, ne vij roj so' me yuvii, qui'yaj Diose a.

<sup>7</sup> Che'é dan tanáj snó'o man rej so', man nii so' do',



<sup>8</sup> ne ase vaa orún' yuviij ro', danj gaa snó'o ga nica snó'o, taj danj Diose a. Dan me se nuveé vij ran' yuviij me roj so' asij xcaj tuvi' roj so' a ma'. 'O se ase vaa orún' yuviij ro', vaa roj so' nanj adonj.

<sup>9</sup> Dan me se Diose me síi qui'yaj xcaj tuvi' roj so', ne che'é dan ne nó xcúún a 'ó yuviij ca'ne' tanuu yuviij man roj so' ma' —taj Jesucristó rihaan nij síi fariseo yo' a.

<sup>10</sup> Dan me se gaa man nij síi tucu'yón se-nana Jesucristó rá 'o ve' ga so', gaa ne xná'anj nij so' man so' che'é nana ca'mii so' rihaan nij síi fariseo a.

<sup>11</sup> Ne cataj Jesucristó rihaan nij so' a:

—Me ma'an 'o síi ri'ij man nica ne xcaj so' man yo'ó chana, ne tumé ndo'o so' cacun', ne nij qui'yaj so' rihaan nica so' ei.

<sup>12</sup> Tzaj ne sese cunanj chana rihaan nica no', ne xcaj no' man yo'ó chii, ne tumé ndo'o no' cacun' uún adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj me che'é caran' rá Jesucristó ni'yaj so' man ne'ej a*

<sup>13</sup> Gaa ne nicaj nij yuviij man nij ne'ej ca'na' nij yuviij rihaan Jesucristó, che'é rej cuta' Jesucristó ra'a so' raaj nij ne'ej a. Tzaj ne nij síi tucu'yón se-nana Jesucristó me se cataj xna'anj nij so' rihaan nij yuviij se vaa ne nó xcúún nij ne'ej ca'na' nij ne'ej rihaan Jesucristó, taj nij so' a.

<sup>14</sup> Tzaj ne xcaj Jesucristó cuentá daj qui'yaj nij síi tucu'yón se-nana so', gaa ne ca'maan rá Jesucristó, ne cataj so' rihaan nij síi tucu'yón se-nana so' a:

—Ca'ne' rá soj ca'na' nij ne'ej rihanj á. Se caráán soj chrej rihaan nij ne'ej mei. 'O se tucua nij síi

vaa danj ro', me rej yanj Diose uun chij Diose nanj adonj.

<sup>15</sup> Ya ya cataj xna'anj 'unj rihaan soj se vaa me ma'an 'o sí na'vej rá guun chij Diose nimán, ndaa vaa uun chij Diose nimán ne'ej, ne daj chihaa míj se ca'vee cayáan so' ga Diose asa' guun chij Diose rihaan chumij nihánj ma' —taj Jesucristó rihaan nij sí tucu'yón se-nana so' a.

<sup>16</sup> Gaa ne na'yaan Jesucristó man nij ne'ej, ne uta' so' ra'a so' raa nij ne'ej, ne achín ni'yaj so' rihaan Diose che'é nij ne'ej a.

*Nana nihánj taj xna'anj che'é yo'o sí me rá cayáan ga Diose nu' cavii nu' ca'anj a*

<sup>17</sup> Dan me se gaa nayón Jesucristó chrej, ne dan me se cunanj 'o sí tachruu yo' ca'na' so' rihaan Jesucristó, ne canicun' ruj sí tachruu yo' rihaan Jesucristó, ne xná'anj so' man Jesucristó, cataj so', ne:

—Maestro. Sí sa' uxrá mé so' adonj. Daj qui'yáj ne ca'vee cayánj ga Diose nu' cavii nu' ca'anj ga —taj sí tachruu yo', xná'anj so' man Jesucristó a.

<sup>18</sup> Gaa ne cataj Jesucristó rihaan so' a:

—Me che'é cataj so' se vaa sí sa' uxrá mej ga. 'O se orún' Diose me sí sa' ei.

<sup>19</sup> Ne aj ne'én so' nij nana nocoo ya ya nana cataj xna'anj Diose se vaa canoco' ní' á. Dan me se taj nana yo': “Se ticaví' so' yuvij ma'. Se cotoj so' ga chana nica yo'ó yuvij ma'. Se qui'yaj ituu so' si'yaj yo'ó yuvij ma'. Se nanó so' cuentó ne che'é yuvij ma'. Se tiha' yu'unj so' man yuvij che'é sa'anj ma'. Caraa cochróo so' rihaan rée so' do', rihaan ní so' do' á” —taj Jesucristó rihaan sí tachruu yo' a.

20 —Asij gaa mej xnii me ve'é unó 'un̄j nu' nij nanā yo', nan̄j maestro —taj so' rihaan Jesucristó a.

21 Gaa nē ni'yaj uxrá Jesucristó man so', nē cunuu 'ee rá Jesucristó man so', nē cataj Jesucristó rihaan so' a:

—Daj orún' rasuun achiin ya mán so' nan̄j ei. Cavīj so' ca'an̄j so', nē cutu'vee so' nu' si'yáá so', nē sa'an̄j quirí' so' ro', caxrīj so' ston nij síi nique, nē cuman̄ ndo'o si'yáá so' rej xta', qui'yaj Diose nan̄j ei. Nē dan me se ca'na' so', nē canocó' so' man̄j, ca'an̄j ní' á —taj Jesucristó a.

22 Gaa nē quiri' ndo'o rá síi tachruu, qui'yaj se-nanā Jesucristó, nē ca'an̄j uun so', nē nanó ndo'o rá so' a. 'O se síi ru'vee me so', nē vaa ndo'o si'yaj so' a.

23 Gaa nē ni'yaj Jesucristó, nē cataj so' rihaan nij síi tucu'yón se-nanā so' a:

—Sayuun uxrá vaa quisij nij síi vaa ndo'o sa'an̄j rihaan cayáán ga Diose asa' guun chij Diose rihaan chumij nihánj nan̄j adon̄j —taj Jesucristó rihaan nij síi tucu'yón se-nanā so' a.

24 Gaa nē ca'an̄j ndo'o rá nij so' gaa cuno nij so' nanā yo' nanā ca'mii Jesucristó a. Gaa nē cataj uún Jesucristó rihaan nij so' a:

—Sayuun uxrá vaa quisij yuvij cayáán nij yuvij ga Diose asa' guun chij Diose rihaan chumij nihánj nan̄j chuguan̄j.

25 Dan me se ne'en soj se vaa sayuun ndo'o vaa cachēn xcuu camelló rihaan yu'uj taj tacúún cúu nuvá, tzaj nē cuanō nihánj me se cataj xna'an̄j 'un̄j rihaan soj se vaa ca'vee a doj cachēn xcuu yo' yu'uj taj tacúún cúu nuvá, ndaa rá se vaa síi ru'vee, nē se

guun cachen so' cayáan so' ga Diose asa' guun chij Diose rihaan chumii nihánj a ma' —taj Jesucristó rihaan nij so' a.

<sup>26</sup> Gaa ne ca'anj ndo'o rá nij so', ne cataj nij so' rihaan Jesucristó a:

—Che'é dan me se me síi guun nucuaj quinanii rihaan sayuun ga —taj nij so', xná'anj nij so' man so' a.

<sup>27</sup> Ni'yaj Jesucristó man nij so', ne cataj so':

—Se guun nucuaj yuvii quinanii ma'an nij yuvii rihaan sayuun ma'. Sayuun uxrá vaa rihaan nij so' nanj adonj. Tzaj ne xa' rihaan Diose me se ne sayuun a doj vaa rihaan so' a ma'. Canó rasuun ca'vee qui'yaj so' nanj adonj —taj Jesucristó a.

<sup>28</sup> Gaa ne guun che'e Pedró cataj Pedró:

—Aj tanáj núj nu' si'yaj núj, ne canoco' núj mán so' á —taj Pedró rihaan Jesucristó a.

<sup>29</sup> Gaa ne cataj Jesucristó:

—Ya ya cataj xna'anj 'unj rihaan nij soj se vaa síi tanáj ve' tucúa tanáj tinúú tanáj ra'vij tanáj nii tanáj rej tanáj ta'níi tanáj to'óo tanáj che'é se me rá so' canoco' so' manj ne nata' so' se-nanaj nana sa' rihaan yuvii,

<sup>30</sup> ne cientó doj a rasuun quir*i*' uún so' gaa vaa i'na' so' rihaan chumii nihánj cuano adonj. Dan me se cuman que'ee ve' tucúa so' do', tinúú so' do', ra'vij so' do', nii so' do', ta'níi so' do', to'óo so' do', rihaan so' gaa vaa i'na' so' rihaan chumii nihánj, tzaj ne vaa sayuun quiran' so' che'é 'unj adonj. Ne asa' guun chij Diose rihaan chumii nihánj me se yo'o cayáan so' ga Diose nu' cavii nu' ca'anj nanj adonj.

<sup>31</sup> Tzaj ne que'ee nij sí guun chij ndo'o rihaan chumiñ nihánj ro', guun nij so' sí noco' ei. Ne que'ee nij sí ne guun chij rihaan chumiñ nihánj me se guun chij nij so', qui'yaj Diose nanj adonj —taj Jesucristó rihaan nij sí tucu'yón se-nanā so' a.

*Nana nihánj taj xna'anj se vaa síj va'nuj cataj xna'anj Jesucristó se vaa cavi' so' ne cunu u'na' uún so' a*

<sup>32</sup> Dan me se vaj nij so' chrej avii nij so' chuman' Jerusalén, ne táa yaan Jesucristó rihaan nij sí tucu'yón se-nanā so', ne ma'anj ndo'o rá nij so', ne nij sí noco' xcó nij so' me se cuchu'vi' ndo'o nij so' a. Dan me se narii Jesucristó man chuvij nij sí tucu'yón se-nanā so', ne guun che'e so' cataj xna'anj so' rihaan nij so' daj quirān' so' a.

<sup>33</sup> Dan me se cataj Jesucristó rihaan nij so', ne:

—Nihánj me ca'anj ní chuman' Jerusalén, ne quita'aa nii manj sij ca'neé Diose nicaj yu'unj man yuvi, ne nago' nii manj rihaan nij xrej ata suun noco'oj doj do', rihaan nij sí naqui'yaj cu se-tucuanj Moisés rihaan yuvi do' a. Ne cuta' nij so' cacun' xráj, ne cataj nij so' se vaa cavi' 'unj a. Gaa ne nago' nij so' manj rihaan nij sí yanj,

<sup>34</sup> ne ca'nga' naco'oj nij sí yanj quene'en nij so' manj, ne quirij talúj nij so' rihanj, ne go' nij so' cuartá xráj, ne ticavi' nij so' manj a. Gaa ne cachē va'nuj güii, gaa ne cunu u'na' uún 'unj, qui'yaj Diose ei —taj Jesucristó rihaan chuvij nij sí tucu'yón se-nanā so' a.

*Nana nihánj taj xna'anj se vaa achún ni'yaj sí cu'naj Jacobo do', sí cu'naj Juan do', se vaa cata roj so' suun sa' doj qui'yaj Jesucristó a*

35 Gaa ne cuchi' sí cu'naj Jacobo do', sí cu'naj Juan do', rihaan Jesucristó, ne ta'níí sí cu'naj Zebedeo me roj so' a. Gaa ne cataj roj so' rihaan Jesucristó a:

—Me rá rój se vaa qui'yáá so' ndaa vaa cachinj ni'yaj rój rihaan so' che'é rój, maestro —taj roj so' rihaan Jesucristó a.

36 Gaa ne cataj Jesucristó rihaan roj so' a:

—Daj qui'yáj che'é roj soj, rá roj soj ga —taj so', xná'anj so' man roj so' a.

37 Gaa ne cataj roj so' rihaan Jesucristó a:

—Cataj xna'anj so' se vaa asa' guun chij so' rihaan chumij nihánj, ne quitaj rój x'núú so', ne cata rój suun sa' doj, qui'yáá so' á. Dan me se yo'ó rój cayáán rej nuva' so', ne yo'ó rój cayáán rej nichruún so', ne quirii ta'nga' rój ga so', cataj so', rá rój a —taj roj sí cu'naj Jacobo ga Juan rihaan Jesucristó a.

38 Gaa ne cataj Jesucristó rihaan roj tinuj roj so' a:

—Ne ne'en roj soj me rasuun cachín ni'yaj roj soj rihanj nihánj a ma'. 'O se guun nucuaj roj soj quirán' roj soj sayuun ndaa vaa quirán' 'unj na' —taj Jesucristó, xná'anj Jesucristó man roj so' a.

39 —Guun nucuaj rój ei —taj roj so' a.

Gaa ne cataj Jesucristó rihaan roj so' a:

—Ya ya quirán' roj soj sayuun gaj nanj á.

40 Tzaj ne ne nó xcúnj cataj xna'anj 'unj me sí cayáán x'núú 'unj rej nuva' 'unj do', rej nichrunj do', ma'. Qrún' Diose me sí cataj xna'anj me sí quirii ta'nga' gaj nanj adonj —taj Jesucristó a.

41 Gaa ne cuno yo'ó chí' nij sí tucu'yón se-nana Jesucristó se vaa ca'mii roj sí cu'naj Jacobo ga

Juan rihaan Jesucristó, gaa ne guun che'e nij so' ca'maan rá nij so' ni'yaj nij so' man roj so' a.

<sup>42</sup> Gaa ne canacúun Jesucristó man cunudanj nij so' se vaa ca'na' nij so' rihaan so' a. Ne cataj so':

—Ne'en soj se vaa nij sí atā suun man rihaan chumij nihánj me se rii ta'nga' uxrá nij so' rihaan tuvi' nij so' nanj adonj.

<sup>43</sup> Tzaj ne se gaa danj se a nuj ní' qui'yaj ní' ma'. 'O se sese me rá ní' guun chij ní' rihaan tuvi' ní', ne guun ní' sí qui'yaj suun rihaan taran' tuvi' ní',

<sup>44</sup> ne ase vaa mozó ro', danj gaa xa' ní' rihaan tuvi' ní' nanj adonj.

<sup>45</sup> Dan me se ca'néé Diose manj nıcaj yu'unj 'unj man yuvii, tzaj ne ne ca'na' 'unj ne guun nij yuvii mozó rihanj ma'. 'O se ca'ná' 'unj qui'yaj suun ma'anj rihaan nij yuvii nanj adonj. Ne ca'ná' 'unj nayon ma'anj rihaan yuvii ne cavii' 'unj che'é cacun' atā nij so', gaa ne cavii sa' uxrá nij so', qui'yáj nanj adonj —taj Jesucristó a.

*Nana nihánj taj xna'anj se vaa naxra' rihaan sí cu'naj Bartimeo, qui'yaj Jesucristó a*

<sup>46</sup> Gaa ne catúj nij so' chuman' Jericó a. Gaa ne curihanj Jesucristó do', nij sí tucu'yón se-nana so' do', que'ee yuvii do', chuman' Jericó, ne dan me se yáan 'o sí tuchrii cu'naj Bartimeo tu'va chrej, ne ta'níí sí cu'naj Timeo me so', ne sí achíin caridad me so' a.

<sup>47</sup> Gaa ne xcaj so' cuentá se vaa Jesucristó sí cavii chuman' Nazaret me sí cachēn rej ne so', ne che'é dan guun che'e so' caguáj so', ne cataj so':

—Ya ya ta'níi ta'nij si'no síi cu'naj David síi cane gaa naá mé so', Jesús. Cunuu 'ee rá so' manj ei —taj so' a.

<sup>48</sup> Tzaj ne:

—Dínj tu'vá so' á —taj que'ee nij yuvij rihaan so' a.

Tzaj ne doj a nucuaj caguáj so', cataj so':

—Ta'níi ta'nij si'no síi cu'naj David síi cane gaa naá ei. Cunuu 'ee rá so' manj ei —taj uún so' a.

<sup>49</sup> Gaa ne canicun' Jesucristó, ne ca'ne' Jesucristó suun rihaan nij síi nicun' ga so' se vaa ca'anj nacaj nij so' man síi tuchrij yo' ne ca'na' so' rihaan Jesucristó a. Gaa ne ca'anj canacunj nij so' man síi tuchrij, ne cataj nij so':

—Yo'o ca'nej nucuaj nimán so' ei. Nacúún so' mán so', ne naxumaan so', ca'anj ní' á —taj nij so' rihaan síi tuchrij cu'naj Bartimeo a.

<sup>50</sup> Gaa ne tanáj so' yatzíj taj xráá so', ne güéj so', ne ca'na' so' rihaan Jesucristó a.

<sup>51</sup> Gaa ne xná'anj Jesucristó man so', cataj Jesucristó:

—Daj qui'yáj mán so', rá so' ga —taj Jesucristó a.

Ne:

—Cunuu sa' rihanj, raj, maestro —taj so' rihaan Jesucristó a.

<sup>52</sup> Gaa ne cataj Jesucristó rihaan so' a:

—Ca'vee ca'anj so' á. Maan che'é se amán rá so' ni'yaj so' manj ro', che'é dan cunuu sa' rihaan so' ei —taj Jesucristó rihaan so' a.

Nu' ca'mii Jesucristó danj, ne nu' curuvi' rihaan síi tuchrij yo', ne ca'anj so' ga Jesucristó chrej vaj Jesucristó a.



# 11

*Nana nihánj taj xna'anj daj qui'yaj Jesucristó gaa catúj Jesucristó chuman' Jerusalén a*

<sup>1</sup> Gaa ne quinichrun' Jesucristó ga nij síi tucu'yón se-nana so' roj chuman' cu'naj Betfagé ga Betania, ne roj chuman' yo' ro', naj nichrun' tu'va chuman' Jerusalén, ne tacóo quij cu'naj Quij man Chruun Olivó naj roj chuman' yo' a. Gaa ne ca'née Jesucristó man vij tuvi' nij síi tucu'yón se-nana so' ca'anj rque chuman' Betfagé yo',

<sup>2</sup> ne cataj so' rihaan roj so' a:

—Cavii roj soj ca'anj soj, ne catuu roj soj chuman' nihánj chuman' naj rihaan ní', ne nu' catúj roj soj, ne nu' nari' roj soj man yo' o burró le'ej ya'anj numii a. Dan me se nache roj soj man xo', ne nicaj roj soj ca'na' roj soj rihanj nihánj á.

<sup>3</sup> Ne sese xna'anj nii man roj soj me che'é 'yaj roj soj danj ga burró, ne cataj roj soj: “Síi 'nij ra'a man ní' achiin xcuu nihánj rihaan chuguanj. Ne nu' navij suun rihaan burró nihánj, ne nu' ca'nej uún so' man núj ca'na' tanáj uún núj man burró nihánj ei”, cataj roj soj á —taj Jesucristó rihaan roj síi tucu'yón se-nana so' a.

<sup>4</sup> Dan me se ca'anj roj so', ne catúj roj so' chuman', ne nari' roj so' man burró le'ej, ne nicun' xo' rá 'o callé rihaan ta'yaa, ne numii xo' a. Dan me se nache roj so' man xo' a.

<sup>5</sup> Ne nicun' doj nij yuvii rej yo', ne xna'anj nij so' man roj so', ne cataj nij so':

—Me che'é nache roj soj burró ga —taj nij síi nicun' rej yo' a.

<sup>6</sup> Ne ca'mii roj sí tucu'yón se-nānā Jesucristó ndāa vaa ca'ne' Jesucristó suun rihaan roj so', gaa ne ca'vej rá nij sí nicun' rej yo' nīcaj roj so' burró ca'nā' roj so' a.

<sup>7</sup> Dan me se nicaj roj so' burró ca'na' uún roj so' rej nicun' Jesucristó, ne cuta' roj so' sagan' roj so' xráá burró, ne cavii Jesucristó xráá burró yo' a.

<sup>8</sup> Dan me se uchruj ndo'o nij yuvij yatzij sagan' nij so' rá chrej, ne achén Jesucristó ga burró yo' rihaan yatzij a. Ne yo'ó ta'aj nij yuvij ro', a'ne' nij so' rcoj ra'a chruun do', coj man tacaan do', uchruj nij so' rá chrej, ne achén Jesucristó ga burró le'ej a.

<sup>9</sup> Ne vaj yuvij taj yaan rihaan Jesucristó, ne 'na' yuvij noco' rej xco Jesucristó, ne caguáj nij yuvij, cataj nij yuvij:

—Carāa guee ní' rihaan Diose ei. 'Na' sí ca'née sí 'nij ra'a man ní' ei. Se luj ndo'o me 'yaj Diose che'é ní' ei.

<sup>10</sup> Cunaj uxrā vaa 'na' sí guun chij ndāa vaa guun chij xii ní' sí cu'naj David gaa naá ei. Carāa guee ní' rihaan Diose sí nicun' xta' ei —taj nij yuvij yo', caguáj nij so' a.

<sup>11</sup> Gaa ne catúj taran' nij so' rihaan nuvií noco ne chuman' Jerusalén, ne ni'yaj Jesucristó man cunudanj nij rasuun man anicaj rihaan nuvií noco, ne maan che'é se nichrun' guun rmi', ne che'é dan curihanj uún Jesucristó ga chuvij nij sí tucu'yón se-nānā so', ne nanicaj so' ca'anj so' chuman' Betania a.

*Nana nihánj taj xna'anj daj ca'mii Jesucristó rihaan chruun nuvi' chruj raq a*

12 Ne yo'ó güii me se curihanj uún nij so' chuman' Betania, ne na'aan rque Jesucristó a.

13 Gaa ne gan' nicun' 'o chruun man chruj higó quene'en Jesucristó, ne taj coj raá chruun yo' a. Ne cuchi' so' tacóo chruun, ne ni'yaj so', ne taj vaj a doj chruj man raá chruun a. Maan nanj coj un táá raá chruun yo' a. 'O se nuveé tió man chruj higó me yo' a.

14 Gaa ne cataj Jesucristó rihaan chruun a:

—Daj chihaa míj se cumán chruj raá so' cha yuvií a ma' —taj so' rihaan chruun man chruj higó yo' a.

Ne cuno nij síi tucu'yón se-nana so' se vaa ca'mii so' danj rihaan chruun yo' a.

*Nana nihánj taj xna'anj se vaa quirii Jesucristó man nij yuvií tu'vej rasuun man rá nuvií nocoo a*

15 Gaa ne catúj Jesucristó ga nij síi tucu'yón se-nana so' chuman' Jerusalén, gaa ne catúj Jesucristó rá nuvií nocoo, gaa ne guun che'e so' quirii so' man nu' nij síi tu'vej rasuun do', man nij síi quiránj rasuun man rá nuvií nocoo do' a. Ne tiguíj ra'a so' nij chruun mesá natuná nii sa'anj rihaan, ne tiguíj ra'a so' chruun xlá taj nij síi tu'vej cha'aan a.

16 Ne caráán so' chrej se cataj nij yuvií rasuun 'ee cachén nij so' rque nuvií a.

17 Gaa ne tucu'yón so' man nij síi man rihaan nuvií, ne cataj so':

—Ya uxrá danj Diose taj se vaa tucua Diose rej na'víj ndaa nij yuvií yaníj rihaan Diose me nihánj á. Tzaj ne guun tucua síi ituu man tucua Diose nihánj, qui'yaj soj nanj á —taj Jesucristó a.

18 Ne cuno nij xrej do', nij síi naqui'yaj cuu se-tucuanj Moisés rihaan yuvi do', se-nana Jesucristó, gaa ne nano' uxrá nij so' daj qui'yaj nij so' ne ca'vee caví' Jesucristó a. 'O se chu'vi' nij so' ni'yaj nij so' man Jesucristó, che'é se ca'anj ndo'o rá cunudanj nij yuvi cuno nij yuvi nana tucu'yón Jesucristó a.

19 Tzaj ne ca'anj güii, ne nichrun' guun rmi', ne curihanj uún Jesucristó ga nij síi tucu'yón se-nana so' chuman' Jerusalén ca'anj nij so' a.

*Nana nihánj taj xna'anj daj quiran' chruun man chruj higó raq a*

20 Gaa ne rej na'yaan yo'ó güii me se vaj Jesucristó ga nij síi tucu'yón se-nana so' chrej, ne cachén nij so' rej nicun' chruun higó ca'mii Jesucristó rihaan gaa güii quii, ne dan me se yo'o naco ndaa yáa nu' chruun yo' a.

21 Dan me se nanuj rá síi cu'naj Pedró daj ca'mii Jesucristó rihaan chruun yo', ne che'é dan cataj so' rihaan Jesucristó a:

—Ni'yaj so', maestro. Naco nu' chruun ca'mii chreé so' rihaan gaa quii nanj á —taj Pedró rihaan Jesucristó a.

22 Gaa ne cataj Jesucristó rihaan taran' nij so' a:

23 —Cuchuman rá soj ni'yaj soj Diose ei. Ya ya cataj xna'anj 'unj rihaan soj se vaa me ma'an 'o síi cataj rihaan ndaa quij xcaan yo' se vaa curihanj quij rej nicun' quij ne ca'anj nij quij rque na ya'anj, ne sese se guun vij rá so' ne cuchuman ya rá so' se vaa guun nu' ndaa vaa cataj so', ne ya guun ndaa vaa cataj so' adonj.

<sup>24</sup> Che'é dan cataj xna'anj 'unj rihaan soj se vaa nu' se vaa cachinj ni'yaj soj rihaan Diose ro', sese cuchuman rá soj se vaa aj qui'yaj Diose danj che'é soj, ne ya ya guun ndaa vaa cachín ni'yaj soj adonj.

<sup>25</sup> Ne gaa nicun' soj achín ni'yaj soj rihaan Diose, ne sese vaa cacun' qui'yaj yo'o so' rihaan soj, ne caraa x'naa soj che'é cacun' tumé tuvi' soj, gaa ne ca'vee caraa x'naa Rej soj sí nicun' xta' ni'yaj so' cacun' tumé ma'an soj adonj.

<sup>26</sup> Tzaj ne sese se ca'vej rá soj caraa x'naa soj che'é cacun' qui'yaj tuvi' soj rihaan soj, ne daj chihaa míj se tinavij Rej soj sí nicun' xta' cacun' tumé ma'an soj a ma' —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa xná'anj nii man Jesucristó me sí ca'ne' suun rihaan so' qui'yaj so' ndaa vaa 'yaj so' a*

<sup>27</sup> Gaa ne catúj uún Jesucristó ga nij sí tucu'yón se-nana so' rque chuman' Jerusalén, gaa ne chéé Jesucristó rá nuvíi nocoo, ne cuchi' nij xrej ata suun nocoo doj do', nij sí naqui'yaj cu se-tucuanj Moisés rihaan yuvij do', nij sí uun chij rihaan nij yuvij do', rihaan so',

<sup>28</sup> gaa ne cataj nij so' rihaan so' a:

—Me sí ca'ne' suun rihaan so' qui'yáa so' ndaa vaa 'yáa so' ga —taj nij so' a.

<sup>29</sup> Gaa ne cataj Jesucristó rihaan nij so' a:

—Ne vaa yo'o nana xna'anj 'unj man nij soj, ne sese ya cataj xna'anj nij soj nana yo' rihanj, ne cataj xna'anj 'unj rihaan soj me sí ca'ne' suun rihanj a.

<sup>30</sup> Dan me se me sí ca'ne' suun rihaan sí cu'naj Juan cuta' ne so' man yuvii, rá soj ga. Ma'an Juan cavii raá na'. Ase Diose cataj xna'anj rihaan so' xa'. Cataj xna'anj nij soj rihanj á —taj Jesucristó a.

<sup>31</sup> Gaa ne nuchruj raá ndo'o nij so' ga tuvi' nij so', ne cataj nij so':

—Sese cataj ní' se vaa Diose ca'ne' suun rihaan sí cu'naj Juan cuta' ne so' man yuvii, ne cataj Jesucristó rihaan ní' me che'é ne cuchuman rá ní' nana ca'mii Juan, cataj so' a.

<sup>32</sup> Tzaj ne daj chihaa mǐj se ca'vee cataj ní' se vaa ma'an Juan cavii raá qui'yaj danj ma' —taj nij so' rihaan tuvi' nij so', che'é se cuchu'vi' nij so' ni'yaj nij so' man nij yuvii a.

<sup>1</sup>Q se nij yuvii me se sí ca'née Diose nata' se-nana Diose rihaan yuvii me ya sí cu'naj Juan, rá cunudanj nij yuvii a.

<sup>33</sup> Gaa ne cataj nij so' rihaan Jesucristó a:

—Ne ne'en núj me sí ca'ne' suun rihaan sí cu'naj Juan cuta' ne so' man yuvii ma' —taj nij so' a.

—Che'é dan se cataj xna'anj 'unj rihaan nij soj me sí ca'ne' suun rihanj qui'yáj ndaa vaa 'yáj ma' —taj Jesucristó rihaan nij so' a.

## 12

*Nana nihánj me cuentó nanó Jesucristó che'é yuvii chí'ii 'yaj suun rihaan yo'óo a*

<sup>1</sup> Gaa ne guun che'e Jesucristó nanó so' cuentó rihaan nij so' a:

—Dan me se cuchruj yo'o so' naa chruj uvá, ne qui'yaj so' chingá nu' anicaj tu'va naa yo', gaa ne gáán so' yu'uj rej xtun' chruj uvá ne cavii na, ne

cune' so' 'o ve' nata' cayáán nij síi cutumé naa yo' a. Gaa ne tanáj so' naa yo' rihaan síi qui'yaj suun naa yo', ne curihanj so' ca'anj so' gan' a.

<sup>2</sup> Cachén doj yavii, ne quisij yavii cuta nii chruj uvá, ne ca'néé síi xnaa yo' man yo'o se-mozó so' rihaan nij síi nuu tumé xnaa so' a. Me rá so' ca'na' nıcaj se-mozó so' doj chruj uvá rihaan ma'an so' a.

<sup>3</sup> Gaa ne quita'aa nij síi nuu tumé naa man se-mozó síi xnaa, ne go' uxrá nij so' chruun xráa so', ne ca'néé nij so' man so' rihaan síi xnaa a. Tzaj ne a doj chruj uvá ne nıcaj so' ca'anj so', qui'yaj nij so' a ma'.

<sup>4</sup> Gaa ne ca'néé síi xnaa man yo'ó mozó rihaan nij síi nuu tumé xnaa so' uún a. Tzaj ne go' nij so' raa so', ne qui'yaj chí'ıı nij so' man so' a.

<sup>5</sup> Gaa ne ca'néé síi xnaa yo'ó mozó uún, ne ticavi' nij síi nuu tumé naa man so', ne que'ee doj mozó ca'néé uún síi xnaa, ne ta'aj nij so' go' nij síi nuu tumé naa xráa, ne yo'ó ta'aj nij so' ticavi' nij síi nuu tumé naa,

<sup>6</sup> ne daj orún' so' quináj, ne síi quináj me ta'nıı síi xnaa, ne 'ee ndo'o rá síi xnaa man ta'nıı so' a. Tzaj ne ca'néé síi xnaa yo' man ta'nıı so' rihaan nij síi tumé xnaa so' a. “Caraa cochroj nij síi tumé naa rihaan ta'nııj sese ca'anj ta'nııj saj xee”, taj síi xnaa yo' a.

<sup>7</sup> ”Tzaj ne cataj nij síi tumé naa rihaan tuvi' nij so': “Síi nihánj me síi guun xnaa naa nihánj vaa güıı ei. Che'é dan ticavi' ní' man so', ne vaa güıı, ne guun xnaa ma'an ní' man naa nihánj chuguanj”, taj nij so' ni'yaj nij so' man ta'nıı síi xnaa a.

<sup>8</sup> Gaa ne quita'aa nij so' man ta'nıı síi xnaa yo', ne ticavi' nij so' man so', ne quiri'ııj nij so' man so'

xe' a.

<sup>9</sup> Ne daj qui'yaj sí xnaa man nij sí tumé xnaa so', rá soj ga. Dan me se ca'na' so', ne ticavi' so' man nij so', ne tucuachén so' xnaa so' rihaan yo'ó sí tumé xnaa so' a.

<sup>10</sup> Ne me che'é ne nayaá nij soj nana nihánj nana no rihaan danj Diose ga: “Yuvej quiri'lj nij sí cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj.

<sup>11</sup> Ma'an sí 'nij ra'a man ní' qui'yaj yo', ne cunaj uxrá vaa yo', rá ní' á”, taj danj Diose a —taj Jesucristó rihaan nij sí uun chij rihaan nij yuvii israelitá a.

<sup>12</sup> Gaa ne nanó rá nij so' daj gaa quita'aa nij so' man Jesucristó, tzaj ne cuchu'vi' nij so' ni'yaj nij so' man nij yuvii a. Ése che'e ma'an nij so' me cuentó nanó Jesucristó a. Ase vaa nij sí nuu tumé naa vaa ma'an nij so' ni'yaj Jesucristó, ne quene'en nij so' se vaa che'é dan nanó Jesucristó cuentó yo' a. Gaa ne tanáj nij so' man Jesucristó, ne ca'anj nij so' a.

*Nana nihánj taj xna'anj che'é puextó go' ní' rihaan gobiernó ne che'é se rque ní' rihaan Diose do' a*

<sup>13</sup> Gaa ne ca'née nij sí uun chij yo' doj sí fariseo do', doj sí noco' man sí cu'naj Herodes do', rihaan Jesucristó, che'é rej cuta' nij so' cacun' xraá Jesucristó che'é nana ca'mii Jesucristó a.

<sup>14</sup> Dan me se chuchi' nij sí tiha' yu'unj yo' rihaan Jesucristó, ne cataj nij so' rihaan so' a:

—Ne'en núj se vaa nana ya inanj a'mii so', maestro. Ne ne chu'ví so' ni'yaj so' man nij yuvii daj cataj nij yuvii ma'. Ne 'o' cuyaan vaa nu' yuvii



rihaan so' chuguanj. Maan se ya tucu'yón so' rihaan yuvii daj qui'yaj yuvii canoco' yuvii man Diose adonj. Ne no xcuún yuvii go' yuvii puextó rihaan síi nicaj suun gobiernó na'. Ase se go' yuvii xa'. Dan me se go' núj na'. Se go' núj xa' —taj nij so', xná'anj nij so' man Jesucristó a.

<sup>15</sup> Dan me se aj ne'en Jesucristó se vaa síi nucui' rá me nij síi xná'anj nana yo' man so', ne che'é dan cataj so' rihaan nij so' a:

—Me che'é me rá soj tihá' yu'unj soj manj ne cutá' soj cacun' xráj ga. Tihaan soj 'o sa'anj aga' rihanj ni'yaj á —taj Jesucristó rihaan nij síi me rá tihá' yu'unj man so' a.

<sup>16</sup> Ne tihaan nij so' 'o sa'anj aga' rihaan so', ne xná'anj so' man nij so', cataj so':

—Me síi nó rihaan sa'anj aga' nihánj ga. Ne me síi se-chuvii nó rihaan sa'anj aga' nihánj ga —taj Jesucristó, xná'anj so' man nij síi me rá tihá' yu'unj yo' a.

—Síi nicaj suun gobiernó me nó rihaan sa'anj aga' yo', ne nó se-chuvii so' rihaan sa'anj ei —taj nij so' a.

<sup>17</sup> Gaa ne cataj Jesucristó:

—Go' soj si'yaj síi nicaj suun rihaan ma'an so', ne rque soj si'yaj Diose rihaan Diose á —taj Jesucristó a.

Gaa ne ca'anj ndo'o rá nij síi me rá tihá' yu'unj yo' ni'yaj nij so' man Jesucristó a.

*Nana nihánj taj xna'anj se vaa ya cunu i'na' uún nij síi cavi' a*

<sup>18</sup> Gaa ne cuchil' doj síi saduceo rihaan Jesucristó a. Nij síi saduceo ro', a'mii nana nihánj se vaa

daj chihaa mǐj se cunuu i'na' uún yuvīi asa' cavi' yuvīi, taj nij so' a. Dan me se xná'anj nij so' man Jesucristó, ne cataj nij so' nana nihánj a:

19 —Cachrón síi cu'naj Moisés nana nihánj rihaan yanj cunḡ ní' a: “Sese cavi' yo'ḡ so', ne sese quináj uun nica so', ne sese taj vaj ta'níi so', ne nḡ xcúú̄n tinúú so' xcaj tinúú so' man choco' so' chana quináj, ne cotoj tinúú síi cavi' ga choco' so', ne cuchruj no' ne'ej, ne guun ta'nij síi cavi' man ne'ej yo' ne cunuú ne'ej yo' rihaan to'óó síi cavi' yo' a”, me nana cachrón síi cu'naj Moisés rihaan yanj gaa naá, maestro.

20 Dan me se vaa chij nij tinuj 'ḡ nij so', ne síi chava' me se xcaj so' chana, gaa ne cavi' so', ne taj vaj ne'ej cuchruj chana nica so', qui'yaj so' a.

21 Gaa ne xcaj scue'ee síi cavi' man choco' so' chana cavi' nica, gaa ne cavi' so' uún, ne taj vaj ne'ej cuchruj chana yo', qui'yaj so', ne veé danj xcaj scue'ee so' uún man chana, ne so' cavi' uún, ne veé danj qui'yaj cunudanj chij nij tinuj nij so', ne xcaj cunudanj nij so' man orún' chana yo', tzaj ne cavi' cunudanj nij so', ne taj vaj a 'ó ne'ej cuchruj chana yo' a man adonj.

22 Ndaa síj, gaa ne cavi' ma'an chana uún,

23 ne dan me se asa' cunuu i'na' uún nij síi cavi', gaa ne me tuvi' nij so' nicaj man chana yo', rá so' ga. 'ḡ se gaa vaa i'na' nij so', ne nica taran' nij tinuj nij so' guun orún' no' a —taj nij síi saduceo, xná'anj nij so' man Jesucristó a.

24 Gaa ne cataj Jesucristó rihaan nij so' a:

—Ne ne'en uxrá soj ma'. 'ḡ se ne ne'en soj me taj danj Diose, ne ne ne'en soj sese nucuaḡ ndo'o Diose a.

25 'O se asá' cunuu i'na' uún nij síí cavi', ne se xcaj tuvi' nij so' a ma'. 'O se ase vaa yáán nij se-mozó Diose rej xta' ro', danj gaa cayáán nij so' nanj adonj.

26 Gaa ne cataj xna'anj 'unj rihaan soj daj gaa quene'en soj se vaa ya ya cunuu i'na' uún yuvii asa' cavi' yuvii ei. Ataa nayaá soj nana nihánj nana no rihaan danj Moisés nana che'é coj aco' ya'an raa na'. Ne dan me se gaa quene'en Moisés coj yo', ne cataj Diose rihaan Moisés: “Diose síí noco' nij síí man gaa naá síí cu'naj Abraham do', síí cu'naj Isaac do', síí cu'naj Jacobo do', mej a”. Danj cataj Diose che'é nij síí man gaa naá yo' a.

27 Dan me se nuveé se-Diose nij xnangá me Diose ma'. Inanj nij síí vaa i'na' a'vee noco' man Diose nanj adonj. Che'é dan, nda' se síí cane gaa naá me va'nuj nij so', tzaj ne vaa i'na' nij so' rihaan Diose nanj ei. Ne ne'en uxrá soj a ma' —taj Jesucristó rihaan nij síí saduceo yo' a.

*Nana nihánj taj xna'anj me nana me nana nocoj doj cunó ní' a*

28 Gaa ne yo'o nij síí naqui'yaj cuu se-tucuanj Moisés cuchi' rihaan Jesucristó, ne so' ro', me síí cuno daj ca'mii Jesucristó ga nij síí saduceo yo', ne quene'en so' se vaa sa' uxrá ca'mii Jesucristó, ne che'é dan xná'anj so' man Jesucristó, ne cataj so':

—Me nana me nana nocoj doj rihaan cunudanj nij nana cataj xna'anj Diose rihaan ní' cunó ní' ga —taj so', xná'anj so' man Jesucristó a.

29 Gaa ne cataj Jesucristó rihaan so' a:

—Nana nocoo doj rihaan cunudanj nij nana cunō ní' me nana nihánj, ne: “Cunō soj sij israelitá, ne Diose síi 'nij ra'a man ní' me se oruun so',

<sup>30</sup> ne ndaa nimán yá so' guun rá so' nì'yaj so' man Diose síi 'nij ra'a man ní', ne yo'ò ndaa cúu yave yá so' cuchuman ya rá nì'yaj man Diose, ne ndaa nu' se nucuaj yá so' caraa cochroj rihaan Diose nanj adonj”. Ne nihánj me ya nana uun chij ya nanj ei.

<sup>31</sup> Ne vaa yo'ó nana nihánj nana me rá Diose cunō uún ní' a: “Adì' se 'ee rá so' man ma'án so' ro', danj gaa 'ee rá so' man tuví' so' á”. Taj vaj yo'ó nana nocoo doj rihaan roj nana nihánj nana cataj xna'anj Diose rihaan ní' a man adonj —taj Jesucristó rihaan síi naqui'yaj cuu se-tucuanj Moisés yo' a.

<sup>32</sup> Gaa ne cataj síi naqui'yaj cuu se-tucuanj Moisés yo' rihaan Jesucristó a:

—Cunaj uxrá ca'mii so', maestro, ne ya uxrá vaa nana ca'mii so', se vaa oruun Diose, ne taj vaj tuví' Diose, maan se oruun so' nicun',

<sup>33</sup> ne ya uxrá vaa nana se vaa sese ndaa nimán ya ní' guun rá ní' nì'yaj ní' man Diose do', sese yo'ò cuchuman rá ndaa cúu yave ya ní' nì'yaj ní' man Diose do', sese ndaa nu' se nucuaj man ní' caraa cochroj rihaan Diose do', sese gaa 'ee rá ní' man tuví' ní' ndaa se 'ee rá ní' man ma'an ní' do', ne sa' doj vaa tucuaán nihánj rihaan nu' tucuaán nago' que'ee scúj cacaa rihaan Diose nanj chuguanj —taj síi naqui'yaj cuu se-tucuanj Moisés yo' rihaan Jesucristó a.

<sup>34</sup> Gaa ne quene'en Jesucristó se vaa ya cavii raa síi ca'mii danj rihaan so', ne che'é dan cataj Jesucristó rihaan so':

—So' me se nichrun' ya guun chij Diose nimán so' nanj ei —taj Jesucristó rihaan so' a.

Ne taj vaj sí quisij rá xna'anj yo'ó nana man Jesucristó a ma'.

*Nana nihánj taj xna'anj se vaa sí ca'néé Diose t̄inani man yuvi rihaan sayuun ro', nuveé nanj yuvi me so' ma'*

<sup>35</sup> Dan me se gaa tucu'yón Jesucristó se-nana so' man nij yuvi rá nuví nocoo, ne cataj so':

—Nij sí naqui'yaj cuu se-tucuanj Moisés rihaan yuvi ro', me che'é taj nij so' se vaa nanj ta'ní ta'nij si'no sí cu'naj David sí cane gaa naá me sí ca'na' t̄inani man yuvi rihaan sayuun, rá soj ga.

<sup>36</sup> O se nuú Nimán Diose nimán sí cu'naj David, ne cataj sí cu'naj David: “Ca'mii Diose sí 'nij ra'a man ní' rihaan sí 'nij ra'a manj, cataj so' se vaa cayáán sí 'nij ra'a manj x'nú Diose rej nuva' Diose ndaa se quisij qui'yaj canaán Diose rihaan taran' nij sí taj ri'yunj man sí 'nij ra'a manj ne quirii ta'nga' sí 'nij ra'a manj rihaan nij so' nanj adonj”, taj sí cu'naj David yo' a.

<sup>37</sup> Dan me se sí 'nij ra'a man sí cu'naj David me sí ca'nej Diose t̄inani man yuvi rihaan sayuun, taj sí cu'naj David yo' a. Sese 'nij ra'a so' man David, ne me che'é taj nij sí naqui'yaj cuu se-tucuanj Moisés se vaa nanj ta'ní ta'nij si'no David me so' ga. Taj che'é cataj nij so' se vaa nanj yuvi me so' ma' —taj Jesucristó rihaan nij yuvi man rá nuví nocoo a.

Que'ee nij yuvi cuno se-nana Jesucristó, ne guun niha' rá nij so' cuno nij so' se-nana so' a.

*Nana nihánj taj xna'anj che'é cacun' tumé nij síi naqui'yaj cūu se-tucuanj Moisés rihaan yuvīi a*

<sup>38</sup> Dan me se gaa tucu'yón Jesucristó se-nana so' man nij yuvīi, ne cataj so':

—Xcaj nij soj cuentá daj 'yaj nij síi naqui'yaj cūu se-tucuanj Moisés rihaan yuvīi, ne tumé soj man soj se gaa nanj qui'yaj soj ndaa vaa 'yaj nij so' á. Dan me se niha' rá nij so' cunūu nij so' yatzíj sa' xcaan cachee nij so' rej quene'en yuvīi man nij so', ne me rá nij so' ca'mii sa' yuvīi ga nij so' gaa chéé nij so' rihaan yu'vee a.

<sup>39</sup> Ne uun rá nij so' quitaj nij so' chruun xlá sa' doj gaa 'anj nij so' ve' nuu chre' ní tucu'yón ní se-tucuanj Moisés do', gaa 'anj nij so' cha'anj do' a.

<sup>40</sup> Ne a'néj nij so' ve' tucua chana cavi' nica, ne yuun che'e guun tucua nij so' man ve' yo', ne 'yaj xcaan ndo'o nij so' cuentó achíin ni'yaj nij so' rihaan Diose, che'é rej sa' doj guun nucua j nij so' tiha' yu'unj nij so' man yuvīi a. Xa' nij so', tzaj ne che'é se vaa 'yaj nij so' ro', che'é dan doj a gaa sayuun quiran' nij so' qui'yaj Diose, asa' ca'ne' Diose cacun' che'é yuvīi adonj —taj Jesucristó rihaan nij yuvīi a.

*Nana nihánj taj xna'anj che'é chana nique cavi' nica qui'yaj sa' doj rihaan nij ru'vee, ni'yaj Diose a*

<sup>41</sup> Dan me se taj Jesucristó rej taj chrúun sa'anj taj rihaan nuvií nocoo, ne ne'en so' daj qui'yaj nij yuvīi gaa araa nij yuvīi sa'anj aga' rque chrúun sa'anj yo' che'é Diose, ne dan me se man ndo'o síi ru'vee araa uxrá sa'anj rque chrúun yo' a.

42 Ne dan me se ca'na' 'o chana cavi' nica chana nique, ne caraa no' vij guee sa'anj aga' le'ej rque chrúún yo' a.

43 Gaa ne canacúún Jesucristó man nij sí tucu'yón se-nana so' ca'na' nij so' rihaan so', gaa ne cataj so' rihaan nij so' a:

—Cataj xna'anj yá yá 'unj rihaan nij soj cuano se vaa xa' chana cavi' nica chana nique nihánj, tzaj ne doj a caraa no' sa'anj rque chrúún yo' rihaan sa'anj caraa cunudanj yo'ó nij yuvij nanj adonj.

44 'O se nij so', daj doj sa'anj quináj raa se-sa'anj nij so' ro', caraa nij so' rque chrúún, ne xa' no', tzaj ne nda' se achiin ndo'o sa'anj rihaan no', tzaj ne rque no' rihaan Diose cunudanj sa'anj nicaj no' sa'anj quiraan no' se cha no' nanj adonj —taj Jesucristó rihaan nij sí tucu'yón se-nana so' a.

## 13

*Nana nihánj taj xna'anj se vaa canee nu' nuví nocoo ne chuman' Jerusalén a*

1 Gaa ne curihanj Jesucristó rá nuví nocoo, gaa ne yo'o tuvi' nij sí tucu'yón se-nana so' cataj rihaan so' a:

—Ni'yaj so', ne yujej sa' inanj me yujej guun nuví nocoo, ne ve'é ndo'o vaa nu' nij ve' man nuví nocoo, maestro —taj yo'o tuvi' nij sí tucu'yón se-nana Jesucristó a.

2 Gaa ne cataj Jesucristó rihaan so' a:

—Ne'én so' nu' nij ve' nocoo man nuví nihánj na'. Vaa güii, ne canee nu' nuví nocoo nihánj, ne a 'ó yujej se quitáá xráá tuvi' yujej nihánj a ma' —taj Jesucristó rihaan sí tucu'yón se-nana so' a.

*Nana nihánj taj xna'anj che'é sayuun guun rihaan chumij nihánj vaa güii a*

<sup>3</sup> Dan me se ca'anj cayáán Jesucristó raá quij cu'naj Quij man Chruun Olivó, ne ni'yaj so' nuví nocoo, ne cuchi' orún' ca'anj nij sí cu'naj Pedró do', Jacobo do', Juan do', Andrés do', rihaan so', ne xná'anj nij so' man so', cataj nij so':

<sup>4</sup> —Cataj xna'anj so' rihaan núj aman canee nu' nuví nocoo yo' do', a me rasuun ca'na' qui'yáá so' asa' quisíj ca'na' nu' nij sayuun ndaa vaa cataj xna'anj so' rihaan núj, maestro —taj ca'anj tuvi' nij sí tucu'yón se-nana Jesucristó rihaan Jesucristó a.

<sup>5</sup> Gaa ne guun che'e Jesucristó cataj xna'anj Jesucristó rihaan nij so', ne:

—Cutumé ndo'o soj man soj se gaa nanj tihá' yu'unj yuvij man soj á.

<sup>6</sup> 'Q se ca'na' uxrá yuvij cataj: “Unj me sí na'vij soj, ne Cristó mej á”, cataj nij so', ne dan me se tihá' yu'unj uxrá nij so' man tuvi' nij so' nanj á.

<sup>7</sup> ”Dan me se asa' quene'en soj se vaa unu' uxrá chuman' ga tuvi' chuman', ne asa' cuno uxrá soj nana se vaa unu' chuman' man gan' ga tuvi' chuman' yo', ne cutumé soj man soj se cuchu'vi' nimán soj ma'. Maan se vaa che'é guun sayuun yo' rihaan chumij nihánj adonj. Tzaj ne asa' quisíj guun danj, gaa ne se ca'anj ni'ya chumij nihánj nu' orá ma'. 'Q se quinaj chumij nihánj doj adonj.

<sup>8</sup> Dan me se cunu' uxrá yuvij man chuman' nocoo ga yo'ó chuman' nocoo, ne cunu' gobiernó ga tuvi' gobiernó a. Ne cachén yuún nocoo que'ee chuman', ne cachén ndo'o x'naa uún a. Nu' sayuun nihánj ro', ase vaa guun che'e 'o chana



que'ee rque no' cuchruj no' ne'ej ro', danj gaa nu' sayuun nihánj nanj ei. Dan me se nu' ne'en chana ve'ee rque no', ne ne'en no' doj a quiran' no' sayuun rej rihaan no', ne ase uun rá chana yo', danj guun rá soj gaa ca'na' sayuun yo', guun rá soj se vaa daj doj guun uxrá sayuun rihaan chumii nihánj nanj adonj.

9 "Ne tadó soj che'é sayuun quiran' ma'an soj ei. 'O se taquachén nii man soj rihaan nij síi uun chij rihaan ní' sij israelitá, ne taquachén nii man soj rihaan nij síi man rá ve' tucu'yón ní' se-tucuanj Moisés, ne maan yo' go' nii cuartá xráá soj a. Ne taquachén nii man soj canicun' soj rihaan síi nicaj suun do', rihaan síi nicaj suun rey do', che'é se me soj síi noco' manj a. Ne cataj xna'anj soj rihaan nij síi nicaj suun che'ej a.

10 Ne asino ca'mii natáj soj se-nanaj nana sa' rihaan cunudanj nij síi yaníj, gaa ne ca'vee quinavij chumii nihánj adonj.

11 "Dan me se asa' ca'anj nicaj nii man soj rihaan nij síi nicaj suun, ne se nanó rá soj daj ca'mii soj rihaan nij so' ma'. Maan Nimán Diose rque nu' nana ca'mii soj man orá yo' nanj adonj. 'O se nuveé ma'an soj me nij síi ca'mii rihaan nij so' ma'. 'O se Nimán Diose me síi ca'mii rihaan nij so' nanj adonj.

12 Dan me se ca'anj nicaj snó'o man tinúú snó'o rihaan yuvii, ne ticavj' nii man tinúú snó'o yo', qui'yaj ma'an so' nanj adonj. Ne ca'anj nicaj snó'o man ta'níi snó'o rihaan yuvii, ne ticavj' nii man ta'níi snó'o yo', qui'yaj so' ei. Ne cunu' xnii ga rej xnii, ne ca'anj nicaj xnii man rej xnii rihaan yuvii,

ne ticavi' nii man rej xnii yo', qui'yaj so' ei.

<sup>13</sup> Ne nachri' cunudanj nij yuviij man rihaan chumiij ni'yaj nij so' man soj, che'é se me soj síi noco' manj adonj. Tzaj ne síi noco' raan manj ndaa se ca'anj ni'ya chumiij nihánj ro', so' me síi quinaniij rihaan sayuun adonj —taj Jesucristó rihaan ca'anj tuvi' nij síi tucu'yón se-nana so' a.

<sup>14</sup> Ne soj sij nayaa nana nihánj ro', xcaj uxrá soj cuentá me taj nana nihánj nana ca'mii Jesucristó che'é se chi'ii á.

Dan me se cataj uún Jesucristó:

—Aj ne'en soj se vaa vaa 'o se chi'ii qui'yaj ndo'o sayuun man yuviij, ne dan me se güii quene'en soj man se chi'ii yo' rej ne nó xcúún yo' nicun' yo', ne yo'o cunanj nij síi man estadó Judea ca'anj nij so' raa quij á.

<sup>15</sup> Ne síi taj xraá ve' tucúa ro', se catúj so' rá ve' tucúa so' quirii so' si'yaj so' ma'.

<sup>16</sup> Ne síi 'yaj suun tacaan ro', se canicaj so' nano' so' sagan' so' se vaa tanáj so' rihaan yo'óo ma'. Se guun raan nij so' ma'. Maan se yo'o cunanj nij so' á.

<sup>17</sup> Nique nij chana nuu rque do', chana vaa ta'níi ne'ej utzii do', güii ca'na' sayuun yo' a. 'O se se guun nucuaj chana yo' cunanj chana yo' ma'.

<sup>18</sup> Cachinj ni'yaj soj rihaan Diose se vaa se ca'na' sayuun yo' güii gaá maan ma'.

<sup>19</sup> 'O se güii yo' me se ca'na' uxrá sayuun, ne quij doj gaá sayuun yo' rihaan nu' nij sayuun quiran' yuviij asij qui'yaj Diose chumiij, ne daj chihaa míj se quiran' uún yuviij sayuun vaa danj ma'.

<sup>20</sup> Sese que'ee uxrá güii guun sayuun, ne se quinaniij yuviij rihaan sayuun yo' ma'. Tzaj ne vaa

güii quisij sayuun, qui'yaj síi 'nij ra'a man ní', che'é rej quinanií nij síi narií so' canoco' man so' adonj.

<sup>21</sup> "Ne güii yo' me se sese cataj yuvii rihaan soj: "Ní'yaj soj ei. Nihánj 'na' síi tñanií man ní' rihaan sayuun á", ne se cuchumán rá soj ma'.

<sup>22</sup> 'O se ca'na' uxrá síi ne síi cataj se vaa síi tñanií man yuvii rihaan sayuun me nij so', ne ca'na' uxrá síi ne síi cataj se vaa nata' nij so' se-nana Diose, ne qui'yaj nij so' suun sa' nocoo, ne tiha' yu'unj nij so' man cunudanj nij yuvii man rihaan chumií nanj adonj. Ndaa nij síi narií Diose man ro', sese taj vaj Diose tumé man nij so', ne cuchuman rá nij so' ní'yaj nij so' man síi tiha' yu'unj yo' nanj adonj.

<sup>23</sup> Tadó uxrá soj á. Nihánj me se cataj xna'anj 'unj rihaan soj daj guun rihaan chumií nihánj nanj á.

<sup>24</sup> "Tzaj ne güii yo' me se asa' navij quisij sayuun yo', gaa ne guun rmi' güii guun rmi' yavii guun rmi',

<sup>25</sup> ne cayuu nij yati' xta', ne quinaan taran' nij rasuun nucuaj man rej xta' a.

<sup>26</sup> Gaa ne quene'en nii man 'unj sij ca'neé Diose nıcaj yu'unj man yuvii á. Dan me se xráá ngaa quitaj 'unj ca'na' 'unj, ne guun nucuaj ndo'oj quirii ta'ngaj, ne ve'é uxrá curuvij ca'naj a.

<sup>27</sup> Gaa ne ca'nej 'unj man nij se-mozó 'unj cuchı' nij so' rihaan chumií nihánj, ne dan me se naqui'yaj chre' 'unj man nij síi narií Diose man canoco' manj a. Dan me se cachee nij se-mozó 'unj rihaan nu' chumií nihánj, nano' nij so' taran' nij síi cunu chre' ga 'unj nanj adonj.

*Nana nihánj taj xna'anj se vaa ya quene'en ní' se*

*vaa nichrun' ca'na' uún Jesucristó a*

28 "Tucu'yón soj nana nihánj nana che'é chruun man chruj higó raá á. Gaa quisíj guun laruu ra'a chruun, ne naca coj ya'lij ra'a chruun, ne ne'en soj se vaa nichrun' 'na' tió naman maan a.

29 Dan me se xcáj uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne nichrun' ca'na' uún 'unj nanj adonj. Dan me se ase vaa sí nicun' ta'yaa ro', gaa 'unj ei.

30 Ya ya cataj xna'anj 'unj rihaan soj cuano se vaa quene'en ta'aj soj sij vaa i'na' rihaan chumij nihánj cuano se vaa quisij ya 'unj nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavi' soj ei.

31 Vaa güii ca'anj ni'ya yo'óo do', xta' do', tzaj ne se-nanaj me se daj chihaa míj se quinavij yo' ma'.

*Nana nihánj taj xna'anj se vaa ne ne'en ní me güii ca'na' uún Jesucristó ma'*

32 "Nihánj me cataj xna'anj 'unj rihaan soj se vaa a' lo' sí ne ne'en me güii ca'na' uún 'unj rihaan chumij nihánj ma'. Ca'vee se ndaa se-mozó Diose 'yaj suun rej xta', ca'vee se ndaa ma'anj ta'nij Diose, tzaj ne ne ne'en núj me güii me yo' ma'. Orún' Réj me sí ne'en nanj adonj.

33 Yo'o ni'yaj soj, ne se guun cotoj soj ma'. 'O se ne ne'en uxrá soj me güii me ca'naj ma'.

34 Dan me se ase vaa sí ca'anj yo'óo chuman' naj gan' vaa 'unj, ne aj tanáj 'unj ve' tucuj, ne ca'ne' 'unj suun rihaan 'o 'o nij mozó nuu rihanj se vaa ve'é cutumé nij so' nu' si'yáj, ne ase vaa sí tumé

ta'yaa vaa nij soj, ne aj cataj xna'anj 'unj rihaan nij soj se vaa ni'yaj soj a.

<sup>35</sup> Che'é dan tumé uxrá soj man soj, ne ni'yaj soj á. 'O se ne ne'en soj aman ca'na' 'unj sij tucua ve' ma'. Ca'vee ca'naj rej ti'nuu, ca'vee rej yan', ca'vee orá aguáj to'loo ca'vee rej na'yaan ca'vee,

<sup>36</sup> ne tadó soj se guun taj ni'yón ca'naj ne nari' 'unj man soj ne xcaj 'unj cuentá se vaa otoj rma'an soj ei.

<sup>37</sup> Ne nana nihánj nana taj xna'anj 'unj rihaan nij soj ro', veé nana nihánj taj xna'anj 'unj rihaan cunudanj nij yuvií, se vaa tumé soj man soj se gaa nanj cotoj rma'an soj a —taj Jesucristó rihaan ca'anj tuvi' nij síi tucu'yón se-nana so' a.

## 14

*Nana nihánj taj xna'anj se vaa 'o guun rá nij xrej atá suun nocoo doj do', nij síi naqui'yaj cuu se-tucuanj Moisés rihaan yuvií do', se vaa cavi' Jesucristó a*

<sup>1</sup> Dan me se rque vij güii canuû cha'anj pascuá cha'anj chá nij yuvií israelitá chraa yo'óó trigó, ne dan me se 'o guun rá nij xrej atá suun nocoo doj ga nij síi naqui'yaj cuu se-tucuanj Moisés rihaan yuvií se vaa tihá' yu'unj nij so' man Jesucristó, ne quita'aa yuve nij so' man Jesucristó, ne cavi' Jesucristó, qui'yaj nij so', rá nij so' a.

<sup>2</sup> Ne cataj nij so':

—Se quita'aa ní' man so' gaa aman anuû cha'anj ma'. Sese danj qui'yaj ní', ne ca'maan rá nij yuvií, ne guun sayuun, qui'yaj nij yuvií nanj adonj —taj nij so' a.

*Nana nihánj taj xna'anj se vaa caxrj' 'o chana casté raa Jesucristó a*

<sup>3</sup> Dan me se yáán Jesucristó chuman' cu'naj Betania, ne ne so' rá 'o ve' tucúa sí cu'naj Simón sí canó luj ri'yuj man, ne yáán Jesucristó rihaan mesá, ne cuchi' yo'o chana rihaan so', ne nicaj chana yo'o aga' catzii nuu casté gun' daj rii nii man coj cu'naj nardo, ne casté tu'vee ndo'o me yo' a. Naxra' chana yo' aga', ne caxrj' chana casté raa Jesucristó a.

<sup>4</sup> Ne ca'maan rá ta'aj nij sí quene'en, ne cataj nij so' rihaan tuvi' nij so':

—Me che'é tiri' rma'an chana nihánj casté sa' ga.

<sup>5</sup> Me che'é ne cutu'vee no' casté, ne quirí' no' sa'anj ase vaa 'yaj canaán yuvi rque 'o yo', ne go' no' sa'anj yo' man nij sí nique ga —taj nij so' rihaan tuvi' nij so', gaa ne guun che'e nij so' caxrj' yuvaaj nij so' man chana yo' a.

<sup>6</sup> Gaa ne cataj Jesucristó rihaan nij so' a:

—Me che'é a'mii soj danj ni'yaj soj man chana ga. Ca'ne' guee rá nij soj doj nanj á. 'O se ve'é uxrá qui'yaj no' manj ei.

<sup>7</sup> 'O se sí nique me se daj a güii mán nij sí nique ga soj, ne me ma'an güii guun rá soj, ne ca'vee qui'yaj soj se luj ga nij sí nique ei. Tzaj ne 'unj me se vaa güii ca'anj 'unj, ne quinaj uun soj, ne se ca'vee qui'yaj soj se luj che'ej ma'.

<sup>8</sup> Ne chana nihánj me se qui'yaj ma'an no' nu' ndaa vaa ca'vee qui'yaj no', ne dan me se gaa ataa cavi' 'unj ne aj caxrj' no' casté gun' daj manj che'é rej xcax soj cuentá se vaa cachin' nii manj adonj.

9 Ne cataj yá yá 'un̄j rihaan nij soj cuano se vaa me rej ma'an ca'mī natáj yuvī se-nanaj nana sa' rihaan nij yuvī man rihaan nu' chumī nihánj ro', ne cataj xna'anj uún yuvī rihaan tuvi' yuvī che'é se vaa qui'yaj chana nihánj manj, ne se quini'yón yuvī man chana nihánj ma' —taj Jesucristó a.

*Nana nihánj taj xna'anj se vaa cutu'vej síi cu'naj Judas man Jesucristó rihaan nij síi taj ri'yunj man Jesucristó a*

10 Gaa ne síi cu'naj Judas Iscariote yo'o tuvi' chuvij nij síi tucu'yón se-nana Jesucristó me se cavii so' ca'anj so' rihaan nij xrej at̄a suun nocoo doj, che'é rej raçūj so' man nij so' quita'aa nij so' man Jesucristó a.

11 Ne gaa cuno nij xrej at̄a suun nocoo doj, ne guun niha' uxrá rá nij so', ne cata' tu'va nij so' se vaa nago' nij so' sa'anj man síi cu'naj Judas a. Gaa ne guun che'e síi cu'naj Judas nuchruj raa so' aman ca'vee raçūj so' man nij xrej at̄a suun nocoo doj quita'aa nij so' man Jesucristó a.

*Nana nihánj taj xna'anj se vaa ma'an Jesucristó taj xna'anj se vaa taacuachén yo'o tuvi' nij síi tucu'yón se-nana so' man so' rihaan nij síi taj ri'yunj man so' a*

12 Dan me se quisij güii yaan canuû cha'anj chá nij yuvī israelitá chraa yo'óo trigó, ne güii ticavi' nij so' matzinj le'ej che'é Diose me yo', ne dan me se nij síi tucu'yón se-nana Jesucristó me se xna'anj nij so' man Jesucristó, cataj nij so':

—Me rej ca'anj núj qui'yaj chuvii núj cha xti'no ní' cha'anj pascuá, rá so' ga —taj nij so' rihaan Jesucristó a.

13 Gaa ne ca'néé Jesucristó man vij tuvi' nij síí tucu'yón se-nānā so', ne cataj so' rihaan roj so' a:

—Cavii roj soj, ne catuu roj soj chuman' Jerusalén nihánj, ne nari' tuvi' roj soj ga 'o síí atā 'o cacuaj na,

14 ne canoco' roj soj man so', ne rihaan síí tucua ve' catuu so' me se cataj soj: “Xná'anj maestró mán so' se vaa me rej ne ve' chá xti'nō maestró chraa ga nij síí tucu'yón se-nānā so' che'é cha'anj pascuá, taj so' a”, cataj roj soj rihaan síí tucua ve' yo' á.

15 Gaa ne tihān so' 'o ve' nata' xij rihaan roj soj, ne aj vaa chuvii rá ve' yo', ne man chruun mesá man chruun xlá man rá ve' yo' a. Yo' me rej qui'yaj chuvii roj soj á —taj Jesucristó rihaan roj so' a.

16 Gaa ne curihānj roj síí tucu'yón se-nānā Jesucristó, ne catúj roj so' chuman' Jerusalén, ne nari' roj so' nu' ndaa vaa cataj xna'anj Jesucristó rihaan roj so', gaa ne qui'yaj chuvii roj so' chá xti'nō nij so' chraa che'é cha'anj pascuá a.

17 Ne rej ti'nuu, ne ca'na' Jesucristó ga yo'ó chi' nij síí tucu'yón se-nānā so' a.

18 Dan me se yáán nij so' rihaan mesá, chá nij so' chraa, ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa yo'o tuvi' nij soj me síí tacuachén manj rihaan nij síí taj ri'yunj manj, ne síí chá chraa ga 'unj cuano me síí qui'yaj danj ei —taj Jesucristó a.

19 Gaa ne guun che'e nij síí tucu'yón se-nānā so' quinanó ndo'o rá nij so', ne guun che'e nij so' ndaa 'o 'o nij so' xná'anj man Jesucristó, cataj 'o 'o nij so':

—'Unj me síí qui'yaj danj na' —taj 'o 'o nij so' a.

20 Gaa ne cataj Jesucristó rihaan nij so' a:



—Yo'ò tuvi' chujij nij soj sij tucu'yón se-nanaj me síi tacuachén manj rihaan nij síi taj ri'yunj manj, ne síi tiguíj rachrúún ga 'unj rá co'oo me so' adonj.

<sup>21</sup> 'O se taj danj Diose se vaa ca'anj 'unj cavi' 'unj sij ca'née Diose nicaj yu'unj man yuvii, ne ya danj quirán' 'unj adonj. Tzaj ne niqúe ndo'o síi tacuachén manj rihaan nij síi taj ri'yunj manj nanj á. Quiran' uxrá so' sayuun nanj á. Snó'o yo' me se sese ne ca'ngaa so', ne cavii sa' so' doj tzaj adonj —taj Jesucristó a.

*Nana nihánj taj xna'anj che'é rachrúún rqué Jesucristó rihaan nij síi tucu'yón se-nana so' cha nij so' do', che'é na vinó rqué so' co'oj nij so' do' a*

<sup>22</sup> Ne gaa chá nij so' chraa, ne quita'aa Jesucristó yo'oj rachrúún, ne nago' so' graciá rihaan Diose, ne cuxra' ta'aj so' rachrúún, ne rqué so' rihaan nij síi tucu'yón se-nana so', ne cataj so':

—Quita'aa soj rachrúún nihánj á. Ne manj me rachrúún nihánj ei —taj so' a.

<sup>23</sup> Gaa ne quita'aa Jesucristó aga' tazá nuu na vinó, ne nago' so' graciá rihaan Diose, ne tacuachén so' aga' nuu na vinó rihaan nij so', ne co'oj cunudanj nij so' na vinó yo' a.

<sup>24</sup> Gaa ne cataj so' rihaan nij so' a:

—Ton manj me na nihánj, ne che'é ton manj ro', rqué Diose 'o nana rihaan soj daj qui'yaj Diose ga soj a. Dan me se cayanj ton manj che'é que'ee yuvii adonj.

<sup>25</sup> Ne cataj yá yá 'unj rihaan soj cuano se vaa veé doj nihánj me co'oj, ne se co'oj yaj a ma'. Tzaj ne asa' quisíj güii guun chij Diose rihaan

chumiḡ nihánj, ne cunuḡ naca chumiḡ nihánj, gaa ne co'oj na vinó naca ei —taj Jesucristó rihaan nij síḡ tucu'yón se-nana so' a.

<sup>26</sup> Gaa ne cachráá taran' nij so' chra' rihaan Diose, ne cavii nij so', ca'anj nij so' quij cu'naj Quij man Chruun Olivó a.

*Nana nihánj taj xna'anj se vaa cataj xna'anj Jesucristó se vaa guun na'aj síḡ cu'naj Pedró, ne cataj so' se vaa nuveé sij noco' man Jesucristó me so' a*

<sup>27</sup> Gaa ne cataj Jesucristó rihaan nij so' a:

—Danj Diose taj se vaa go' Diose man síḡ tumé matzinj, ne cunanj nij matzinj cha'nuḡ nij xo' a. Ne ya ase vaa daán 'unj matzinj vaa soj, ne guun na'aj taran' soj, ne se canoco' soj manj a ma'.

<sup>28</sup> Tzaj ne asa' quisij cunuḡ i'na' uún 'unj, ne quitaj yaan 'unj rihaan soj ca'anj 'unj estadó Galilea, ne nari' tuvi' ní' estadó Galilea nanj adonj —taj Jesucristó rihaan nij síḡ tucu'yón se-nana so' a.

<sup>29</sup> Gaa ne cataj síḡ cu'naj Pedró rihaan so' a:

—Ca'vee se tanáj taran' nij so' mán so', tzaj ne daj chihaa míj se tanáj 'unj mán so' ma' —taj Pedró a.

<sup>30</sup> Ne cataj Jesucristó:

—Ya ya cataj xna'anj 'unj rihaan so' cuano se vaa aj ne'én 'unj se vaa niḡ cuan' gaa ataa quisij vij caguáj to'loo, ne va'nuj ya cataj so' rihaan yuvij se vaa nuveé sij noco' manj mé so' a —taj Jesucristó rihaan Pedró a.

<sup>31</sup> Gaa ne nucuaj uxrá cataj Pedró rihaan Jesucristó, ne:

—Taj ma'. Ca'vee se ticavij yuvij man ní', tzaj ne daj chihaa míj se cataj 'unj se vaa nuveé sij noco' mán so' mej ma' —taj Pedró rihaan Jesucristó a.

Ne ase vaa cataj Pedró ro', danj cataj taran' nij sí tucu'yón se-nanā Jesucristó a.

*Nana nihánj taj xna'anj daj qui'yaj Jesucristó gaa cachín ni'yaj Jesucristó rihaan Diose a*

<sup>32</sup> Gaa ne ca'anj Jesucristó ga nij so' ndaa yo'ó rej cu'naj Getsemaní, ne cataj xna'anj Jesucristó rihaan nij so' a:

—Cane soj nihánj, na'vij soj mán 'unj, ne ca'anj 'unj, cachinj ni'yáj rihaan Réj a —taj Jesucristó a.

<sup>33</sup> Ne nicaj Jesucristó man Pedró do', man Jacobo do', man Juan do', ca'anj so', ne guun che'e so' quinano' ndo'o rá so' a.

<sup>34</sup> Gaa ne cataj so' rihaan va'núj nij sí ca'anj ga so' a:

—Nanó uxrá raj adonj. Maan che'é rej nanó ndo'o raj, qui'yaj cavi' 'unj, raj a. Qui'yaj soj se ndo'o quinaj soj nihánj, ne se cotoj soj ma' —taj Jesucristó rihaan va'núj nij so' a.

<sup>35</sup> Gaa ne cavii so' yaníj doj tzin', ne ca'anj cayáán rno' so' rihaan yo'óó, ne cachín ni'yaj so' rihaan Diose se vaa sese ca'vee, ne caráán ra'a Diose xráá so', se gaa nanj quirán' so' sayuun a.

<sup>36</sup> Dan me se cataj so':

—Ca'vee qui'yáá so' cunudanj, Ataj. Caráán ra'á so' xráj, se gaa nanj quirán' uxrá 'unj sayuun, tzaj ne sese ma'án so' me rá quirán' 'unj sayuun, ne qui'yáá so' ndaa vaa me rá ma'án so', ne se qui'yáá so' ndaa vaa me rá ma'anj ma' —taj Jesucristó, cachín ni'yaj so' rihaan Diose a.

<sup>37</sup> Gaa ne canicaj uún so' ca'na' so' rihaan va'núj nij sí tucu'yón se-nanā so', ne quene'en so' se vaa

cotoj cunudañj nij so' a. Gaa ne cataj so' rihaan Pedró a:

—Otoj so', nanj Pedro. A 'ó orá ne guun nućuáá so' ni'yaj so' a ma'. Ya na'.

<sup>38</sup> Maan se ni'yaj soj, ne cachinj ni'yaj soj rihaan Diose se vaa caráán Diose rihaan síi chree se caxríj síi chree chrej chi'ij rque soj á. 'O se niha' rá soj qui'yaj soj se sa', tzaj ne ne uun nućuaj soj ma' —taj Jesucristó rihaan nij so' a.

<sup>39</sup> Gaa ne cavii uún Jesucristó, ca'anj so', ne cachín ni'yaj uún so' rihaan Diose, ne cyaan vaa nana ca'mii so' rihaan Diose ga nana ca'mii so' asij cua'aa doj a.

<sup>40</sup> Gaa ne canicaj uún so' ca'na' so', ne quene'en so' se vaa cotoj uún va'nuj nij síi tucuyón se-nana so' a. 'O se ca'na' ndo'o nej rihaan nij so' a. Ne ne nari' nij so' nana ca'mii nij so' rihaan so' a.

<sup>41</sup> Gaa ne corá me se ca'na' uún so' rej man va'nuj nij síi tucuyón se-nana so', ne cataj so':

—Ca'vee cotoj soj ca'vee naraan rá soj ca'vee sese vaa ya'núj rihaan soj á. Ni'yaj soj, ne nihánj me se quisij orá tacuachén yo'o so' manj rihaan síi tumé ndo'o cacun', che'é se mé 'unj síi ca'néé Diose nīcay yu'unj man yuvii adonj.

<sup>42</sup> Naxagaa soj, ca'anj ní nanj ei. Ni'yaj soj nedi'. 'Na' síi tacuachén manj rihaan síi taj ri'yunj manj nanj chuguanj —taj Jesucristó a.

*Nana nihánj taj xna'anj daj qui'yaj nii gaa quita'aa nii man Jesucristó a*

<sup>43</sup> Dan me se nicun' Jesucristó ca'mii so', ne nu' ca'na' síi cu'naj Judas yo'o tuvi' chuvij nij síi tucuyón se-nana Jesucristó, ne ca'na' uxrá yuvii

ga so', ne nicaꝝ nij yuvii neê espadá do', chruun do' a. Dan me se nij yuvii ca'néé nij xrej atá suun nocoo doj do', nij yuvii ca'néé nij síí naqui'yaj cuu se-tucuꝝnj Moisés do', nij yuvii ca'néé nij síí uun chij rihaan nij yuvii israelitá do', me nij yuvii ca'na' a.

<sup>44</sup> Ne síí cu'naj Judas cataj xna'anj rihaan nij yuvii se vaa daj qui'yaj so' ga Jesucristó, gaa ne cunu yaan nij yuvii man Jesucristó, ne cataj so':

—Síí ruṭu'vaj ro', so' me síí quita'aa soj cuaj á. Raan cano soj man so', ca'anj soj á —taj síí cu'naj Judas a.

<sup>45</sup> Gaa ne nu' cuchi' so' cuaj rihaan Jesucristó, ne cataj so':

—Maestro —taj so', ne nu' cachrón tu'va so' xruu Jesucristó a.

<sup>46</sup> Gaa ne cuchi' nij yuvii rihaan Jesucristó, ne quita'aa nij yuvii man Jesucristó a.

<sup>47</sup> Ne yo'o síí nicun' ga Jesucristó me se quirii so' taneê so' neê espadá, ne go' so' neê espadá yo' raꝝ yo'o se-mozó xrej atá suun nocoo doj, ne veé dan güéj nu' xréé mozó yo', qui'yaj so' a.

<sup>48</sup> Gaa ne cataj Jesucristó rihaan nij yuvii a:

—Me che'é nicaꝝ soj neê espadá nicaꝝ soj chruun nicaꝝ soj, ca'na' soj ga. Síí ituu mé 'unj, rá soj na'.

<sup>49</sup> Ne 'o se guun que'ee güii cayáan 'unj rá nuvií nocoo, tucu'yón 'unj se-nanaj rihaan soj, tzaj ne ne quita'aa soj manj ma'. Tzaj ne nihánj me se quirán' 'unj nu' se vaa taj nana no rihaan danj Diöse a —taj Jesucristó a.

<sup>50</sup> Gaa ne tanáj cunudanj nij síí tucu'yón se-nana Jesucristó man so', ne cunánj nij so', ca'anj nij so' a.

51 Ne vaa 'o sí tachruu noco' xcó Jesucristó, ne orún' yatzíj mantá niquee so', ne quita'aa nij yuvii man so',

52 gaa ne tanáj so' yatzíj mantá ra'a nij yuvii, cunánj so', ne cánj uun vaa so', cunánj so' a.

*Nana nihánj taj xna'anj daj qui'yaj nii gaa cuta' nii cacun' xráá Jesucristó a*

53 Dan me se nij sí quita'aa man Jesucristó me se nicaj nij so' man Jesucristó ca'anj nij so' rihaan sí yanj xrej atá suun noco doj, gaa ne cunuu chre' yo'ó nij xrej atá suun noco doj do', nij sí naqui'yaj cuu se-tucuñj Moisés rihaan nij yuvii do', nij sí uun chij do', rej mán nij so' a.

54 Ne gan' gan' canoco' sí cu'naj Pedró xcó Jesucristó, ne cuchi' so' rihaan ve' yanj xrej atá suun noco doj yo', ne catúj so' rá ve', ne ca'anj cayáán so' gá nij se-mozó xrej man rá ve', tinaguun so' ra'a so' rihaan ya'an a.

55 Dan me se nano' nij xrej atá suun noco doj nano' nij cuese nano' man yuvii cataj xna'anj che'é cacun' tumé Jesucristó a. Me rá nij so' nari' nij so' cacun' cuta' nij so' xráá Jesucristó, ne cavi' Jesucristó, rá nij so' a. Tzaj ne nuvi' cacun' tumé Jesucristó nari' nij so' ma'.

56 'O se cuchi' uxrá sí ne rihaan nij cuese ca'mii ne nij so', tzaj ne ino vaa nana ca'mii 'o 'o nij so' a.

57 Gaa ne canicun' yo'ó doj sí ne uún, ne guun rá nij so' cuta' nij so' cacun' xráá Jesucristó, ne dan me se cataj nij so':

58 —Cuno núj se vaa cataj Jesucristó se vaa: “Unj me sí taquanee nuvi' noco nihánj nuvi' cune' yuvii, ne rque va'núj güii cune' unj yo'oj uún, tzaj

ne nuveé nuvíi cune' ma'an yuvij me nuvíi cune' 'unj a man adonj", taj Jesucristó cuno núj ei —taj síi ne ni'yaj nij so' man Jesucristó,

<sup>59</sup> tzaj ne ndaa se-nana nij so' me se ne 'o cyaan vaa nana ca'mii 'o 'o nij so' a ma'.

<sup>60</sup> Gaa ne canicun' xrej atá suun nocoo doj tanuu yo'ó nij síi man rá ve' yo', ne xná'anj so' man Jesucristó, cataj so':

—Me che'é ne a'mii so' ga. Daj vaa nana nihánj nana a'mii roj síi nihánj che'é so' ga —taj so', xná'anj so' man Jesucristó a.

<sup>61</sup> Tzaj ne díj táa Jesucristó, ne ca'mii so' a doj nana a. Gaa ne xná'anj uún xrej atá suun nocoo doj man Jesucristó, ne:

—So' me ta'níi Diose síi tinanii man yuvij rihaan sayuun na' —taj so', xná'anj so' man Jesucristó a.

<sup>62</sup> Gaa ne cataj Jesucristó rihaan so' a:

—Veé danj vaa ya ei. Ne quene'en soj se vaa quitaj 'unj rej nuva' Diose síi nucuaj ndo'o á. Ne quene'en uún soj se vaa ca'na' uún 'unj rihaan chumij nihánj, ne quitaj 'unj xráá ngaa xtá' ca'naj adonj —taj Jesucristó rihaan xrej atá suun nocoo doj yo' a.

<sup>63</sup> Gaa ne ca'maan rá xrej yo', ne cutzin' xrej yo' sagan' ma'an xrej, ne cataj xrej rihaan tuvi' xrej a:

—Ni'yaj soj vij. Se cachiin doj síi ca'na' cataj xna'anj rihaan ní' che'é cacun' tumé síi nihánj a ma'.

<sup>64</sup> Ne cuno soj nana quij ca'mii so' se vaa quitaj ma'an so' rej x'nuj Diose na'. Aj cuno soj chuguanj. Ne daj qui'yaj ní' man so', rá soj ga —taj xrej, xná'anj xrej man nij tuvi' xrej a.

Gaa ne cunudanj nij so' cuta' cacun' xraá Jesucristó se vaa no xcuún Jesucristó cavi' Jesucristó a.

<sup>65</sup> Gaa ne guun che'e ta'aj nij so' quirii talúj nij so' man Jesucristó, ne caráán nij so' yatzíj rihaan Jesucristó, ne go' nij so' man Jesucristó, ne cataj nij so':

—Racuíj Diose mán so' cataj xna'anj so' rihaan núj me síi go' mán so' vij —taj nij so', tiha' yu'unj nij so' man Jesucristó a.

Ne nicaj nij tanuu man so', ne go' nij tanuu chruun xraá so' a.

*Nana nihánj taj xna'anj daj qui'yaj síi cu'naj Pedró gaa cataj so' se vaa nuveé sij nocó' man Jesucristó me so' a*

<sup>66</sup> Veé dan, ne yanj Jesucristó ga yo'ó nij so' rá ve', ne yanj síi cu'naj Pedró rej rque doj rej rihaan ve' yo' a. Gaa ne ca'na' yo'ó mozó chana nuu rihaan xrej ata suun nocóo doj,

<sup>67</sup> ne quene'en no' man Pedró gaa tinaguun Pedró ra'a Pedró rihaan ya'an a. Gaa ne ni'yaj uxrá mozó chana yo' man Pedró, gaa ne cataj no':

—Ne ma'án so' me yo'ó síi cachéé ga Jesucristó síi cavii chuman' Nazaret á —taj mozó chana yo' rihaan Pedró a.

<sup>68</sup> —Taj ma'. Ne unó 'unj me taj so' ma' —taj Pedró rihaan mozó chana, gaa ne curihanj so', ne canicun' so' rihaan chingá a.

<sup>69</sup> Gaa ne quene'en mozó chana se vaa nicun' Pedró rihaan chingá, ne guun che'e no' ca'mii no' rihaan nij yuvii nicun' rihaan chingá ga Pedró, cataj no':

—Síi nihánj me yo'ó nij síi cachéé ga Jesucristó asuun asán —taj mozó chana yo' a.



<sup>70</sup> Gaa ne cataj uún Pedró se vaa ne ne'en so' man Jesucristó a.

Dan me se corá nii me se cataj nij síí nicun' ga Pedró rihaan Pedró a:

—Ya ya yo'o síí cachée ga Jesucristó mé so' ei. 'O se sij cavii estadó Galilea mé so' chuguanj —taj nij so' rihaan Pedró a.

<sup>71</sup> Gaa ne guun che'e Pedró nucaj doj ca'mii Pedró, cataj Pedró se vaa ca'vee qui'yaj Diose sayuun man so' sese nuveé nana ya me nana a'mii so', ne cataj so':

—Ne ne'enj man snó'o nihánj síí a'mii soj che'é a ma' —taj uún Pedró,

<sup>72</sup> gaa ne nu' quisij vij caguáj to'loo a.

Gaa ne nanuj rá Pedró ndaa vaa cataj Jesucristó rihaan so' quii se vaa gaa ataa quisij vij caguáj to'loo, ne va'nuj cataj Pedró se vaa nuveé sij noco' man Jesucristó me ma'an Pedró a. Gaa ne guun che'e Pedró ta'vee ndo'o Pedró a.

## 15

*Nana nihánj taj xna'anj daj ca'mii síí cu'naj Pilato ga Jesucristó a*

<sup>1</sup> Gaa ne rej ranga' cunuu chre' nij xrej ata suun nocoo doj do', nij síí uun chij do', nij síí naqui'yaj cuu se-tucuanj Moisés do', cunudanj nij cuese do', qui'yaj nij so' junta, gaa ne numij nij so' man Jesucristó, ne nica'j nij so' man Jesucristó ca'anj nij so' rihaan síí cu'naj Pilato, ne tacuachén nij so' man Jesucristó rihaan so' a.

<sup>2</sup> Gaa ne xná'anj síí cu'naj Pilato man Jesucristó, cataj so':

—So' me sí nicaj suun rey uun chij rihaan nij yuvij israelitá na' —taj so', xná'anj so' man Jesucristó a.

—Vej ei —taj Jesucristó rihaan so' a.

<sup>3</sup> Ne cuta' ndo'o nij xrej atá suun nocoo doj cacun' xráá Jesucristó a.

<sup>4</sup> Gaa ne xná'anj uún sí cu'naj Pilato man Jesucristó, cataj so':

—Me che'é ne a'mii so' ga. Nihánj me se uta' uxrá nii cacun' xráá so' ei —taj sí cu'naj Pilato rihaan Jesucristó a.

<sup>5</sup> Tzaj ne yuun che'e ne ca'mij Jesucristó a doj nana rihaan so', ne caráya'anj uxrá sí cu'naj Pilato che'é yan qui'yaj so' danj a.

*Nana nihánj taj xna'anj se vaa cataj xna'anj sí cu'naj Pilato se vaa cavi' Jesucristó rihaan rcutzé a*

<sup>6</sup> Ne vaa yo'o tucuáán noco' sí cu'naj Pilato se vaa rii so' man yo'o yo'o sí 'nij taga' 'o 'o cha'anj pascuá, ne tinavij uun so' cacun' tumé sí urihanj taga' yo' a. Me ma'an 'o sí 'nij taga' achíín nij yuvij se vaa quirij so', ne ca'vee qui'yaj so' ndaa vaa taj nij yuvij a.

<sup>7</sup> Dan me se vaa 'o sí cu'naj Barrabás 'nij taga' ga yo'ó nij sí guun rá cunu' ga gobiernó, ne nij so' me se gaa cunu' nij so' ga gobiernó ne ticavi' ndo'o nij so' yuvij a.

<sup>8</sup> Dan me se cavii nij yuvij israelitá, ne guun che'e nij so' cachíín nij so' man sí cu'naj Pilato se vaa quirij so' man 'o sí 'nij taga' ndaa vaa u'yón so' 'yaj so' che'é nij so' a.

<sup>9</sup> Gaa ne xná'anj sí cu'naj Pilato man nij yuvij, cataj so':

—Ne me rá soj quirii 'unj man sí nicaj suun rey uun chij rihaan soj sij israelitá na' —taj so', xná'anj so' man nij yuvii a.

<sup>10</sup> Danj ca'mii so', ne'en so' se vaa maan che'é se guun xcoj ruvaa rá nij xrej ata suun nocoo doj me tacuachén nij xrej man Jesucristó rihaan so' a.

<sup>11</sup> Tzaj ne nij xrej ata suun nocoo doj me se cataj xna'anj nij so' rihaan nij yuvii se vaa quirii sí cu'naj Pilato man sí cu'naj Barrabás taga' qui'yaj nij yuvii a.

<sup>12</sup> Gaa ne xná'anj uún sí cu'naj Pilato man nij yuvii, cataj so':

—Che'é se me rá soj quirii 'unj man sí cu'naj Barrabás rihaan soj, ne che'é dan daj qui'yaj man sí tucunáj soj sí nicaj suun rey uun chij rihaan soj ga —taj so', xná'anj so' man nij yuvii a.

<sup>13</sup> Gaa ne caguáj uún nij yuvii, cataj nij yuvii:

—Cavi' so' rihaan rcutze, qui'yáa so' ei —taj nij yuvii a.

<sup>14</sup> —Tzaj ne me cacun' tumé so' ga —taj sí cu'naj Pilato, xná'anj so' man nij yuvii a.

Tzaj ne doj a caguáj nij yuvii, cataj nij yuvii:

—Cavi' so' rihaan rcutze, qui'yáa so' cuaj ei.  
—Danj inanj caguáj nij yuvii a.

<sup>15</sup> Ne sí cu'naj Pilato me se guun rá so' qui'yaj so' ndaa vaa no xcúun so' qui'yaj so' che'é nij yuvii, ne che'é dan quirii so' man sí cu'naj Barrabás taga' che'é nij yuvii, ne go' nij tanuu cuartá xráa Jesucristó, qui'yaj so', ne tacuachén so' man Jesucristó rihaan nij tanuu che'é rej cachron nij tanuu man Jesucristó rihaan rcutze a.

*Nana nihánj taj xna'anj se vaa ca'nga' nacoó nij tanuu ni'yaj nij tanuu man Jesucristó a*

16 Gaa ne ca'anj nicaj nij tanuu man Jesucristó rá ve' tucúa síí nicaj suun gobernador, gaa ne canacúún nij tanuu man taran' nij tuvi' tanuu nij so' cunuu chre' taran' nij so' a.

17 Gaa ne nanuû Jesucristó sagan' rey yatzíj tintá, qui'yaj nij tanuu, ne qui'yaj nij so' cachriin tanj, cuta' nij so' raá Jesucristó a.

18 Gaa ne guun che'e nij tanuu caguáj nij tanuu rihaan Jesucristó, cataj nij tanuu:

—Ya ya sij nicaj suun rey rii ta'nga' rihaan nij yuvií israelitá mé so' ei —taj nij so', tiha' nij so' man Jesucristó a.

19 Gaa ne go' nij so' vará raá Jesucristó, ne quirii talúj nij so' man Jesucristó, ne canicun' ruj nij so' rihaan Jesucristó, ne qui'yaj nij so' ndaa vaa 'yaj yuvií na'víj rihaan ya'anj a.

20 Síj ca'nga' nacoó nij so' ni'yaj nij so' man Jesucristó, gaa ne quirii uún nij so' sagan' rey yatzíj tintá nuu Jesucristó, ne na'née uún nij so' sagan' uún Jesucristó man uún so', gaa ne nicaj nij so' man Jesucristó cavii nij so' ca'anj nij so' yan cachron nij so' man Jesucristó rihaan rcutze a.

*Nana nihánj taj xna'anj daj qui'yaj nij yuvií gaa cachrón nij tanuu man Jesucristó rihaan rcutze a*

21 Dan me se gaa vaj nij tanuu ga Jesucristó, ne 'na' nique yo'o síí cu'naj Simón síí cavii chuman' Cirene rej tacaan, ne so' me se rej roj síí cu'naj Alejandro ga Rufo me so', ne dan me se quita'aa nij tanuu man so', ne qui'yaj uxrá nij tanuu fuerzá

man síi cu'naj Simón yo' caṭa so' rcutze cano Jesucristó rihaan a.

<sup>22</sup> Dan me se nicaj nij tanuu man Jesucristó ca'anj nij tanuu tacaan cu'naj Gólgota, ne nana “Gólgota” ro', taj Tacaan Cúu Yave Xnangá a.

<sup>23</sup> Gaa ne rque nij tanuu doj na vinó nachej ga na e' cu'naj mirra man Jesucristó co'o so' a. Tzaj ne ne co'o so' ma'.

<sup>24</sup> Veé dan, ne cachrón nij tanuu man Jesucristó rihaan rcutze, ne tico tixaj nij so' che'é sagan' Jesucristó me síi qui'yaj canaán 'o 'o ta'aj sagan' so' a.

<sup>25</sup> Dan me se aga' uun rej xta' güii me cachrón nij tanuu man Jesucristó rihaan rcutze a.

<sup>26</sup> Ne cachrón nij tanuu letrá rihaan 'o rcuchra', ne taj xna'anj letrá yo' me che'é cavi' Jesucristó, ne: “Síi nihánj me síi nicaj suun rey uun chij rihaan nij yuvii israelitá a”, taj letrá yo' a.

<sup>27</sup> Gaa ne cachrón nij tanuu man yavij snó'o rihaan yavij rcutze yo', ne yavij roj so' me síi ituu a. Dan me se nicun' yo'o so' rej nuva' Jesucristó, ne nicun' yo'ó so' rej nichruun Jesucristó a.

<sup>28</sup> Ne veé danj quisij ya nu' nana no rihaan danj Diose nana taj: “Guun rá nii se vaa yo'o tuvi' nij síi tumé cacun' me so', rá nii a”, taj se-nana Diose yo' a.

<sup>29</sup> Gaa ne cachén yuvii rej nicun' Jesucristó, ne ca'mii chi'ii ndo'o nij yuvii ni'yaj nij yuvii man Jesucristó a. Dan me se tucunó nij yuvii raaj nij yuvii, cataj nij yuvii:

—Nihánj táá so' sij guun rá taçuanee man nuvií nocoo ne cune' yo'ó nuvií nocoo rque va'nuj güii na'.

<sup>30</sup> T̄inanii so' mán so' rihaan rcutze, ne nanij so' rihaan yo'óo yaj vij —taj nij yuvii rihaan Jesucristó a.

<sup>31</sup> Ne ase vaa qui'yaj nij yuvii ro', danj qui'yaj uún nij xrej at̄a suun nocoo doj do', nij síi naqui'yaj cuu se-tucuanj Moisés do', ca'mii chi'ii nij so' rihaan tuvi' nij so' ni'yaj nij so' man Jesucristó, ne cataj nij so':

—T̄inanii síi nihánj man yo'ó yuvii rihaan sayuun, rá so', tzaj ne ne guun nucuaj so' t̄inanii so' man ma'an so' rihaan rcutze danj.

<sup>32</sup> Sese ya ya sij ca'neé Diose t̄inanii man yuvii rihaan sayuun me so' do', sese ya ya sij nicaj suun rey uun chij rihaan ní' sij israelitá me so' do', ne nanij so' cuano rihaan yo'óo, ne quene'en ní', ne cuchuman rá ní' ni'yaj ní' man so' adonj —taj nij so', chi'ii ndo'o ca'mii nij so' ni'yaj nij so' man Jesucristó a.

Ne roj síi ituu nicun' rihaan rcutze rej x'nuj Jesucristó me se ca'mii roj so' nana nij rihaan Jesucristó a.

*Nana nihánj taj xna'anj daj guun gaa cavi' Jesucristó a*

<sup>33</sup> Veé dan, ne caxuj, ne yuun che'e guun rmi' rihaan chumij, ne yo'o guun rmi' chumij ndaa quisij aga' va'nuj rej anoco' güii a.

<sup>34</sup> Veé dan, ne quisij aga' va'nuj, gaa ne nucuaj ndo'o caguáj Jesucristó, cataj so':

—Eloi, Eloi, lama sabactani —taj so', caguáj so' xna'ánj a'mii ma'an so' a. Ne nana caguáj so' taj: “Diose síi noco' 'un̄j mé so' á. Me che'é tanáj uun so' mán 'un̄j ga”, taj nana caguáj Jesucristó a.

<sup>35</sup> Ne cuno ta'aj nij síi nicun' rej x'nuj Jesucristó nana caguáj so', tzaj ne ne cuno nij so' me taj Jesucristó a ma'. Maan se:

—Ni'yaj so' ei. Nacúun síi nihánj man síi cu'naj Elías tadonj —taj nij so' rihaan tuvi' nij so' a.

<sup>36</sup> Gaa ne cunanj yo'o so', ne caraa so' na vinó yuu rque 'o yataan esponja, ne cuta' so' raá yo'o vará, ne ru'maan so' yataan tu'va Jesucristó, ne co'o Jesucristó na yuu yo', qui'yaj so', ne cataj síi qui'yaj danj:

—Dínj qui'yaj soj á. Quene'en ní' sese ca'na' síi cu'naj Elías tananij síi cu'naj Elías man so' rihaan yo'óo ei —taj so' rihaan tuvi' so' a.

<sup>37</sup> Gaa ne sca' caguáj Jesucristó, ne cavi' so' a.

<sup>38</sup> Gaa ne quisin' yatzíj mantá cortiná noco' rá nuvíi noco'o yo' ndaa rej raá, ne 'o quini' ca'anj ndaa tacóo yo' a.

<sup>39</sup> Veé dan, ne nicun' tanuu capitán rihaan Jesucristó, ne quene'en so' nu' se vaa guun gaa cavi' Jesucristó, ne ndaa dan asuun gaa xcaj so' cuentá se vaa ya uxrá ta'nij Diose me Jesucristó, ne dan me se cataj so':

—Ya ta'nij Diose me snó'o nihánj tadonj —taj tanuu capitán yo' a.

<sup>40</sup> Ne gan' doj nicun' que'ee chana, ni'yaj uun nij chana man Jesucristó a. Yo'o no' me chana cu'naj Mariá Magdalena, ne yo'ó no' me chana cu'naj Mariá nii síi cu'naj Jacobo Cunij ga síi cu'naj José a. Ne yo'ó no' me chana cu'naj Salomé a.

<sup>41</sup> Dan me se gaa vaj Jesucristó estadó Galilea, ne qui'yaj suun nij chana che'é Jesucristó a. Ne vaa

que'ee doj chana uún ní ca'anj chuman' Jerusalén  
ga Jesucristó a.

*Nana nihánj taj xna'anj se vaa cachin' nii man  
Jesucristó rque yu'uj yuvej a*

<sup>42</sup> Dan me se rej ata' güii me yo', ne güii no xcuún  
nij yuvi israelitá qui'yaj chuvii nij so' che'é güii  
a'yuj güii naránj rá nij so' me yo',

<sup>43</sup> ne che'é dan ca'na' yo'o sí cu'naj José sí ne  
chuman' Arimatea, ne yo'o sí sa' uun chij rihaan  
nij yuvi israelitá me so', ne sí me ndo'o rá guun  
chij Diosé rihaan chumi nihánj me uún so' a.  
Dan me se quisíj rá so', ne catúj so' rihaan sí  
cu'naj Pilato, ne cachín ni'yaj so' rihaan sí cu'naj  
Pilato se vaa ca'vej sí cu'naj Pilato cachin' so' man  
Jesucristó a.

<sup>44</sup> Dan me se caráya'anj ndo'o sí cu'naj Pilato  
nana se vaa aj cavi' Jesucristó, gaa ne canacúún so'  
ca'na' tanuu capitán rihaan so', ne xná'anj so' man  
tanuu capitán sese ya ya cavi' Jesucristó a.

<sup>45</sup> Gaa ne cataj tanuu capitán se vaa ya ya cavi'  
Jesucristó, ne che'é dan ca'vej rá sí cu'naj Pilato  
ñicaj sí cu'naj José man Jesucristó ca'anj cachinj  
so' a.

<sup>46</sup> Gaa ne xcaj sí cu'naj José yatzíj mantá, gaa  
ne tananij so' man Jesucristó, ne nacutáj so' yatzíj  
mantá xráá Jesucristó, ne caxríj so' man Jesucristó  
rque yu'uj gáán nii rque yuvej, ne caráán so' yuvej  
xij tu'va yu'uj yo' a.

<sup>47</sup> Ne quene'en chana cu'naj Mariá Magdalena  
do', chana cu'naj Mariá nii sí cu'naj José do', rej  
cachin' so' man Jesucristó a.



# 16

*Nana nihánj taj xna'anj se vaa cunuu i'na' uún Jesucristó a*

<sup>1</sup> Ne ti'nuu güii naránj rá nij yuvij israelitá me se quiránj chana cu'naj Mariá Magdalena do', chana cu'naj Mariá nii Jacobo do', chana cu'naj Salomé do', yo'óo gun' daj, che'é rej ca'anj caxrii nij no' yo'óo gun' daj man Jesucristó a.

<sup>2</sup> Gaa ne taxrej cotungó me se ca'anj va'nuj nij chana rej cachin' nii man Jesucristó, ne dan me se aj quisij güii,

<sup>3</sup> ne cataj nij chana rihaan tuvi' chana, ne:

—Me sí quirii yaníj yuvej aráan tu'va yu'uj gaa ne catuu ní' ga —taj nij no', xná'anj nij no' man tuvi' nij no' a.

<sup>4</sup> Gaa ne ni'yaj nij chana, ne quene'en nij chana se vaa aj naj yaníj yuvej, ne dan me se yuvej xij ndo'o me yo' a.

<sup>5</sup> Gaa ne catúj nij chana rque yu'uj, gaa ne quene'en nij chana se vaa yanj 'o sí yaan rej nuva' nij chana, ne nuú so' yatzíj xcaan catzii, ne ca'anj ndo'o rá nij chana a.

<sup>6</sup> Gaa ne cataj sí yaan rihaan nij chana a:

—Taj che'é ca'anj rá nij soj ma'. Nihánj me nano' nij soj man Jesucristó sí cavi chuman' Nazaret sí cachrón nii rihaan rcutze, ne so' me se aj cunuu i'na' uún so' ei. Ne ni'yaj soj rej cuchruj nii man so', ne xcaj soj cuentá se vaa nuvi' so' naj nihánj a man adonj.

<sup>7</sup> Tananj cavii soj cataj soj rihaan nij sí tucu'yón se-nana so' do', ndaa rihaan Pedró do', cataj soj: “Táa yaan Jesucristó rihaan soj 'anj so' estadó

Galilea, ne yo' me rej quene'en nij soj man so' ndaa vaa cataj ma'an so' rihaan soj á", cataj nij soj rihaan Pedró ga yo'ó nij sí tucu'yón se-nana so' á —taj sí yaan rihaan va'nuj nij chana a.

<sup>8</sup> Gaa ne curihanj nij chana rque yu'uj, ne cunanj nij chana, ca'anj nij no' a. 'O se ca'anj ndo'o rá nij chana, ne ndaa ri'ij man nij chana a. Ne ne ca'vee ca'mij nij no' a doj nana rihaan a 'ó yuvij, che'é se cuchu'vi' ndo'o nij no' a.

*Nana nihanj taj xna'anj se vaa quene'en chana cu'naj Mariá Magdalena man Jesucristó a*

<sup>9</sup> Dan me se cunuu i'na' uún Jesucristó taxrej cotungó, gaa ne curuvi' so' asino yaan rihaan chana cu'naj Mariá Magdalena, ne no' me chana quirii so' chij nana chree nimán asij rque doj a.

<sup>10-11</sup> Dan me se ca'anj no' rej man nij sí chée ga Jesucristó, ne dan me se nanó ndo'o rá nij so', ne ta'vee nij so', ne dan me se cataj xna'anj no' rihaan nij so' se vaa vaa i'na' Jesucristó ne quene'en no' man Jesucristó, taj no', tzaj ne ne cuchuman rá nij so' a ma'.

*Nana nihanj taj xna'anj se vaa curuvi' Jesucristó rihaan vij tuvi' nij sí tucu'yón se-nana so' gaa vaj roj so' rej tacaan a*

<sup>12</sup> Cachén doj, gaa ne dan me se chée vij tuvi' nij sí tucu'yón se-nana Jesucristó rej tacaan, ne curuvi' Jesucristó rihaan roj so', tzaj ne ino doj vaa so', ruvi' so', ni'yaj roj so' a.

<sup>13</sup> Gaa ne cavii roj so' uún, nata' roj so' rihaan yo'ó nij sí tucu'yón se-nana Jesucristó, tzaj ne nij so' me se ne cuchuman rá nij so' se-nana roj so' a.

*Nana nihánj taj xna'anj se vaa curuvi' Jesucristó rihaan xaán nij sí tucu'yón se-nana so' a*

<sup>14</sup> Corá me se gaa yáán xaán nij sí tucu'yón se-nana Jesucristó rihaan mesá, ne curuvi' ma'an Jesucristó rihaan nij so', ne cuta' so' cacun' xráá nij so' se vaa guun nichraj rá nij so' ne ne cuchuman rá nij so' se-nana nij sí quene'en man so' gaa cunuu i'na' uún so' a.

<sup>15</sup> Gaa ne cataj Jesucristó rihaan nij so' a:

—Ca'anj nij soj rihaan nu' cachra' chumij, ne ca'mij natáj soj se-nanaj nana sa' rihaan cunudanj nij yuvij a.

<sup>16</sup> Ne me ma'an 'o sí cuchuman rá se-nana soj ne cata' ne, ne so' me sí quinanij rihaan sayuun, tzaj ne sí na'vej rá cuchuman rá se-nana soj me se qui'yaj Diose sayuun man so' che'é cacun' tumé so' adonj.

<sup>17</sup> Ne nihánj me suun sa' nocoo qui'yaj nij sí cuchuman ya rá ni'yaj manj, ne dan me se quitaj tu'va nij so' se-chuvi' 'unj, quirij nij so' nana chree nimán yuvij, ne ca'mij nij so' xna'ánj naca xna'ánj ne ne'en ma'an nij so',

<sup>18</sup> ne ma'an ra'a nij so' quita'aa nij so' xcuáa yuvaa, ne ca'vee se co'o nij so' se xnaj, tzaj ne a doj se quiran' nij so' chi'ij ma'. Ne cuta' ra'a nij so' xráá sí ran', ne nahuun sa' nij sí ran' yo' a —taj Jesucristó rihaan xaán nij sí tucu'yón se-nana so' a.

*Nana nihánj taj xna'anj se vaa cavii Jesucristó xta' a*

<sup>19</sup> Dan me se quisij ca'mii Jesucristó nana dan rihaan nij sí tucu'yón se-nana so', gaa ne cavii so' xta', gaa ne cayáán so' rej nuva' Diose a.

<sup>20</sup> Gaa ne nij sí tucu'yón se-nanā so' me se ca'anj ca'miī natáj nij so' se-nanā so' nu' nij chuman', ne racuíj sí 'nij ra'a man ní' man nij so', ne dan me se che'é suun sa' nocoo qui'yaj nij so' me se raan doj canoco' nij yuviī se-nanā Jesucristó a. Veé danj gaa ya ei.

**Se-nānā Diosē nanā sã' me rá catũũ nimán ní'  
a  
New Testament in Triqui, Copala (MX:trc:Triqui,  
Copala)**

copyright © 1987 Wycliffe Bible Translators, Inc.

Language: Triqui, Copala

Translation by: Wycliffe Bible Translators, Inc.

Triqui, Copala [trc], Mexico

**Copyright Information**

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Triqui, Copala

**© 1987, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

3a8f2838-fe9f-5490-8d78-a7bbfddab871